

Íyi ulitane e' wì tkënewami

Génesis

Si'kuaie yëkkuö i' kiè *Génesis*, e' wà kiane chè, *íyi ulitane e' wì tkënewami*. Yëkkuö i' blatëule böt tsíní. Et tsíní e' dör capítulo et dò capítulo dabom eyök kí et (1-11). Ièt tsíní e' dör capítulo dabom eyök kí böt dò capítulo dabom skeyök (12-50). Et tsíní e' tò se' a íyi kôs e' wì pakè. Ká jaì ena ká i' e' yöne kewe. Ñies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpa, e' kôs yö' Skëköl tò, e' pakè yëkkuö et tsíní tò. Ñies wës s'ditsö tsá e'pa tò ì sulu wamblë' ena ì o' Skëköl tò ie'pa tsatkoie inuí yökí, e' tso' kitule yëkkuö et tsíní kí. Ñies wës s'ditsö pone'mi ká wa'ñe senuk ditséwö wa ditséwö wa ena ì kuekí s'ttò tso' taië kuá'kí kuá'kí, e' kôs pakè yëkkuö et tsíní tò.

Yëkkuö ièt tsíní tò ikkachè se' a tò wës Israel aleripa e'pa dë'bitu wëm eköl kiè Abraham e' wa. Israel aleripa wa Skëköl tò ibikeitsétke ká ulitane wakpa tsatkök inuí yökí. As e' wà tkò, e' kuekí Skëköl tò Abraham klöo' iwák a. Abraham erblë' Skëköl mik buaë, e' kuekí Skëköl tò ittè me' ie' a. E' tso' kitule yëkkuö ièt tsíní kí.

Ttè me' Skëköl tò Abraham a, e' è me'itö Abraham alà Isaac ena Isaac alà Jacob e'pa a. Jacob ñe' è kiè ñies Israel. E' kuekí ie' aleripa kièsö Israel aleripa. Yëkkuö ièt tsíní è kí itso' kitule tò wës Skëköl tò Abraham, Isaac ena Jacob, e'pa tsatkë'bitu ibolökpa kôs yökí as ttè me'itö ie'pa a e' wà tkò wake'.

Skëköl tò íyi ulitane yö'

1 ¹Tsawe tã ká jaì ena ká i', e' yö'at Skëköl tò. ²Mik ie' tò íyi ulitane tsá yö'mi, etã ká wa'ñe kè kí ì ku' yës. Ká sí kè tã!. Di' è me'r iskië. Ká dör ttsettseë. Erë Skëköl Wiköl shkòar di' tsaka.

³Etã Skëköl tò iché: “iKá ñinú!”

Etã ká ñine. ⁴Ie' tò isué tò ká ñiwe e' dör buaë, e' méatitö ñiweie. Ká ttsettse, e' méatitö nañeweie.

⁵Ñiwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

⁶E' bule es tã ie' tò iché: “iIyönú wës skátke kkò dapee es di' shua iblatoie as kè iwöiërwane ñi a!”

7 Etā es iyuéitō di' blatoie. Es di' atē ká jaishet ena ká i' kī. 8 Ì yuéitō, e' kiéitō kakölttō. Ekkē kanewéitō etā ká de böt.

9 E' bule es tā ie' iché: “iDi' atē ká i' kī, e' e' dapa'úka ek tsiní ème as íyök poppo dōka!”

Etā es iyöne. 10 Wé íyök poppo deka, e' kiéitō íyök. Wé di' dapane-ka, e' kiéitō dayë.

Ie' isué tò e' kōs dör buaë. 11 E' ukuökī tā ie' tò iché: “iÍyök kī iyi kuá ulitane tskinú! Kākō wör tā' ese, ñies kal ulitane wör tā' ese kōs tskinú iwakmik iwakmik.”

Etā es ekkēpa tskine. 12 Es íyök kī iyi kuá ulitane tskine kākō wör tā' iwakmik iwakmik, ñies kal wör tā' iwakmik iwakmik. Ie' tò isué tò ekkēpa kōs, e' dör buaë. 13 Ekkē kanewéitō etā ká de mañat.

14 E' bule es tā ie' iché: “iÌ dalöburtā' yönú ká jaì a! Ekkēpa dör buaë ká blatoie ñiwe nañewe, ñies ikkachoie mik tā diwö de kawö tköwoie, ñies ká shta'woie ena duas tköke e' jchënoie. 15 Ekkēpa kōs dalöburke taië ká i' kī.”

Etā es iyöne. 16 Es ie' tò ì dalöburtā' taië ese yuéat bök. Ikibiie dör ká ñiwoie ñiweie. Wéne dalöbur diöshet e' dör olo'bunoie nañeweie. 17 Ekkēpa méatitō ká jaì a dalöbunoie ká i' kī 18 ñië nañeë, ñies ká ñiwe ká nañewe e' blatoie. Ie' tò isué tò ekkēpa dör buaë. 19 Ekkē kanewéitō etā ká de tkël.

20 E' bule es tā ie' tò iché: “iIyiwak serke di' a dayë a, e' kōs yönú taië! iÑies dù ulitane yönú as iur kashuk a!”

21 Etā es iyiwak blubluë serke dayë a, ekkēpa yuéitō. Ñies iyiwak

kōs serke di' a ena dayë a ekkēpa yuéitō iwakmik iwakmik. E' sù dù ulitane yuéitō, iwakmik iwakmik.

Ie' isué tò ekkēpa kōs dör buaë.

22 Etā iyiwak yuéitō e'pa a ie' er buaë ché ttè i' wa: “a' alönú taië, di' kōs, dayë kōs, e' wà iókā taië. Ñies as dù alör taië ká wa'ñe.”

23 Ekkēpa kanewéitō etā ká de skël.

24 E' bule es tā ie' tò iché:

“iIyiwak serke ká sí kī, e' ulitane yönú iwakmik iwakmik! iIyiwak uru, iyiwak kañiru, iyiwak e' kuke iski, ekkē kōs yönú iwakmik iwakmik!”

25 Etā es ie' tò iyiwak ulitane yué ká sí kī iwakmik iwakmik. Ie' tò isué tò ekkēpa kōs dör buaë.

26 E' ukuökī tā ie' tò iché: “Ditsö yuösö wës se' es as ie'pa tkòkasö ká i' kōs wökirie. Nima, dù, iyiwak uru, iyiwak kañiru, iyiwak e' kuke iski, ekkē kōs tso' ká i' kī, e' atdaë ie'pa ulà a.”

27 Mik Skëköl tò s'ditsö tsá yö',

etā iyuéitō wës ie' es;

Ie'pa yuéitō wëm eköl ena ala-köl eköl.

28 Ie' er buaë ché ie'pa a i' es:

“A' ala'r kókā taië,

a' alönú taië ká ulitane kī.

Ká i' kōs e' kané ú a' tò.

Nima, dù, ena iyiwak ulitane ekkēpa kōs wökir a' dör, e' wà ú.”

29 E' ukuökī tā Skëköl tò iché ie'pa a: “Ye' ttò ttsó. İyi kuá kōs wörtā' ñarta', ese méatyö a' a ñè. Ñies kalwö ulitane katarta'

ku'yarta' ese kōs méatyö a' a katè ku'yè. ³⁰Erë iyiwak kañiru, iyiwak uru ena dù, ekkëpa kōs a kākō méatyö katè." Eta es iate. ³¹Ie' isuë tö ekkë kōs dör buaë shute. Ekkë kanewëitö eta ká de teröl.

2 ¹Es ká jaì ena ká i', ñies íyi ulitane tso' iki, e' yöne one se. ²Ká de kul eta ì kōs yö'bituitö e' yöne one, e' kuëki diwö e' wa ie' kè kanëblène. ³E' diwö wa kè ie' kanëblèneia ká i' yuök e' kuëki ie' iché tö diwö e' dör buaë. Ñies ie' iché tö semana bit e' diwö bata e' dör batse'r se' a.

Skëköl Jehová tö s'ditsö tsá yué

⁴I' dör ká jaì ena ká i' tsá yöneat, e' pakè.

Mik Skëköl Jehová tö ká jaì ena ká i' e' yö', ⁵e' këwö ska' ta kām ie' tö kalì patkò ká i' kì, ñies kè yi ku' ká kanëuk. E' kuëki kām kal kuá tskir ena kām kākō tskir. ⁶Erë di' tskirke íyök a, e' tö íyök kōs nuweke. ⁷Eta Skëköl Jehová tö íyök yué s'ditsöie eköl wák dör wëm. Eta ie' tö iwöiké iyik a ta yöne se'ie ttsë'ka.

⁸E' ukuöki ta ie' tö ká buaala yué ekwöki diwö tskirke e' ëka, ká kiè Edén ee. Eta wëm yö'itö, e' méatitö ká buaala e' a senuk. ⁹Ee ie' tö kal ulitane wër bua'buaë, ñies iwö dör buaë katano ese tské. Ká buaala e' shusha, ie' tö kal tské bölka. Kal elka dör sene michoë e' kéli. Kal iëlka e' dör íyi buaë ena íyi suluë ese jchenoie e' kéli.

¹⁰Edén ká shua di' tskirke etö, e' tö ká buaala nuweke. Wé ká e'

kkò döwa ee di' e' ulà jchërke döka tkëtö. ¹¹Di' ulà etö kiè Pisón. E' tkökemi ká kiè Havilá, e' kōs a. Ká e' kì oro tso'. ¹²Oro e' dör oro bua'bua. Ñies kiò masmas bua'bua, ese tso' ena ák bua'bua kiè ónice ese tso'. ¹³Di' ulà etö tkökemi ká kiè Cus, e' kōs a. E' kiè Guihón. ¹⁴Iulà etö skà mir ká kiè Asiria diwö tskirke, e' ëka. E' kiè Tigris. Eta di' ulà bataie, e' kiè Éufrates.

¹⁵Mik Skëköl Jehová tö wëm tsémi méat ká buaala ate Edén e' shua as ikaneütö, as ikkò'nütö, ¹⁶eta ie' tö ttè dalöiëno i' mé ia: "Ká buaala e' kéliwö ulitane katëmibö. ¹⁷Erë íyi buaë ena íyi suluë ese jchenoie e' kéliwö kè katar. Mik kal e' wö katébö, eta be' duöwaraë. E' kuëki kè ikatar."

¹⁸E' ukuöki ta ie' tö iché: "Kè idör bua' wëm a senuk ekörä. Súyö ie' a wapie yué eköl ikimuk buaë." ¹⁹Eta iyiwak yö'itö íyök wa ekkë kōs debitü iwa wëm a suë tö ima ie' tö ikiè mekami. Ta wes wëm tö ikiè méka es iate. ²⁰Es wëm tö iyiwak uru ena iyiwak kañiru, ñies dù, ekkë kōs kiè méka. Erë kè ie' kimuk kune buaë ie' wapieie.

²¹Eta Skëköl Jehová tö wëm kapöwéwa taië, e' dalewa ie' tö ichane yéttsa etö, e' chkà wöiéwaneitö. ²²Ichane e' yuéitö alakölie ta idebitü iwa wëm a. ²³Mik wëm tö isuë, eta ichéitö:

"i' je' dör ye' wák dichéwö ena ye' wák chkà! Alaköl dë'ka wëm wa, e' kuëki ikirdaë alaköl."*

²⁴E' kuëki wëpa kè serpaia iyé ena imì e'pa dapömik, iserdawa

* 2.23 Hebreoie ttè kiane yënuK wëm e' dör ish ena ttè kiane yënuK alaköl e' dör isha.

alaköl ta. Ie'pa bül serdaë ñita, ta imía wës wák eköl è es.

²⁵E' këska' ta wëm ena alaköl iëter sume, erë ie'pa kè wä jaë jcher.

S'ditsö tö Skëköl ttò dalösewëwa

3 ¹Tkabè tso' etö, e' erbikò taië s'kitö'woie iyiwak kañiru yö' Skëköl Jehová tö, ekkë kôs tsata. Ká et ta ie' tö alaköl a ichaké:

—¿Mokí Skëköl tö iyë'at a' a tö ká buaë shüa kal ulitane tso', e' wö kè katar yës?

²Alaköl tö iiüté:

—Au, e' kè dör es. Ie' tö sa' a iché tö kal ulitane wö katarmi. ³Erë kal àr ká i' shüshaë, e' wö kè katanuk, kè e' kanuk sa' a. E' wamblé sa' tö, etä sa' duöralur.

⁴Etä tkabè tö iché alaköl a:

—Au, e' dör kache. A' kè duöpawä. ⁵Ie' wä ijcher buaë tö mik kalwö e' katéwa a' tö, etä i dör buaë, i dör suluë e' jcherdaë a' wä wës ie' wák wä ijcher es.

⁶Etä alaköl isuë tö kalwö e' wër buaë katè. Ie' éna ikatak iyi jchenoie buaë. E' kueki ie' tö kalwö batsée, katéwaitö. E' ukuöki ta ie' tö imé iwëm a, etä iwëm ikatéwa ñies. ⁷E' bet ta i dör sulu, i dör buaë ese ane ie'pa éna, etä ie'pa wä ijchenewä tö ie'pa iëter sume. Etä ie'pa tö kal kiè higuera, e' köyök yué banoie e' wa ie'pa e' patrëwä.

⁸Siwä' bitsirke tsáli, etä wëm ena ilaköl tö Skëköl Jehová shkokedur ká buaë shüa, e' ttsé. E' yöki ie'pa e' blélur kal tso' taië ese shüa.

⁹Erë Skëköl Jehová tö wëm kié ta ichaké:

—¿Wé be' tso'?

¹⁰Wëm tö iiüté:

—Ye' tö ittse tö be' shkokedur ká buaala shüa. Ye' dur sume, e' kueki ye' suane be' yöki. E' kueki ye' e' bléwä be' yöki.

¹¹Etä Skëköl tö ie' a iché:

—¿Yi be' a iché tö be' dur sume? Ichó ña tö kalwö yë'yö be' a tö kè ikatar ¿e' katébö?

¹²Ie' tö iiüté:

—Be' tö ye' a alaköl me', ye' wapieie, e' tö ye' a kalwö mé katè. E' katéwayö.

¹³Etä Skëköl Jehová tö alaköl a ichaké:

—¿Iók bö iwamblé?

Ie' tö iiüté:

—Tkabè tö ye' kitéka, e' kueki ye' tö kalwö e' katéwa.

¹⁴Etä Skëköl Jehová tö tkabè a iché:

—¿I wamblé be' tö, e' kueki ye' tö be' a iché tö iyiwak kôs shüa be' è weirdaë michoë. Këkraë be' shkoraë e' kuule be' batsi' ki ta be' kkò a ká po mirawä. ¹⁵Be' ena alaköl meraatyö ñi bolökie. Be' aleripa kôs ena alaköl aleripa kôs, e'pa ate ñi bolökie ñies. Alaköl aleri eköl tö be' wökir shkä'wëraë ena be' tö ie' klò kaniñak shkä'wëraë.

¹⁶E' ukuöki ta ie' tö iché alaköl a:

—Mik be' alà kurketke etä be' weirdaë siarë, idalë'r taië e' ttse-raëbö. Erë be' ki be' wëm kiardaë ena ie' döraë be' wökirie.*

* 3.16 Mik be' alà kurketke...ie' döraë be' wökirie: Ñies ttè e' mane'wëmisö i' es: Be' éna e' alakka be' wëm ki, erë ie' e' alörakä be' ki.

¹⁷E' ukuöki tã ie' tö iché wëm a:
—Be' tö be' alaköl ttö iuté, kalwö
yë'yö be' a tö kè ikatar, e' wà
katébö. E' kuëki be' weirdäë ñies.
Be' kuëki íyök sulu'wërawayö. Be'
kaneblöraë darërëë be' chkè yuloie.
¹⁸Íyök kî dika'chka ena kākō sulusi,
alördaë. Ñies kalwö kañiru katera-
bö. ¹⁹Be' kawötã kaneblök darërëë
chkoie dö mik be' duowã, míane
íyökie wës be' dör kuaë es etã. Be'
yöne íyök wa, e' kuëki be' dörane
íyökie.

²⁰Wëm tsã yöne, e' kiè Adán. Ila-
köl dör se' mì tsã. E' kuëki Adán tö
ikiè mékã Eva.*

²¹Etã Skëköl tö datsi' yué ie'pa a
iyiwak kkuölit wa, tã ie'pa paiéitö.
²²Etã ie' tö iché: “Iñe ì dör buaë
ena ì dör suluë, e' jcher ditsö wã
wës se' wã ijcher es. E' kuëki dö'
ie'pa mi', sene michoë e' kéli wöba-
tsök katè tã iser michorak.”

²³E' kuëki ie' tö wëm ena ilaköl
yéttsã kã buaala tso' Edén e' a, tã
ipatkémiitö íyök wakanéuk. Íyök
wa wëm yöne e' kî ipatkémi kane-
blök. ²⁴Ie' tö itrë'wëshka, e' ukuöki
tã ì ttsë'ka pik tã' tso' kã jai a kiè
kérub, e'pa tuléwãitö kã buaala
e' ñalé ska' diwö tskirke e' ëkã
ikkö'nuk. Ñies tabè wöñarke dalö-
löë ratkear siwã' kî, e' méatitö as kè
yi döwãia sene michoë kéli ska'.

Caín tö iël kiè Abel, e' ttéwã

4 ¹Etã Adán sené Eva tã. Eva
dunekã tã ilà kune wëm. Ikiè
mekãitö Caín.* Mik alà kune, etã

Eva tö iché: “Jehová tö ye' kímé, e'
kuëki ye' alà kune eköl wëm.” ²E'
ukuöki tã ilà skà kune ek, e' kiè
Abel, Caín ël tsirla. Abel tö obeja
alöweke. Caín tö dalì kuatkeke.

³Kã et tã, Caín wã idali wöne,
ese kak mí mè Jehová a idalöioie.

⁴Etã Abel wã ie' icha mí ñies. Ie'
obeja tsã bua'buá, ese kak mí ie' wã
mè Jehová a. Abel ena ì méitö e'
wër buaë Jehová wa. ⁵Erë ie' kè wã
Caín ena ì méitö e' sune es, e' kuëki
Caín ulunekã taië, iwö yée suluë.

⁶E' kuëki Jehová tö Caín a ichaké:
“¿Íók be' ulune wö yée sulu? ⁷Be' tö
ì bua' úpa, e' ma be' jañuke tsuleë.
Erë ì sulu wamblébö, e' kuëki ì
sulu e' métër bër be' panuk namuie
e' alokã be' kî. Erë be' ké e' alökka
iki.”

⁸Kã et tã, Caín tö iël Abel kiémi
kañikã. Mik ie'pa demi kañikã,
etã eë Caín ñippékã iël tã etã iël
ttéwãitö. ⁹E' ukuöki tã bet, Jehová
tö Caín a ichaké:

—¿Wé be' ël Abel?

Caín tö iüté:

—Ye' kè wã ijcher. Ye' kè dör ie'
kkö'nukwak.

¹⁰Skëköl tö ie' a iché:

—¿Íók bö iwamblé es? Be' ël
ttéwãbö, e' pé tène taië íyök kî, e'
nuí tso' be' kî. E' kî ye' kawötã be'
we'ikök. ¹¹E' kuëki be' weirdäë
íyök kî wé be' tö be' ël pé tkö'wé, e'
kî be' yerattsayö. ¹²Be' kaneblömi
taië, erë kè wã wörpa buaë. Be'
kawötã shkök kã wa'ñe, kè a eno
tã' yës.

* 3.20 Eva: Hebreoie s'kiè e' wà kiane chë ttsë'ka.

* 4.1 Caín: Hebreoie s'kiè e' wà kiane chë ye' ulà a ide.

¹³Età ie' tò Jehová iuté:

—E' darërë ye' a. Kè ye' a idalë'ttsënu. ¹⁴I'ñe be' tò ye' uyéttsa ká i' kī, e' ukuöki ta ye' kawöta shkök ká wa'ñe kamië, kè a eno ta'. Be' kè ku'ia ye' ta, e' kuëki yi ye' kuëwa, ese tò ye' tterawa.

¹⁵Erë Jehová tò iuté:

—Yi be' ttéwa, ese kí weirdaë siarë taië iskéie.

Età Skëköl tò iwakyuée iwà kkachöie as yi tò ikuëwa, ese kè tò ittöwa. ¹⁶Età Caín e' yéttsa Jehová wörki ta imia ká kiè Nod ee, ká e' atë Edén diwö tskirke e' kke.

¹⁷Età Caín sené ilaköl ta. Iduneká ta ilà kune wák dör wëm, e' kiè Enoc. E' ukuöki ta Caín tò ká yué et, kiè mékaitö ilà kiè wa Enoc.

¹⁸Enoc dör Irad yé. Irad dör Mehujael yé. Mehujael dör Metusael yé. Metusael dör Lámece yé.

¹⁹Età Lámece senéwa alakölpa bö ta. Eköl kiè Adá, eköl kiè Silá. ²⁰Età Adá dë' aläë kiè Jabal. E' aleripa dör iyiwak alöukwakpa e' serke úla yöule datsi'tak wa ese a. ²¹Ie' èl kiè Jubal. E' aleripa dör ma'ma kicha ta' guitarra sù ena ma'ma pulë sù ese bla'ukwakpa. ²²Silá dë' aläë ñies kiè Tubal-Caín. E' aleripa dör tabechka kiè bronce ena hierro ese sté. E' kutà kiè Naamá.

²³Ká et ta Lámece tò iché ilakölpa a:

“A Adá, a Silá, ye' ttò ttsó:

Wëm eköl duladula tò ye' shkaö', e' kuëki ye' tò ikötwa.

²⁴Yi tò Caín ttéwa, e' tò iské tuëraë siarë,

erë yi tò ye' ttéwa, e' tò iské kí tuëraë jaishet shute.”

²⁵Adán alà skà kékane ilaköl ta wák wëm. Eva tò iché: “Skëköl tò ye' a alà ské mé eköl, Caín tò Abel kötwa, e' skéie.” E' kuëki ie' tò ikiè méka Set.*

²⁶Ñies Set de aläë wák wëm kiè mékaitö Enós. E' kéwö ska' ta s'ditsö tò Skëköl a iyi tsá ki'mi ena idalöie'mi ikiè Jehová e' wa.

Adán aleripa

5 ¹⁻²Mik Skëköl tò s'ditsö tsá yö', età iyuéitö wës ie' wák es. Ie'pa yuéitö wëm ena alaköl. Ie' er buaë ché ie'pa a. Ie' tò ie'pa yué, e' diwö shà ta ikiè mékaitö s'ditsö. I' dör Adán aleripa e'pa kiè.

³Mik Adán kí duas de cien eyök kí dabom mañayök (130), età ie' alà kune eköl, e' dör wës ie' wák es, ikiè mékaitö Set. ⁴E' ukuöki ta ie' kí seneia duas cien paryök (800). E' shua ie' ala'r kí kune wëpa ena alakölpa. ⁵Es ie' kí duas deka sera a cien suliyök kí dabom mañayök (930) età ie' blënewa.

⁶Mik Set kí duas de cien eyök kí skel (105), età ie' alà wëm kiè Enós, e' kune. ⁷E' ukuöki ta ie' kí seneia duas cien kuryök kí kul (807). E' shua ie' ala'r kí kune wëpa ena alakölpa. ⁸Es ie' kí duas deka sera a cien suliyök kí dabom eyök kí bök (912) ta iblënewa.

⁹Mik Enós kí duas de dabom suliyök (90), età ie' alà wëm kiè Cainán, e' kune. ¹⁰E' ukuöki ta ie' kí seneia duas cien paryök kí

* 4.25 Set: Hebreoie s'kiè e' wà kiane chè ie' tò imé.

dabom eyök kî skel (815). E' shua ie' ala'r kî kune wëpa ena alakölpa. ¹¹Es ie' kî duas deka seraä cien suliyök kî skel (905) ta iblënëwä.

¹²Mik Cainán kî duas de dabom kuryök (70), eta ie' alà wëm kiè Mahalalel, e' kune. ¹³E' ukuökî ta, ie' kî seneia duas cien paryök kî dabom tkëyök (840). E' shua ie' ala'r kî kune wëpa ena alakölpa. ¹⁴Es ie' kî duas deka seraä cien suliyök kî dabop (910) ta iblënëwä.

¹⁵Mik Mahalalel kî duas de dabom teryök kî skel (65), eta ie' alà wëm kiè Jéred, e' kune. ¹⁶E' ukuökî ta, ie' kî seneia duas cien paryök kî dabom mañayök (830). E' shua ie' ala'r kî kune wëpa ena alakölpa. ¹⁷Es ie' kî duas deka seraä cien paryök kî dabom suliyök kî skel (895) ta iblënëwä.

¹⁸Mik Jéred kî duas de cien eyök kî dabom teryök kî bök (162), eta ie' alà wëm kiè Enoc, e' kune. ¹⁹E' ukuökî ta, ie' kî seneia duas cien paryök (800). E' shua ie' ala'r kî kune wëpa ena alakölpa. ²⁰Es ie' kî duas deka seraä cien suliyök kî dabom teryök kî bök (962) ta iblënëwä.

²¹Mik Enoc kî duas de dabom teryök kî skel (65), eta ie' alà wëm kiè Matusalén, e' kune. ²²Ie' tö Skëköl ttò è dalöieke. Matusalén kune, eta ie' kî seneia duas cien mañayök (300). E' shua ie' ala'r kî

kune wëpa ena alakölpa. ²³Es ie' kî duas deka seraä cien mañayök kî dabom teryök kî skel (365). ²⁴Ie' sene' buaë Skëköl ta, e' kuëki kâ et ta Skëköl wä ie' mítser ttsë'ka, e' kuëki kè ie' ku'ia.

²⁵Mik Matusalén kî duas de cien eyök kî dabom paryök kî kul (187), eta ie' alà wëm kiè Lámec, e' kune. ²⁶E' ukuökî ta, ie' kî seneia duas cien kuryök kî dabom paryök kî bök (782). E' shua ie' ala'r kî kune wëpa ena alakölpa. ²⁷Es ie' kî duas deka seraä cien suliyök kî dabom teryök kî sulitu (969) ta iblënëwä.

²⁸Mik Lámec kî duas de cien eyök kî dabom paryök kî bök (182), eta ie' alà kune wëm. ²⁹E' kiè mékaitö Noé.* Mik ie' tö ilà kiè méka, eta ie' tö iché: “Jehová tö iyök suluo'wä. E' kuëki se' kawöta kanëblök darë-rë ikuatkoie; erë alà i' tö se' keraë enuk.” ³⁰Noé kune, e' itökî Lámec kî seneia duas cien skeyök kî dabom suliyök kî skel (595). E' shua ila'r kî kune wëpa alakölpa; ³¹Es ie' kî duas deka seraä cien kuryök kî dabom kuryök kî kul (777) ta iblënëwä.

³²Noé kî duas de cien skeyök, e' itökî ila'r kune mañal. Ikibi kiè Sem. Ishu ék kiè Cam. Ibata ék kiè Jafet.

S'ditsö ì sulu è wambleke këkraë

6 ¹⁻²Mik s'ditsö alönémi taië kâ i' kî, eta Skëköl ala'r*

* 5.29 Noé: Hebreoie s'kiè e' wà kiane chè enuk.

* 6.1 Skëköl ala'r: Kè s'wä ijcher mokî tö yi chéitö es. Wëlepa tö ibikeitsè tö e' dör Skëköl biyöchökwakpaie ö aknamaie erë Jesús tö iché tö esepa kè a senukwä s'ditsö ta (Marcos 12.25). Wëlepa skà tö ibikeitsè tö e' dör s'ditsö wësele ser suluë. Ì wambleke-rakitö ese kè wër buaë Skëköl wa, e' è jcher se' wä.

tö isuë tö s'ditsö alà busipa dör bua'buaala. E' kueki ie'pa tö busipa wa ie'pa wöbatse ese tsélur. ³Erë Jehová tö iché: “Ditsö dör duöta'wa ese wakpa. I'ñe ta ye' kè tö kawö mepaia ditsö a seno ká taië. Es iserdaë duas cien eyök ki dabom böyök (120), ekkë ulat.”

⁴Mik Skëköl ala'r bak senuk s'ditsö alà busipa ta alà koka ie'pa ta, eta e' késka' ta wëpa blubluë, kakkeë, esepa wëlepa bak ká i' ki. Ñies e' ukuöki wëpa esepa bakia. E'pa dör pë' darërë kkeauleka taië ia'chki ta ese.

⁵Jehová tö isuë tö s'ditsö tö i sulu è wambleke taië shute. I suluë è bikeitseke ie'pa tö kekraë. ⁶E' kueki Skëköl er a idalënene taië. Ie' tö ibikeitsé: “Kè yö ditsö yuöpa.” ⁷Eta ie' iché: “Ditsö yö' ye' tö ká i' ki, súyö e'pa ewëwa. Ñies iyiwak kos serke ká sí ki, e' ewerawayö. ¿Iie ye' tö ie'pa yö'?” ⁸Erë wëm tso' eköl kiè Noé, e' sueke Jehová tö er bua' wa.

Noé tö kanò bërie yué

⁹Ttè ikkë dör Noé pakè.

Noé dör wëm yësyësë Skëköl wörki. Kekraë ie' tö Skëköl ttò dalöieke buaë. Ie' eköl è serke wës Skëköl ki ikiane es. ¹⁰Ie' ala'r dör mañal wëpa kiè Sem, Cam, ena Jafet.

¹¹Skëköl wörki s'ditsö tso' e' wamblök sulu ème, ñippök taië shute. ¹²Ie' tö isuë tö taië iyi suluë è tso' iyök ki. ¹³E' kueki ie' tö Noé a iché: “Ye' tö ibikeitsétke tö ditsö kos tso' ká i' ki e' ewerawayö se. Ie'pa ñippöke taië shute ká i'

ki. E' kueki ye' tö ditsö kos tso' ká i' ki e' ewerawa seraä di' taië wa. ¹⁴E' kueki kanò yuó etò bërie kal bua'buwa ese wa, e' shu blató. Kanò wöar tso' ipamik, e' wötó kiöchka dalolo bötsböts ese wa u'rki ena ishüa as di' kè tköwäia. ¹⁵Kanò yuó batsí metro dökä cien eyök kí dabom mañayök kí skel (135 metros) ekkë. Ñies ishöló yuó metro dökä dabom böyök ki böt ki shaböts (22,5 metros) ekkë. E' sù ispé yuó metro dökä dabom eyök kí mañat kí shaböts (13,5 metros) ekkë. ¹⁶Kanò ki u yuókä, erë kanò kkò ki iulat múat metro shaböts. Kanò shu blató mañat kuö. Ñies iwékkö yuó et kanò spé mik shkowäie kanò a. ¹⁷Di' patkerayö iyi tso' ttsë'ka ká i' ki e' kos ewowa. Ekkë duörawa seraä ká wa'ñe. ¹⁸Erë ye' ttè meraë be' a tö be' tsatkeraëyö kanò a di' yöki. Be' ala'r ena be' alaköl ena be' yakpa, e'pa tsúmi e' ta kanò a. ¹⁹E' sù iyiwak kuä'ki kuä'ki tso' ká sí ki, e' iómi kanò a etò wë'ñe etò alaki as itsatkër wës be' es. ²⁰Iyiwak kos ió kanò a. Iyiwak kuä'ki kuä'ki urta', iyiwak uru, dò iyiwak e' kuke iski, e' kos iómi kanò a, etò wë'ñe etò alaki, as kè iduölur. ²¹Ñies chkè ulitane dapa'ú bló be' a ena iyiwak a katè.” ²²Eta ekkë kos wakanewé Noé tö se wës Skëköl tö iché ia es.

Di' bak taië ká i' ki

7 ¹⁻⁴E' ukuöki ta Jehová tö Noé a iché: “I'ñe kuiki ta ye' tö kalí patkeraë ká i' ki dökä ká dabom tkëyök (40) ñië nañeë. Ie' wa iyi ulitane yö' ye' tö tso' ttsë'ka ká sí

ki, e' kōs ewerawayō yēs! Erē ye' tō isuē tō ditsō ulitane shuā be' è serke buaē yēsyesē wēs ye' kī ikiane es. E' kuēkī be' e' iōkā kanò a be' yamipa kōs tā. Nies iyiwak batse'r* kōs ese tsūmi dōkā kuktō wē'ne kuktō alaki. Erē iyiwak kē dōr batse'r, ese tsūmi etō wē'ne etō alaki. E' sū nīes dū kuā'kī kuā'kī tsūmi dōkā kul wē'ne kul alaki as kē ierwa. Kōs ttē chéyō be' a, e' wakaneú es.” 5Etā e' kōs wakanewé Noé tō yēsyesē wēs Jehová tō ie' a iché es.

6Mik di' bak taiē ká i' kī, etā Noé kī duas tso' cien teryök (600). 7Ie' e' iéka kanò a ila'r ena ilaköl ena iyakpa e'pa kōs tā e' tsatkök di' alörke taiē e' yōkī. 8-9Iyiwak batse'r, e' sū iyiwak kē dōr batse'r, iyiwak e' kuke ibatsī' kī nīes dū, ekkē kōs dewā kanò a Noé tā bōlka bōlka wēs Skēköl tō iché iā es.

10Ká de kul, etā di' tō ká katémi-tke. 11Noé kī duas de cien teryök (600), kī si' et kī ká dabom eyök kī kul (17). E' diwō shā tā íyök tskirólone tā di' tso' idikīā e' deka taiē ká wa'ne. Nies ká jaishet kkōburolone tā di' biteshka taiē kalīie ká i' kī. 12Etā kalī yēne darērēē dōkā ká dabom tkēyök (40) nīē nañēē. 13Kalī yēnēmi, e' diwō shā tā Noé e' iéka kanò a ila'r tā. Ila'r kiē Sem, Cam ena Jafet. E' sū ilaköl, iyakpa mañal, e'pa e' iéka nīes ie' tā kanò a. 14Ie'pa tā iyiwak ulitane dewā kanò a, iyiwak uru, iyiwak kañiru, iyiwak e' kuke iski kī ena dū ulitane. Ekkē kōs dewā kanò a ie'pa

tā. 15Iyiwak kōs ekkē dewā kanò a bōlka bōlka. 16E' shuā imí wē'ne etō alaki etō, wēs Skēköl tō iché iā es. E' one yēs tā, Skēköl tō kanò wékkō wōtéwā.

17Etā kalī yēnēmiie dōkā ká dabom tkēyök (40). Wēs di' alör mirka es kanò batsemirkaitō. 18Es di' kī alōnēmi taiē tā kanò batsemirkaitō buaē. 19-20Es di' alōnekā taiē kabata kōs blubluē, e' tsatā jaishet dō metro kul ekkē. 21Es kōs íyī tso' ttsē'ka ká sí kī, ekkēpa duolur di' a se. Dū kōs, iyiwak uru kōs, iyiwak kañiru kōs, iyiwak e' kuke iski kōs, nīes s'ditsō ekkēpa kōs duolur yēs. 22I kōs tso' ká sí kī ttsē'ka, e' enewa se. 23Erē Noé ena i tso' ie' tā kanò a, e'pa è tsatkēne. Etā imalepa kōs e' enewa. Es nīes iyiwak ulitane ewéwa di' tō. Dū ulitane, iyiwak uru, iyiwak kañiru dō iyiwak e' kuke iski, ekkē kōs enewa seraā. 24Es di' atē íyök kī ká dōkā cien eyök kī dabom skeyök (150) ekkē.

Di' sinewane

8 1Erē Skēköl kē éna Noé chē'wa. Nies iyiwak ulitane tso' Noé tā kanò a e' kē chē'wa ie' éna. Ie' tō siwā' patké as itō di' siūwane ká wa'ne. Etā di' pasine-mine enaena. 2Íyök tskirólone e' wōtēnēne. Nies ká jaishet kkōburolone e' wōtērulunene. Etā kalī wōklōnewā kē yērku'ia. 3Di' tso'ia e' pasirmirne enaena. Ká de cien eyök kī dabom skeyök (150), etā di'

*7.1-4 *Iyiwak batse'r*: E' wà kiane chē iyiwak kē dōr nā ie'pa a. Se' welepa tō ichē iyiwak skítane.



Skëköl tō Noé tsatkée kanò a di' taiē e' yōkī. (Génesis 7.23)

sirmir ème. ⁴E' kī si' de teröl (6) diwö de dabom eyök kī kul (17), etā erpa kanò sinekā kábata kiè Ararat e' kī. ⁵Etā di' pasinemiie. Si' de dabop (10), e' tsá diwö, etā kábata kākkeē ese wēnemitke.

⁶E' kī ká de dabom tkëyök (40), etā Noé tō kanò wékkö tsitsir kköppée. ⁷Ie' tō dù ölö sū, e' émi et. Erë dù e' kè dē'iane kanò a ie' urke wışhwışh dò mik di' sine etā. ⁸E' ukuökī tā ie' tō nuböl émi et isuöie tō ká sinene. ⁹Erë di' tso'ia íyök kī, kām isirwā, e' kuekī nuböl dene kanò a. Kè ie' wā ká ulat poppo kune e' tkowā. Noé tō nuböl klö'wéwā ulà wa tā itséwaneitō kanò a.

¹⁰Ie' tō iskà pané dōkā ká kul, etā ie' tō nuböl skà émine. ¹¹Ká tui-nemitke tā nuböl dene, e' wā kal ulatska debitū ikà kī. Es Noé éna iane tō íyök kī sirmir. ¹²Ie' tō iskà pané dōkā ká kul, etā ie' tō nuböl skà émine. Nuböl e' kè dē'iane.

¹³Mik Noé kī duas tso' cien teryök kī et (601), etā íyök pasinene. Etā si' kewe, e' tsá diwö, ie' tō kanò kī u tso' e' kléttsā. Etā ie' isué tō íyök pasinene. ¹⁴Kawö de si' et kī diwö dabom böyök kī kul (27), etā ie' isué tō íyök pasinene sēraa. ¹⁵Etā Skëköl tō ie' a iché: ¹⁶“Be' e' yóttssā kanò a, be' alaköl tā, be' ala'r tā, be' yakpa tā ñies. ¹⁷Es iyyiwak ulitane yóurbö sē. Dù ena



I' dör ák katatëule ka'ie íyi ña'woie Skëköl a ese. (Génesis 8.20)

iyiwak uru ena iyiwak e' kuke iski
e' kos yólurbö kanò a, as imi' ká
wa'ñe alönuk tajë ká wà iökne.”

¹⁸Es Noé alaköl ena ila'r ena
iyakpa, e'pa e' yélur kanò a. ¹⁹Es
ñies iyiwak ulitane, uru ena kañiru
ena iyiwak e' kuke iski, ñies dù e'
kos e' yéttsa kanò a se. ²⁰E' ukuöki
ta ie' tó ák kataté ka'ie* et Jehovah
a. E' bata ki ie' tó iyiwak batse'r
ese jché ña'wéitö etö etö Jehovah
dalöioie. Ñies dù batse'r jchéitö
ña'wéitö Jehovah a etk etk. ²¹Mik
ishklé alar buaë, e' demi Jehovah
ska' ta ittséitö ta ibikeitséitö: “Eré
ditsö ià duladula döká kéchke, eta
ì sulu è bikeitsekeitö. Eré kè yö ká
sulu'wepawaia ie'pa kueki. Es ñies
kè yö ì kos tso' ttsë'ka e' ewëwaia
wes yö iewéwa es.

²² “Ká i' tso'ia,

eta dalì kuatkërmi, iwà
wörmi;
kaba tso', kase tso' ñies;
kalì tso', duas tso' ñies;
ká ñiwe tso', ká nañewe tso'
ñies.”

Skëköl Jehovah tó ittè mé Noé a

9 ¹Eta Skëköl er buaë ché Noé
a ñies ila'r a ta ichéitö ie'pa
a: “A' alönú tajë. Ká wa'ñe wà iöne
a' ala'r wa. ²Ditsö yöki iyiwak uli-
tane suardaë. Iyiwak ulitane urke
kashuk a ena iyiwak serke ká sí ki
ena iyiwak serke dayë a, e' kos ate
a' dikia. ³Iyiwak ulitane ena kalwö
ena kakö e' katèmi a' tó wé kiane a'
ki ese. E' kos méatyö a' a katanoie.
⁴Chkè ulitane katèmi a' tó, eré kè
ikatar ipé ta, se' serke s'pé mik e'
kueki. ⁵Se' serke s'pé mik, e' kueki
kè se' meneat ñi ttökwa, e' nuí ta'.

*8.20 Ák kataté ka'ie: E' wà kiane ché si'kuaie altar.

Yi tö eköl ttéwə, ese kichatërdaë. E' sù iyiwak wé tö s'ttéwə, ese kawötə ttéwə ñies. A' wé tö s'ttéwə, ese nuí patuëraëitö ye' a.

6 “Skëköl tö s'ditsö yö' wës ie' es, e' kuëkî yi tö se' ttéwə, ese wák kawötə' ttéwə wake'.

7 Erë a' alönú taië, ká wa'ñe wà iö ala'r wa.”

8 Ñies Skëköl tö iché Noé a ena ila'r a: 9-10 “I'ñe ye' ttè mukeat a' a ena iyiwak e' yéttsə kanò a a' ta, e' kəs a. 11 Mokîë ye' tö a' a ichè tö ye' kè tö ditsö ena iyiwak tso' ká wa'ñe, e' kəs ewepawaia di' wa. Di' kè döpaia ká wa'ñe sulu'ukwə wës itka es.” 12-13 Ye' tö shkaba' tkekear mò shuə iwà kkachoie a' a ena ditsö ulitane a tö ye' ttè méatyö a' a ena iyiwak kəs a kekraë. 14 Mik ye' tö mò patké ta e' shuə shkaba' tkëne e' wërmi, 15 etə ye' éna iane tö ye' ttè me'atbak a' a ena iyiwak kəs a tö kè ye' tö ditsö ena iyiwak ulitane ewepawaia di' wa. 16 Es mik shkaba' tkëne mò shuə e' suéyö, etə bet ye' éna idaə tö ye' ttè me'at ditsö a ena iyiwak kəs a michoë kekraë. 17 E' dör iwà kkachoie tö ye' ttè me'atbak ditsö ulitane a ñies iyiwak tso' ká i' kî e' kəs a.” Es Skëköl tö Noé a iché.

**Noé alà kiè Cam
e' kè wə iyé dalò ta'**

18 Noé ala'r e' yè'lur kanò a, e'pa kiè Sem, Cam ena Jafet. Cam dör Canaán yé. 19 E'pa mañal dör Noé ala'r. Ie'pa aleripa tö ká wà iéne.

20 Noé dalì kuatkëmi. E' shuə uva kuatkéitö. 21 Ká et ta ie' tö uva diö

shköshkö e' yé ta e' tö ie' ttéka taië. Ie' datsi' yéttsə ta ianewa iski sume iu a. 22 Cam dör Canaán yé, mik e' tö iyé sué sume, etə ie' mía ibiyó chök iëlpa bøl e'pa a. 23 Erë Sem ena Jafet e'pa kè éna iyé tər sume e' suak. E' kuëkî ie'pa tö datsi' klö'wéwə, imékarakitö e' o' bata-kî ta ie'pa shkëmi tsikka iwötrélur bānet dò wé iyé tər ee ta ipabakéwə datsi' e' wa.

24 Noé tté taië blo' tö e' tî'nekə. Mik ie' wə ijchenewə ilà tsirla ék kè wə ie' dalöiëne', 25 etə ichéitö:

“iAs Canaán kawö tkò suluë!
ile' weirdaë siarë shute klöu-
lewə iëlpa bøl e'pa kanè
mésoie!”

26 E' ukuökî ta ikî chéitö:

“iJehová dör Sem Këköl as e'
kîkarka!

As Canaán aleripa kanèblö Sem
aleripa a ikanè mésopaie.

27 As Skëköl kawö buaë mù Jafet
a as ie' alör michoë.

As Jafet ditséwöpa ser Sem
yamipa ska'.

As Canaán aleripa kanèblö ie' a
klöulewə ikanè mésopaie.”

28 Di' bak taië ká i' kî, e' ukuökî ta Noé sene'ia duas cien mañayök kî dabom skeyök (350). 29 Mik ie' blënewə, etə ie' kî duas tso' cien suliyök kî dabom skeyök (950).

I' dör Noé aleripa kiè

10 1 Noé ala'r kiè Sem, Cam ena Jafet. Di' bak taië e' ukuökî ta ie'pa wák ala'r kune. Ikkëpa dör Noé aleripa kiè.

²Jafet ala'r wëpa dör Gómer, Magog, Madai, Javán, Tubal, Mésec, ena Tirás. ³Gómer, e' ala'r wëpa dör Asquenaz, Rifat, ena Togarmá. ⁴Javán e' ala'r wëpa dör Elisá, Tarsis, Quitim ena Rodanim. ⁵E'pa kōs dör Jafet aleripa. Ie'pa ñi blatérak ulawa ulawa. Es iká yuéraitō tseë iwakpa a dayë kkōmik. Ittō kuā'kī kuā'kī iwakpamik.

⁶Cam ala'r wëpa dör Cus, Misraim, Fut, ena Canaán. ⁷Cus ala'r wëpa dör Sebá, Havilá, Sabtá, Raamá ena Sabtecá. Raamá ala'r wëpa dör Sebá ena Dedán. ⁸Cus dör wēm kiè Nimrod, e' yé. Nimrod de keweie blu' darërëë ká i' kī. ⁹Jehová ttō wa Nimrod dör yëria poë. E' kuekī ttē i' meneat se' a: “Be' dör yëria poë Skëköl ttō wa wēs Nimrod es.” ¹⁰Mik Nimrod bak ká kiè Sinar, e' wōkirie etā ká e' shuā ká tso' tkël kiè Babel, Érec, Acad, ena Calné. E' kōs dör ká bua'ie ese. ¹¹Wēm e' yéttsā Sinar a eköl kiè Asur. E' mīa ká bánet. Etā eē ie' ká yué tkël kiè Nínive, Rehobot-ir, Quélah ena Resen. ¹²Resen dör ká bërie. E' atē Nínive ena Quélah, e' shushā.

¹³Etā Misraim aleripa mīa ie'pa ikkē wakpaie: ludeowak, ana-meowak, lehabiwak, naftuhiwak, ¹⁴patruseowak, casluhítawak, ena caftoritawak. Filisteowak datse caftoritawak wa.

¹⁵Canaán dör Sidón yé. Sidón dör ie' alà tsá. Ie' alà skà kiè Het. ¹⁶Canaán aleripa mīa ie'pa ikkē wakpaie: jebuseowak, amorreowak, gergeseowak, ¹⁷heveowak, araceowak, sineowak, ¹⁸arvadeowak,

semareowak ena hamateowak. Ká taië tā e' wakpa kōs ñi blabatsérak ponemi ká kuā'kī kuā'kī. ¹⁹Canaán-wak ká atē ká kiè Sidón dōwā ká kiè Gaza. Gaza atē ká kiè Guerar e' kke. Nies ie'pa ká atē dōwā ká kiè Lesa diwō tskirke e' kke. Lesa atē ká tkël kiè Sodoma, Gomorra, Admá ena Seboím e' kke. ²⁰E' wakpa kōs dör Cam aleripa. Ie'pa ñi blabatsérak ulawa ulawa. Es iká yuéraitō tseë iwakpa a. Ittō kuā'kī kuā'kī iwakpamik.

²¹Nies Sem dē' alàë, e' dör Jafet ël kibi ék. Heber ala'r kōs dör Sem aleripa. ²²Sem ala'r dör Elam, Asur, Arfaxad, Lud ena Aram. ²³Aram ala'r dör Uz, Hul, Guéter ena Mas. ²⁴Arfaxad dör Sélah yé. Sélah dör Heber yé. ²⁵E' ukuōkī tā Heber alà de bōl. Eköl kiè Péleg. * E' kéwō ska' tā sulitane ñi blabatsérak, e' kuekī ikiè mékaitō es. Iëköl kiè Joctán. ²⁶Joctán ala'r dör Almodad, Sélef, Hasar-mávet, Jérah, ²⁷Hadoram, Uzal, Diclá, ²⁸Obal, Abimael, Sebá, ²⁹Ofir, Havilá, ena Jobab. E'pa kōs dör Joctán ala'r. ³⁰Ie'pa serke ká micho ká kiè Mesá tkörō ká kiè Sefar e' shūulat a. Sefar atē kabata a, wé diwō tskirke, e' kke. ³¹E' wakpa kōs dör Sem aleripa. Ie'pa ñi blabatsérak ulawa ulawa. Es iká yuéraitō tseë iwakpa a. Ittō kuā'kī kuā'kī iwakpamik.

³²Pē' kōs ekkēpa dör Noé aleripa kiè kitule wēs iditséwō kuā'kī kuā'kī ena wé iserke ká kuā'kī kuā'kī es. Di' bak taië, e' ukuōkī tā se' alōne-ne taië e' ñi blabatsérak ká wa'ñe.

* 10.25 Péleg: Hebreoie s'kiè e' wà kiane chè ñi blabatsè.

**Skëköl tö s'ditsö ké
ttök kua'ki kua'ki**

11 ¹Kuaë ta sulitane ttöke ttè etökicha è wa. ²Mik ie'pa míyaldak diwö tskirke, e' ëka, demirak kakkue kiè Sinar ee, etä ee ie'pa e' tséat senuk. ³Ká et ta ie'pa iché ñi a: “Mishkarak skauchka yuök blok sù, e' kukuèsö bö' a as imi'a darërëe u yuoie.” Es iwaka-newérakitö ák skéie. Ñies kiöchka dalolo bötsböts ese wa ibatsérakitö i tso' shutuule ese skéie. ⁴E' ukuöki ta iskà chénerakitö ñi a: “Mishkarak ká blublu yuök. E' shua u yuösö kakkeë döka ká jaì a. Es se' e' chömi buaë kèkëpa taië ena kè se' kawöta ñi blabatsök ká wa'ñe.”

⁵Erë Jehová e' éwa isaukrak tö ie'pa ká blublu yueke ena u kakkeë yuekerakitö. ⁶Etä ie' tö ibikeitsé: “Ie'pa dör ká etkè wak ena ittörak etkè ñies, e' kuëki ie'pa tö kanè i' kékami. E' ukuöki ta kè i a ie'pa wöklönuk. Ie'pa sèrmi wës ie'pa ki ikiane es. ⁷E' kuëki súyö ie'pa kè ttök kua'ki kua'ki as kè ñni ttö ania.”

⁸Es Jehová tö iblabatsérak ká wa'ñe. Eë ie'pa ká yué e' kané wöpanere. ⁹Ká e' ki Jehová tö ie'pa ké ttök kua'ki kua'ki ena iblabatsérakitö ká wa'ñe. E' kuëki ká e' kinewä Babel.*

Sem aleripa

¹⁰I' dör Sem aleripa kiè. Di' bak taië, e' ukuöki duas bök, e' kèwö ska' ta Sem ki duas tso' cien eyök (100). Etä ie' alà kune wëm kiè

Arfaxad. ¹¹Arfaxad kune, e' ukuöki Sem kí seneia duas deka cien skeyök (500), etä ie' ala'r skà kune wëpa ena alakölpa.

¹²Mik Arfaxad ki duas tso' dabom mañayök kí skel (35) etä ie' alà kune wëm, e' kiè Sélah. ¹³Sélah kune, e' ukuöki ta Arfaxad kí seneia duas cien tkëyök kí mañal (403), etä ie' ala'r skà kune wëpa ena alakölpa.

¹⁴Mik Sélah ki duas tso' dabom mañayök (30), etä ilà kune, e' kiè Heber. ¹⁵Heber kune, e' ukuöki ta Sélah kí seneia duas cien tkëyök kí mañal (403), etä ie' ala'r skà kune wëpa ena alakölpa.

¹⁶Mik Heber ki duas tso' dabom mañayök kí tkël (34), etä ilà kune, e' kiè Péleg. ¹⁷Péleg kune, e' ukuöki ta Heber kí seneia duas cien tkëyök kí dabom mañayök (430), etä ie' ala'r skà kune wëpa ena alakölpa.

¹⁸Mik Péleg ki duas tso' dabom mañayök (30), etä ilà kune, e' kiè Reú. ¹⁹Reú kune, e' ukuöki ta Péleg kí seneia duas cien böyök kí sulitu (209), etä ie' ala'r skà kune wëpa ena alakölpa.

²⁰Mik Reú ki duas tso' dabom mañayök kí bök (32), etä ilà kune, e' kiè Serug. ²¹Serug kune, e' ukuöki ta Reú kí seneia duas cien böyök kí kul (207), etä ie' ala'r skà kune wëpa ena alakölpa.

²²Mik Serug ki duas tso' dabom mañayök (30), etä ilà kune, e' kiè Nahor. ²³Nahor kune, e' ukuöki ta Serug kí seneia duas cien böyök (200), etä ie' ala'r skà kune wëpa ena alakölpa.

* 11.9 Babel: Hebreoie s'kiè e' wà kiane chè *chilineka*.

²⁴Mik Nahor k_i duas tso' dabom böyök k_i sul_itu (29), etä ilà k_{une}, e' kiè Térah. ²⁵Térah k_{une}, e' ukuök_i t_a Nahor k_i senei_a duas cien eyök k_i dabom eyök k_i sul_itu (119), etä ie' ala'r skà k_{une} wëpa ena alakölpa.

²⁶Mik Térah k_i duas tso' dabom kuryök (70), e' ukuök_i t_a ie' ala'r k_{une} mañal. Ala'r e'pa kiè Abram, Nahor ena Harán.

Térah ala'r

²⁷E'pa dör Térah ala'r. Térah dör Abram, Nahor ena Harán, e'pa yé. Harán, e' dör Lot yé. ²⁸Harán blënewa kewe iyé Térah e' yöki k_a kiè Ur ee. K_a e' atë Caldea. Ie' blënewa wé ie' k_{une} ee.

²⁹Abram senéwa alaköl kiè Sarai, e' t_a. Nahor senéwa alaköl kiè Milcá, e' t_a. Milcá dör Harán alà busi ena Iscá kutà. ³⁰Sarai kè döt_a alàè.

³¹Térah e' yéttsa Ur, dör caldea-wak k_a e' a. Ie' alà Abram ena itala kiè Lot dör Harán alà ena iyäk kiè Sarai e'pa m_ia ie' t_a. Warma ie'pa m_irö dök_a k_a kiè Canaán ee, erë ie'pa demi k_a kiè Harán, etä ee ie'pa e' tséat senuk. ³²Eé Térah blënewa. Ie' k_i duas tso' cien böyök k_i skel (205).

Jehová tté Abram t_a

12 ¹Mik Abram bak senuk k_a kiè Ur ee, etä Jehová tö ie' a iyè': "Be' k_a ena be' ditséwöpa ena be' yé yamipa, e' múat t_a be' yúshka senuk, k_a kkachekeyö be' a ee. ²K_a e' k_i ye' tö be' aleripa alöwëraë taië. Ie'pa döraë k_a taië wakpaie. Ye' er buaë chöraë be'

a. Ye' tö pë' taië keraë be' kkeö-kka taië. Nies be' er buaë chöraë pë' taië a. ³Wépa er buaë ché be' a, esepa a ye' er bua' chöraë. Wépa tö alibché be' k_i, esepa we'ikerayö. Be' batamik ye' er buaë chöraë k_a ulitane wakpa a."

⁴Etä Abram e' yéttsa k_a kiè Harán wës Jehová tö ie' a iyè' es. E' këska' t_a ie' k_i duas tso' dabom kuryök k_i skel (75). Ie' m_ia Canaán. ⁵Etä ie' w_a iyamipa mítser sëraa. Ilaköl kiè Sarai ena ilayök kiè Lot ena iyi ulitane tso'rak iw_a, ekkë k_{os} mítserak iw_a. Nies Harán wakpa welepa tso' ie' w_a kanè mésoie, e' mítser ie' w_a. Mik ie' demi Canaán, ⁶etä ie' tkami k_a k_{os} ekkë dõmi k_a kiè Siquem atë Canaán ee. Eé k_a atë kiè Moré. Eé kós klò àr elka. Canaánwakpa a k_a e' dör k_a dalöiërt_a ese. (E' kéwö ska' t_a Canaánwakpa sërkei_a ee.) ⁷Etä ee Jehová e' kkaché Abram a t_a ichéitö i_a: "K_a i' meraëyö be' ditséwö a."

Etä Abram tö ák kataté ka'ie et iyiwak jchoie Jehová dalöioie ee Jehová e' kkayë' ie' a e' kuëki. ⁸E' ukuök_i t_a im_ia k_a dör kabataie atë Betel diwö tskirke e' ëk_a. Etä ee ie' sené ekuölö. K_a e' atë Betel ena k_a kiè Ai e' shuulat a. Eé ie' tö ák skà kataténe et. Eé ie' tö Jehová dalöié. ⁹E' ukuök_i t_a Abram m_ia enaena Négueb kke.

Abram m_ia Egipto

¹⁰E' kéwö ska' t_a ketba tkënewa poë k_a e' k_i. Kè ì t_a katè wé Abram sërke ee. E' kuëki ie' m_ia Egipto senuk ekuölö. ¹¹Abram dökemitke

Egipto etā ilaköl Sarai, e' a ichéitö: “Ye' ttò ttsó. Ye' wā ijcher buaë tö be' dör buaala. ¹²Mik Egipto wakpa tö be' sué tö be' dör buaala, etā ie'pa tö ichèmi: ‘Wì dör wëm wì alaköl.’ Etā ye' tterawā ie'pa tö be' kuëkì erë ie'pa be' meraat senukwā ie'pa tā. ¹³E' kuëkì, be' we'ikèyö, ichö ie'pa a tö ye' dör be' akë as kè itö ye' ttöwā be' kuëkì as ye' kawö tkò buaë.”

¹⁴Mik Abram demi Egipto, etā Egipto wakpa isuë tö Sarai dör alaköl buaala. ¹⁵Kā e' blú kuëblupa tö isuë ñies tö Sarai dör alaköl buaala. E' kuëkì ie'pa mīa ichök blu' a tö alaköl e' dör buaala. Etā imítserak iwā blu' wé a.

¹⁶Etā Egipto blú tö Abram kkö'né buaë Sarai dalërmik. Taië ie' tö Abram a iyiwak uru kakmé. Obeja, baka, burro ena kameio e' kakméitö ie' a. Se' ñies kakméitö ie' a kanè mésoie wëpa ena alakölpa. ¹⁷Erë Sarai kuëkì Jehová tö Egipto blú ena iyamipa we'iké taië. Duë mékā taië ie'pa kì. Kawö darërëë mékāitö ie'pa kì. ¹⁸E' kuëkì Egipto blú tö Abram tsuk patké tā ichéitö iā: “¿Iók bö iwamblé ye' tā es? ¿Ì kuëkì be' kè wā ye' a iyëne tö alaköl i' dör be' alaköl? ¹⁹Be' tö ye' a iyë' tö ie' dör be' kutà. E' kuëkì tsir etā ye' senéwā ie' tā. I' be' alaköl, itsúmine tā be' yúshka.” ²⁰Etā Egipto blú tö ishkëkipa patké Abram yöktsā kā e' kì ilaköl tā ena i kōs tso' ie' wā ekkëpa tā.

Abram ena Lot ñi blabatsélor

13 ¹E' ukuökì tā Abram ena ilaköl e' yélur Egipto mīane Négueb. Ie' iyi kōs mítserak iwā sēraā. Ie' alayök Lot e' mīa ie'pa

tā ñies. ²Abram dör iyi blu' taië. Ie' wā oro tso'. Ie' wā inuköl tso' taië. Ñies ie' wā iyiwak tso' taië. ³Négueb eë tā ie' mīane enaena dō Betel. Betel eë tā ie' mīane tkörö wé ie' bak senuk kewe eë. Kā e' atē Betel ena Ai e' ulat shushā. ⁴Kā e' a ie' wā ák katatëulebak ka'ie, eë ie' tö Jehová dalöiéne.

⁵Lot dör ñies iyi blú taië wēs iyëla Abram es. Iyiwak tso' taië ie' wā obeja ena baka. Se' tso' ie' wā ñies kanè mésopaie. ⁶Erë wé ie'pa serke kā e' kì kākō kè ku'ia ie'pa iyiwak kōs a katè. Ie'pa kè chë'kaia ñi o'mik. ⁷Abram ena Lot e'pa iyiwak kkö'nukwakpa ñippöke, ñi wöñatköke. Ñies pë' tso'tke kenet kā e' kì. E' wakpa dör canaánwak ena fereoseowak. ⁸Kā et tā Abram tö iché Lot a: “Se' dör ñi yami. Kè imène buaë tö se' ñippò. Ñies se' iyiwak kkö'nukwakpa ñippöke ème e' kè dör buaë. ⁹Kā saú wì kā bua' tso'. Be' ishushtó wéne wa be' wöbatse, e' a be' yúshka. Be' mí wì ëkā, e' tā ye' mí dià ëkā. Etā be' mí dià ëkā, e' tā ye' mí wì ëkā.”

¹⁰Etā Lot kā kì sué kamië, etā kōs di' kiè Jordán, e' kkömik kā buaë tso', e' kì sué ie' tö. Etā ie' tö isuë tö kā e' dör buaë dō kā kiè Sóar eë. Buaë di' tso' wēs kā buaë yö' Jehová tö es ena wēs Egipto es. (E' kéwö ska' tā kām Jehová tö kā kiè Sodoma ena kā kiè Gomorra, e' böt eüwa.) ¹¹Etā kakkue tso' Jordán di' kkömik e' shushaté Lot tö, etā e' wa ie' mīa. Es ie'pa ñi blabatsélor. ¹²Abram e' tséat senuk Canaán. Lot mīa senuk Jordán kakkue kì, eë kā tso' tseë. Ie' sené tsinet kā kiè

Sodoma e' o'mik. ¹³Sodoma wakpa, serke suluë. Ie'pa i sulu è wamble-ke kekraë Jehová wöa.

¹⁴Lot mía e' ukuöki ta, Jehová tö iché Abram a: "Wé be' tso' ee ká kí saú bua'ie shkit wöwí wöia dià ëka jaì ëka ká wa'ñe tö ìis idör? ¹⁵Ká kos kí suébö, e' meraëyö be' a ena be' aleripa a kekraë. ¹⁶Ye' tö be' aleripa alöweraë taië wes íyök po taië es. Wes íyök po kè shtarpa' es be' aleripa alördaë kè ishtarpa yi a. ¹⁷Ká i' kos meraëyö be' a. E' kueki be' yú iweblök seraä."

¹⁸Etä Abram e' yéttsa ta imía senuk kós klö wökir àr taië dör wëm kiè Mamré e' icha ee. E' ate tsinet ká kiè Hebrón ee. Eë Abram tö ák skà kataté ka'ie Jehová dalöioie.

Abram tö ilayök Lot, e' tsatké

14 ¹E' kéwö ska' ta blu'pa tso' tkël. Eköl kiè Amrafel, e' dör ká kiè Sinar, e' blú. Iëköl kiè Arioc, e' dör ká kiè Elasar, e' blú. Iëköl skà kiè Quedorlaómer, e' dör ká kiè Elam, e' blú. Etä ibata ék kiè Tidal, e' dör ká kiè Goím, e' blú. ²Blu'pa skà tso' döka skel e' eköl kiè Bera, e' dör ká kiè Sodoma, e' blú. Iëköl kiè Birsá, e' dör ká kiè Gomorra, e' blú. Iëköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekkë e' dör ká kiè Bela, e' blú. Ká e' kiè Sóar ñies. E' kéwö ska' ta blu'pa döka tkël ñe' e' kéka ñippök blu'pa skà döka skel ñe' ta. ³Blu'pa skel e'pa tö inippök wakpa dapa'wé ek tsiní ñippök blu'pa tkël e'pa ta kakkue kiè Sidim ee.

Eë dayë wölö me'r bërie kiè Mar Muerto.

⁴Blu'pa döka skel e'pa bak senuk iwakpa ta döka duas dabom eyök kí bök (12), blu' kiè Quedorlaómer, e' dikia. Mik e' kí duas de dabom eyök kí mañal (13) etä ie'pa kè éna Quedorlaómer ttè dalöiakia. Ie'pa e' kakka ñippök ie' ta. ⁵E' kí duas de ek etä Quedorlaómer e' yéttsa mía ñippök ibolökpa ta. Blu'pa döka mañal dör ie' klépa, e' míyal ie' ta ñippök. Ie'pa mía ká kiè Astarot Carnaim ta ee ie'pa e' aléka refaítawak kí. E' ukuöki ta ie'pa e' aléka zuzitawak kí, ká kiè Ham ee. E' ukuöki ta ie'pa e' aléka emiwak kí, e' wakpa ká kiè Savé-quiriataim. ⁶E' ukuöki ie'pa e' aléka horeowak kí kabata kiè Seír ee. Etä itötiémi ie'pa tö dò tkörö ká kiè El-parán ee. Ká e' ate ká sir poë, e' kkömik. ⁷Etä ee ie'pa bitene itò wane dò ká kiè En-mispat. Ká e' kiè Cadés ñies. Ie'pa e' aléka Amalec aleripa kí ta iká klö'wéwarakitö. Ñies ie'pa e' aléka amorreowak kí. E' wakpa ká kiè Hasesón-tamar. E' ukuöki ta ie'pa mi'ke ñippök blu'pa skel ta. E' kueki blu'pa skel e' dapa'wéka Sidim kékkue kí blu'pa tkël kinuk ñippoie.

⁸⁻⁹Etä Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skel ekkëpa ñi dapa'wéka Sidim kékkue kí ñippoie, Quedorlaómer, e' dör Elam blu', e' ta ena blu'pa tso' ie' ta e'pa ta ñies. Blu'pa e'pa dör Tidal, e' dör Goím blu'. Iëköl dör Amrafel, e' dör Sinar blu'. Bata ék dör Arioc, e' dör

Elasar blu'. Es blu'pa tkël míyal ñippök blu'pa skël tã. ¹⁰E' kěwō ska' tã Sidim kěkkue kḭ kiöchka dalolo bötsböts ese dapé tso' taië. Mik Sodoma wakpa ena Gomorra wakpa tkayal ñippè yökḭ etã ie'pa shäböts anemi kiöchka dapé tso' taië ese a. Imalepa tkayalmi kabata shuã.

¹¹Es blu'pa dōkã tkël e'pa e' aléka blu'pa skël kḭ. Etã ie'pa tō chkewō ena íyi bua'buatso' Sodoma ena Gomorra e' kōs klō'wēwarakitō tã iponemirak. ¹²E' kěwō ska' tã Abram alayök Lot serke Sodoma. E' mítserak iwã, es ie' dalì kōs e' mítserak iwã ñies.

¹³Etã ñippè shuã wēm tka-shkar eköl, e' wã ibiyō mí Abram a. Abram e' dör hebreowak. Ie' serke tsinet wēm kiè Mamré dör amorreowak e' kōs klō wōkir àr eē. Mamré dör Escol ena Aner èl. Ie'pa wa Abram wër buaë.

¹⁴Mik Abram tō ibiyō ttsé, etã ie' kanè mésopa kune ie' u a, e'pa dapa'wéitō dōkã cien mañayök kḭ dabom eyök kḭ pāköl (318) ilayök tsatkoie. Etã ie'pa míyal blu'pa tkël itökḭ dōkã kã kiè Dan eē. ¹⁵Etã nañewe ie'pa demi me'ie ñippémiie blu'pa tã. Etã ie'pa tō blu'pa tōiēmi tkörō kã kiè Hobá eē. Hobá atē kã kiè Damasco e' wōwí. ¹⁶Etã ì kōs minetser blu'pa wã, e' kōs yélur ie'pa tō blu'pa ulà a. Es Abram tō ilayök Lot e' tsatkée. Ñies ì tso' ilayök wã e' kōs dene iulà a. Ñies alakölpa ena pē' malepa tso' klōulewã e'pa kōs tsatkée ie' tō.

Melquisedec er buaë ché Abram a

¹⁷Mik Abram e' aléka Que-dorlaómer kḭ, e' sù blu'pa mañal shkōke ie' tã, e'pa kḭ. E' ukuō-kḭ tã ie' bitēne de Savé kěkkue kḭ. Kakkue e' kiè ñies Blu' Kěkkue. Etã eē Sodoma blú de ie' ñaletsuk ie' shke'uk. ¹⁸Ñies kã kiè Salem, e' blú kiè Melquisedec, e' dör Skëköl dör íyi ulitane tsatã e' sacerdote. Ie' tō pan ena vino yéttsã. ¹⁹Etã ie' er buaë ché Abram a ttè i' wa:

“Skëköl dör íyi ulitane tsatã, e' tō kã jaì ena kã i' yō'.

Ie' tō be' kìmè as be' kawō tkò buaë kekraë.

²⁰Ie' dör íyi ulitane tsatã, e' kḭkōkasō.

Ie' tō be' kímé e' alökka be' bolökpa kḭ, e' kuekḭ ikḭkōkasō.”

Etã íyi kōs de Abram ulà a ñippè shuã, e' mú blatèsō dōkã dabop tã e' tsã eyök yéttsaitō méitō Melquisedec a Skëköl dalōioie. ²¹E' ukuōkḭ tã Sodoma blu' tō iché Abram a:

—Sa' yamipa tsatkée be' tō, e'pa mune ye' a. Erë dalì kōs e' tsúmi be' tō be' a.

²²Erë Abram tō iüté:

—Au. Jehová dör Skëköl íyi ulitane tsatã, e' tō kã jaì ena kã i' yō', ie' a ye' kablétke ²³tō ì kōs dör be' icha, e' kè tsepaatyō yēs. Dò be' datsi'takla ö be' klökkuö kicha kè tsepaatyō etkla wē'ia as kè be' ichò tō be' íyi wa ye' blune. ²⁴Kè ì kiane ye' kḭ ye' wák a. Chkò kōs ñétke ye' kanè mésopa tō, e'

è dör wë' ye' a. Erë wëpa dare ye' ta ñippök bulu'pa ta kiè Aner ena Escol ena Mamré, as ie'pa wä dali kakmi' kos ikawötä tsukmi eköl eköl ekkë.

Jehová tö ittè mé Abram a

15 ¹E' ukuöki ta Jehová ttë Abram ta kabsueie, etä ichéitö ia:

—A Abram, kè be' suanuk. Ye' dör be' tsatkökwak. Íyi buaë merayö be' a taië shütë.

²⁻³Erë Abram tö iiüté:

—A Skëköl, ye' wák alà kè ta', e' kuëki ì kos memibö ye' a e' kè dör ìie bua' ye' a. Ye' íyi kos atdaë ye' kanè méso kiè Eliézer dör Damasco wak e' ulà a. Erë ie' dör o'ka.

⁴Etä Jehová tö iiüté:

—Be' wák alà kurdaë, e' kè dör o'ka.

⁵Etä Jehová wä Abram mítser u'rki, ta ichéitö ia:

—Ká saú buaë siwä' ki. Bëkwö saú ta ishta'ú. ¿Be' a ishtarmi? E'ma bua', es be' aleripa alördaë taië.

⁶Etä Abram erblé Jehová mik, e' kuëki iklö'wëitö wës pë' buaë yësyësë es.

⁷Etä ichéitö ia:

—Ye' dör Jehová. Ye' tö be' yë'ttsa caldeawak ká kiè Ur e' a ká i' moie be' a ena be' aleripa kos a.

⁸Etä Abram ie' a ichaké:

—A Skëköl, ¿wës e' jchermi ye' wä yësyësë tö ká i' dõmi ye' ulà a?

⁹Jehová tö iiüté:

—Baka ena chibo ena obeja e' kos ki duas tso' mañal, ese tsúbitu

ña etö etö. Ñies nuböl et ena ipupu-la et, e' tsúbitu ña.

¹⁰Etä Abram wä iyiwak kos ekkë debitu Jehová a. Etä ie' tö iyiwak e' ttélur télor shushaë. Shaböts méwaitö wí wa shaböts méwaitö i' wa. Es iatë ñi wöshaë. Erë dù kè ténane ie' wä es.

¹¹Etä öló dettsa iyiwak chkà dalër-mik, erë Abram tö ibukueke chkè ki.

¹²Ká tuinemitke, etä Abram kapowä taië. E' bet Abram pamik ká mía ttsetseë shütë se' suawë ekkë.

¹³Etä Jehová tö iché ia:

—Be' wä ijchenú buaë tö be' aleripa serdaë ká kuä'ki ki wës ká kuä'ki wakpa es. Eë ie'pa klördawä kanè mésopaie kè patuëta'. Ie'pa weirdaë dökä duas cien tkëyök (400), ekkë ulatök. ¹⁴Erë ká wë wakpa tö ie'pa we'ikera, e' wakpa ské we'ikerayö siarë. E' ukuöki ta be' aleripa yërdattsä ká e' a. Ie'pa wä iyi bua'buä tuë darë-rëë ese miraë taië iwákpa a. ¹⁵Etä mik be' kënewä etä be' duöwami buaë, kè weir ta'. Es be' michoë be' dëütöpa itöki. ¹⁶Etä mik be' aleripa tso' ká kuä'ki ñe' a e'pa de dökä tkëtökicha, etä ie'pa dörane ká i' ki. Ká i' wakpa, kiè amorreowak, kam e'pa tö ì sulu wamblö dö wë' ishuloie. E' kuëki be' aleripa kè döpane ká i' ki bet.

¹⁷Kātuine de kamië, etä ì dettsa tabechka ukuöie, e' shüa shkle batröke taië. Ñies kuàtak sí wöñar-ke taië ese dettsa ta itkami iyiwak chkà blatëule tkëter eë, e' shusha.

¹⁸Etä Jehová tö ttë mé Abram a i' es:

—Ká i' meraëyö be' aleripa a. Di' kiè Egipto dí* eemi dökä di'

* 15.18 Egipto dí: E' kè dör di' bérie tso' Egipto kiè Nilo e'. E' dör di' tsitsirla tso' Egipto ena Canaán e' shusha.

kibi kiè Éufrates, ká ekkè kòs meraëyö be' aleripa a. ¹⁹Iñe ta ká e' dör quenitawak, quenizitawak, cadmoneowak, ²⁰hititawak, fere-seowak, refaitawak, ²¹amorreowak, canaánwak, gergeseowak ena jebu-seowak e'pa kòs wakpa ká.

Abram alà kune kiè Ismael

16 ¹Abram alaköl Sarai, e' kè döta' aläë. Ie' wä alaköl tkër eköl kanè mésoie kiè Agar. E' dör egiptowak. ²Etä Sarai tö iché Abram a:

—Isaü tö Jehovah kè wä ye' a alà mène. E' kueki be' senú ye' kanè méso Agar ta. Etä isalema ie' batamik alà dòmi ye' ulà a.

Etä Abram tö Sarai ttò iüté. ³Etä Sarai tö egiptowak tso' ie' wä kanè mésoie, e' tsébitu, mé iwëm a alakölie. E' kéwö ska' ta ie'pa sené Canaán e' kī duas de dabop. ⁴Etä Abram senéwä Agar ta, etä Agar dunekā. Mik ie' isué tö ie' dunekā, etä ie' tö iwökir Sarai suémi suluë. ⁵Etä Sarai tö iché Abram a:

—iBe' iane iwiie tö Agar tö ye' sueke suluë! Ye' wák tö be' a Agar me' alakölie i' ta idurtke e' wä kurdaë, etä ie' e' ttsöke jaishet ye' tsata. iAs Jehovah tö se' a ichò tö yi iane iwiie, ye' ö be'!

⁶Etä Abram tö iüté:

—Ye' ttò ttsó, be' kanè méso tso' be' ulà a. Be' iü wës be' éna iwak es.

E' ukuökj ta Sarai tö ikanè méso we'ikémi taië. E' kueki Agar tka-shkar. ⁷Etä Jehovah biyöchökwak

bua'ie, e' tö ikué di' tum o'mik ká wé kè yi ku' ese ska'. Di' tum e' tso' ñala micho ká kiè Sur e' kkömik.

⁸Etä Jehovah biyöchökwak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iüté:

—Ye' tkashkar ye' wökir Sarai yöki.

⁹Etä ie' iché ia:

—Be' dakóne be' wökir ska' ta idalöiö bèrè.

¹⁰Ie' tö ikí ché ia:

“Ye' be' aleripa alöweraë taië.

Kè yi a ishtanuk ekkè.

¹¹Be' eriarke, e' ttsé Jehovah tö, e' kueki se be' dur, e' wä kune, ta ikiè múkabö Ismael.*

¹²Be' alà döraë wës burro pupula kè urutërta' es.

Ie' ñippöraë darërè sulitane ta. Nies sulitane ñippöraë ie' ta.”

Ie' serdaë kekraë ñippök ielpa ta.

¹³Jehová tté Agar ta, e' ukuökj ta Agar tö iché: “Skököl ye' sué, e' wák suéwayö.” E' kueki ie' tö Skököl kié i' es: “Skököl tö ye' sué e'.” ¹⁴E' kueki ñies di' tum e' kiè mékaitö: “Skököl tso' e' ye' sueke”. Di' tum e' tso' Cadés ena Béred e' shushaë.

¹⁵E' ukuökj ta Abram alà kéka Agar ta e' wä kune wák wëm. Abram tö ikiè méka Ismael. ¹⁶Ismael kune, e' kéwö ska' ta Abram kī duas tso' dabom paryök kī teröl (86).

* 16.11 *Ismael*: Hebreoie s'kiè e' wä kiane chè *Skököl tö ittsé*.

**Jehová tò ittè mé Abraham
a, e' wà kkacho méatitò**

17 ¹Mik Abram kī duas tso' dabom suliyök kī sulitu (99), etā Jehová e' kkaché ie' a tā iché iā:

—Ye' dör Skëköl Diché Tā' İyi Uli-tane Tsatā e'. Be' senú yësyësë ye' wörkī kekraë, ²e' tā ye' ttè meraë be' a tò be' aleripa alördaë taië be' itöki.

³Etā ie' e' téwā iski iwötsā méwā iyök kī. E' dalewa Skëköl tso' ttök ie' tā, tā ichéitö iā:

⁴—Ye' ttè meke be' a e' dör i' es: Be' döraë ká taië wakpa yéie. ⁵E' kuëki i'ñe tā be' kè kiëiā Abram. Ye' tò be' tkéka ká taië wakpa yéie, e' kuëki be' kië mékayö Abraham.* ⁶Ye' tò be' aleripa alöwëraë taië. Ie'pa döraë blu'paie ena ká taië wakpaie. ⁷Kekraë ye' dör be' Këköl ñies be' aleripa Këköl. Kawö e' mekeyö be' a. ⁸I'ñe tā be' serke Canaán, ká e' kōs meraëyö be' a ena be' aleripa a. E' atë ie'pa ulā a kekraë. Ye' dör ie'pa Këköl.

⁹Skëköl tò iskà chéne Abraham a:

—Erë be' ena be' aleripa kōs e' kawötā ttè muk ye' a ñies. ¹⁰E' dör i' es: A' wëpa kōs kawötā itóttola kkuölitla tök tsir. ¹¹E' kuëki a' wëpa kōs e' wakyú es. E' tò ikkacheraë tò se' ttè me' ñi a. ¹²Kekraë kōs a' ala'r kūrke

wëpa, ñies a' kanè mësopa ala'r wëpa, mik e' kī ká de pāköl, etā a' kawötā iwakyuök es. ¹³A' kawötā iük kröröë ala'r kōs kūrke a' u a ekkëpa tā. Es ttè me'tkeyö a' a, e' atë wakyöule a' chkà kī kekraë. ¹⁴Wëm kè wakyöule, ese kè wā ye' ttò dalöiëne, e' kuëki kè ikawö tā'iā senuk a' shuā.

¹⁵Ñies Skëköl tò iché Abraham a:

—Be' alaköl kè kiëiā Sarai. I'ñe tā ikirdaë Sara.* ¹⁶Ye' er buaë chöraë ie' a as ie' alà kōka be' a. Moki ye' er buaë chöraë ie' a. Ie' döraë ká taië wakpa mīe. Ñies ie' aleripa shu döraë blu'paie.

¹⁷Abraham skà e' téwane iski iwötsā méwāitö iyök kī. E' dalewa ijañéka tā ibikeitséitö: “¿Ye' kī duas tso' cien eyök (100), wës e' dōmi yéie? ¿Sara kī duas tso' dabom suliyök (90), etā wës ie' dōmi alàè?”

¹⁸Erë ie' tò iché Skëköl a:

—iBe' mú er buaë chò Ismael a!

¹⁹Erë Skëköl tò iiüté:

—Au, e' kè dör es. Be' alaköl Sara, e' döraë alàë tā ikië múkabö Isaac. Ttè me'yö be' a e' è meraneyö ie' a ena ie' aleripa a kekraë. ²⁰Kè ye' éna Ismael chë'wa. Ye' tò ie' kimeräë ñies. Ye' tò ie' ala'r alöwëraë taië as ileripa dò taië ká i' kī. Ismael döraë s'blu'pa dōka dabom eyök kī bōl e'pa yéie. Ie' aleripa alördaë taië. ²¹Erë ttè me'tkeyö be' a e' atdaë be' alà kūrdaë kië Isaac e' a. Be' alà e' kera-ka Sara tò duas iëk wa kawö ikkë tā.

* 17.5 Abraham: Hebreoie s'kië e' wà kiane chè ká wakpa taië, e' yé.

* 17.15 Sarai: Erë s'kië e' ena Sara ttsër bërë kuä'kī, erë iwà dör ñies. Iwà kiane chè blu' alà busi ö alaköl dalöiërtg' taië ese. Skëköl tò ie' kië mane'wé es iwà kkachoie tò ttè mène Abraham a e' wà döraë ie' kī ñies.

²²Mik Skëköl tté one Abraham ta, ta imía. ²³E' wöshaë Abraham tö ilà Ismael e' tottola kkuölitla téé tsir. Ñies ie' wa kanè mésopa tso' kune ie' u a ena wëpa toule ese, e'pa kos tottola kkuölitla tééitö tsir wës Skëköl tö iyë'ia es. ²⁴⁻²⁵Mik Abraham kî duas tso' dabom suliyök kî sulitu (99) ena ilà kî itso' dabom eyök kî mañal (13) etä ie'pa tottola kkuölitla tëne tsir.

²⁶⁻²⁷Es e' diwö è wa Abraham ena ilà tottola kkuölitla tëne tsir. Ñies wëpa dör ie' kanè mésopa, e'pa kos tottola kkuölitla tëne tsir.

**Jehová tö iché Abraham
a tö alà meraëyö be' a**

18 ¹Kä et dibata a ta Abraham tkër ie' ukkô a. Ie' u tso' wë wëm kiè Mamré e' kôs klö wökir àr eë. Ie' tkër eë etä Jehová e' kkaché ie' a. ²E' wà pakè i' es: Abraham wökéka ta ie' isuë tö wëpa de iëter ie' wörki mañal. E' suë ie' tö ta bet ie' e' kéka, mía ie'pa ñalëtsuk ta ie' e' téwa iski ta iwötsa méwa íyök kî ie'pa shké'woie. ³Ie' tö iché:

—A këkëpa, be' we'ikèyö, kè be' minuk bet. ⁴Ye' mi' di' tsuk a' klö skuoie, e' ukuökî ta a' enú bèrë kal i' dikia. ⁵A' detke ye' ska', etä ilè mekeyö a' a ñè as a' diché iërne shkoie.

Etä ie'pa tö ie' iüté:

—E'ma iü wës be' tö iché es.

⁶Abraham tkawa iu a, ta ichéitö Sara a:

—Bet, harina bua'bua yuló kilo dökä dabom böyök (20) ekkë, e' wa pan yuó.

⁷E' ukuökî ta bet ie' wák tunemi baka pupula shushtök wë bua'bua

ese klö'wëwaitö. E' mítser ie' wa méitö ikanè méso eköl a. Bet ta ikanè méso tö ikanewé ie' a katè. ⁸Abraham tö baka chkà ena baka tsu'diö wösi ena baka tsu'diö pa'ali e' mé ie'pa a. Ie'pa tulur chkök kal àr ukkô a e' dikia. E' dalewa Abraham dur ie'pa tiök eë.

⁹E' dalewa ie'pa tö ichaké Abraham a:

—¿Wé be' alaköl kiè Sara e'?

Ie' iüté:

—Ie' tkër wëshké.

¹⁰Etä ie'pa eköl tö iché ia:

—Duas iëk e' wa ye' döne be' pakök. E' kéwö ta be' alaköl Sara alà ta'tke.

E' dalewa Sara tkër Abraham tsikka u wëkkô a. Ie' tso' ie'pa ttöke, e' ttsök. ¹¹Abraham ena ilaköl, e' dewatke këkëpala. Bänet Sara kè tö alakölpa duè suëta'ia. ¹²E' kueki Sara kè a jañè wöklönuk ta ibikeitsé: “¿Wës ye' tö ttè i' klö'wëmi tö sa' kërulunetke e' dõmi alàè?” ¹³Jehová tö iché Abraham a:

—¿Ì kueki Sara jañéka? ¿Ì kueki ie' tö iché: “¿Wës ye' kënewatke e' dõmi alàè?” ¹⁴Kè ì ta ye' a darërë. Duas iëk ye' döne, etä ie' alà ta'tke.

¹⁵Sara suane e' kueki ichéitö: “Kè ye' jañine!”

Erë Jehová tö iché ia:

—E' kè dör es. Mokî be' jañéka.

**Abraham kköché Jehová a
Sodoma wakpa tsatkò**

¹⁶E' ukuökî ta ipakökwakpa e' duékarak ta imíyal dò wë Sodoma kî wëne eë. Abraham tö iñalé mére e' choat ie'pa a. ¹⁷⁻¹⁹Etä Jehová tö

ibikeitsé: “Abraham aleripa alör-daë tajë diché ta' tajë. Ye' tö iyë'at ie' a tö ie' batamik ye' er buaë chöraë ká ulitane wakpa a. Ye' tö ie' shukit as ie' tö ila'r ena ileripa a ichò tö ye' ttè dalöiö ñies tö i kòs buaë yësyësë e' ú. Es i kòs yë'yö ie' a e' wëraëyö. E' kueki ye' kawöta ichökia tö iók ye' mí Sodoma.” ²⁰E' kueki ie' tö iché Abraham a:

—Sodoma wakpa ena Gomorra wakpa e' wamblökerak suluë tajë shutë, e' ché sulitane tö. ²¹E' kueki ye' mía ee isaük tö yëne ie'pa e' wamblöke suluë ichók wës ye' a ikkatëne es.

²²Etä Abraham pakökwakpa böle' yéttsa mía Sodoma. Erë Abraham atë dur Jehovahä ta. ²³Ie' e' skëwä tsinet Jehovahä ska' ta ichakéi-tö ia:

—¿S'ser mokië esepa ewëwamibö se' sulusipa ta? ²⁴Isalema s'ser mokië esepa tso' Sodoma doka dabom skeyök (50), etä çká e' wakpa ewëwamibö sëraa? ¿Kë be' tö ilo'yepa ie'pa ki s'ser mokië tso' doka dabom skeyök (50), e'pa kueki? ²⁵iMoki be' kë tö s'ser yësyësë esepa ewëpawa se' sulusipa ta ñita! Kë bö iwamlepa es. iE' kë wamblërpa! Be' dör sulitane shulökwak e' kueki çwës e' kë tö se' shulepa yësyësë?

²⁶Jehová tö iiuté:

—S'ser mokië esepa kuéyö doka dabom skeyök (50) e' ta e'pa dalërmik kë ye' tö imalepa ewëpawa.

²⁷Etä Abraham tö iskà chéne ia:

—Be' dör Skëköl. Ta ye' dör wës ká po ena muluchka es be' wöä. E' tö be' chakë tajë kë suane. Isalema

s'ser mokië esepa kianeia skel (5) as idöka dabom skeyök (50). ²⁸Skel e' kianeia, e' ta e'pa è kueki çká e' wakpa ewëwamibö?

Jehová tö iiuté:

—S'ser mokië esepa kuéyö doka dabom tkëyök ki skel (45), e' ta kë ye' tö ká e' wakpa ewëpawa.

²⁹Abraham tö iskà chaké:

—Dö' dabom tkëyök (40) è tso', e' ta çbe' tö ká e' wakpa ewëwami?

Jehová iiuté:

—Au, kë yö ká e' wakpa ewëpawa dabom tkëyök (40) e' dalërmik.

³⁰Etä Abraham tö ikí ché ia:

—Tajë be' tsiriwëyö, e' kueki kë be' ulunuk ye' ki. Dö' s'ser yësyësë tso'ia dabom mañayök (30) è.

Jehová tö iiuténe:

—Au, dabom mañayök (30), e'pa dalërmik kë yö iëwëpawa.

³¹Abraham tö ikí chaké ème:

—A ye' Këköl, tajë yö be' dalösewëwä be' chakök i' es, erë ká ki s'ser mokië tso' dabom böyök (20) è, e' ta e'pa kueki, çká e' wakpa ewëwamibö?

Jehová tö iiuté:

—Au, ie'pa dabom böyök (20), e' è dalërmik kë ye' tö ká e' wakpa ewëpawa.

³²Abraham tö ikí chaké ta ichéi-tö ia:

—Kë be' ulunuk ye' ki. I' è chakekeyö be' a. S'ser mokië esepa tso' doka dabom eyök (10) è, e' ta çwës bö iwëmi? çká e' wakpa ewëwamibö?

Jehová tö iiuté:

—Dabom eyök è dalërmik kë ye' tö ká e' wakpa ewëpawa.

³³Mik ie'pa tté ɔne ñita etá Jehová míane. Abraham biteane ie' u ɔ.

**Skëköl tō Sodoma ena
Gomorra wakpa ewéwa**

19 ¹Ká tuinemitke tá Skëköl biyöchökwakpa bōl e'pa demi ká kiè Sodoma eɛ. Abraham alayök kiè Lot, e' tkër ká e' kköiëulewá e' wékkö ɔ. * Mik ie' tō Skëköl biyöchökwakpa sué, etá ie' e' kéká ie'pa shké'uk. Ie' e' téwá iski iwötsá méwaitō íyök kɪ. ²Ie' tō iché ie'pa ɔ:

—A kékëpa, ye' kköchò a' ɔ tō a' kapórō ye' ska'. Eɛ a' klò skuòmi etá bule bla'mi a' mi'mine.

Ie'pa iiuté:

—Au. Kè be' tkinuk. Sa' kapömi u'rkɪ.

³Erë Lot kköché taië ie'pa ɔ. Bata ekkë tá ie'pa míyal ie' u ɔ. Mik ie'pa dewá wëshké, etá ie' tō ie'pa ɔ chké yulé buaë. Pan kè wötuule iwölöwoka wa ese yuëitō ie'pa ɔ. Ie'pa chké.

⁴Kam ie'pa kapölur e' yökɪ Sodoma wakpa wëpa debitɪ taië. E'pa tō

Lot u kköiëwá shkit. Ie'pa ulitane, duladulapa dò kékëpaë, e'pa kulémi Lot wöá. ⁵Ie'pa tō ichaké ɔneule:

—I'ñe wëpa bōl debitɪ be' u ɔ ɔwé e'pa? iIe'pa yölur íe sa' ɔ u'rkɪ ɔs sa' serká ie'pa tá kësik wa!

⁶Lot e' yéttsá ttök ie'pa tá. Ukkö wötéwaitō buaë itsikka. ⁷Ie' tō ie'pa ɔ iché:


—A yamipa, ye' kköchò a' ɔ tō i sulu e' kè wamblar ie'pa tá. ⁸Ye' alà busipa tulur bōl kam ser wëpa tá, e'pa yekeluryö a' ɔ ɔs a' tō iwamblò ie'pa tá wës a' kɪ ikiane es. Erë kè i wamblar sulu ye' pakök-wakpa dewá ye' ska', e'pa tá.

⁹Erë ie'pa iiuté:

—iBe' e' skóu bānet! Be' kè dör ká i' wak. Be' kè ɔ i yënuk sa' ɔ. iE' kuëkɪ be' we'ikeraë sa' tō ie'pa sɛ tsatá!

E' ukuökɪ tá iwe'ikémi ie'pa tō tá idemirak u wékkö batsökök.

¹⁰Etá Lot pakökwakpa ulà tiéwá u'rkɪ ukkō ɔ Lot tséwá wëshké. Etá ie'pa tō ukkō wötéwá. ¹¹Pë' sulu-



I' dör ká kköiëule ese wékkö. (Génesis 19.1)

* 19.1 ká e' kköiëulewá e' wékkö ɔ: E' kèwö skà tá ká ulitane dör kköiëule ese ké wékkö tso'.

si kōs wōbla sulu'wélur ie'pa tō, kè wawēneia. Duladulapa dō kēkēpaē e'pa kōs wōbla sulurulune. E' kuēki ie'pa shtrinewā ukkō yulök. Kè ie'pa wā ikune. ¹²⁻¹³Lot pakōkwakpa tō iché ia:

—Tajē ká i' wakpa kkatēne e' tté demi Jehová wō kī. E' kuēki sa' patkéitō ie'pa eukwa. Ie'pa ewekewa sa' tō yēs. E' kuēki be' yamipa ekka kī tso' ká i' kī, e' tā e'pa yólur. Be' alà duladulapa tā' ö be' alà busipa tā' ö be' nuākipa tā', ö be' yamipa skà tso' ká i' kī, e' tā iiyólur bet tsúmi kamiē!

¹⁴Etā Lot mīā wēpa ttē meule senukwā ila'r busipa tā e'pa weblök tā iché iarak:

—iA' e' kōkā! iA' yúshka! Jehová tō ká i' ewekewa.

Erē ie'pa tō ibikeitsé tō ie' kalōke ie'pa tā. ¹⁵Ká ñirketke, e' ulatök tā Skēköl biyöchökwakpa tō iché Lot a:

—Sa' tō ká i' ewekewa. Kè be' duakwā, e' tā ibet, be' e' kōkā! iBe' alaköl ena be' ala'r busipa tsúmi!

¹⁶Erē ie' e' ukeia enaē. Erē Jehová er buaē ché ie' a, e' kuēki Skēköl biyöchökwakpa tō iklö'wēwā iulà a yèttsa. E' sù ñies ilaköl ena ilà busipa yélur ie'pa tō Sodoma a itsatkoie. ¹⁷Mik ie'pa tō iyéttsarak bānet etā Skēköl biyöchökwakpa tō iché ie'pa a:

—iA' tunú as a' tsatkēr! iKè a' ká i' saukia tsikkane yēs! iE' sù kè a' e' wöklö'uk kakkue i' kī! iA' éna e' tsatkak, e' tā a' yúshka etkēme kabata a!

¹⁸Erē Lot tō iché ia:

—iA kēkēpa, au, a' we'ikèyö! ¹⁹A' tō ye' kimé taiē. A' tō ye' tsatké duōwā ulà a, erē kè ye' shkak kabata a. Ye' ibikeitsè tō i sulu datse ká i' eukwa, e' tō ye' kuēmi ñalā kī etā ye' duōwami. ²⁰Ká tsi-tsir tso' iē tsinet, eē ye' tkòshkarmi. Kawō mú ña shkowā eē e' tsatkoie. Mokī e' dör ká tsir.

²¹Etā ie'pa eköl tō iüté:

—Ye' be' ttō ttsé, e' kuēki yō iweke wēs be' tō ye' a ikié es. Ká chébö ye' a e' kè eweku'wayö. ²²Erē be' yú etkēme eē. Kè ye' a i wamblēnuk kam be' dōmi e' dalewa.

E' kuēki ká e' kiè Sóar.*

²³Mik ká ñine etā Lot demi Sóar. ²⁴Etā azufre wōñarke bö'ie e' patkébitū Jehová tō taiē Sodoma ena Gomorra kī. ²⁵Ká e' wakpa ewéwa bö' tō yēs. Ñies dalikua kōs tskirke ká e' kī e' ñanewā sēraa. ²⁶Erē Lot alaköl dami itōkī. E' tō ká sué itsikka. Bet ie' yōnane dayē wōsiie shkē'ka.

²⁷Bule es bla'mi tā Abraham mīane wé ikapaké Jehová tā eē. ²⁸Sodoma ena Gomorra kī suéitō tā ishklé batrōke taiē wēs tē blublu ña'wēsö es. ²⁹Es Skēköl tō ká e' wakpa ewéwa. Erē i ki' Abraham tō ie' a, e' ska' ie' er de, e' kuēki ie' tō Lot tsatkée.

Lot alà busipa alà kēkā ie' tā

³⁰Sodoma ena Gomorra ewéwa Skēköl tō, e' ukuökī tā Lot suane senukia Sóar. E' kuēki imīā senuk

* 19.22 Sóar: Hebreoie ká kiè e' wà kiane chè ká tsir.

kabata a ila'r busipa bōl ta. Ee ie'pa mañal sené ákuk a.

³¹Ká et ta ilà busi kibi tò iché itsirla a:

—Se' yé kēnewatke etā kē wē wēpa ta' senuk se' ta wēs alakōlpa malepa wēpa ta' es. ³²E' kuēkī se' yé ttōkasō blo' wa etā se' ser ie' ta, etā es se' ulà a alà dōmi.

³³E' nañewe ta ie'pa tò iyé ttēka blo' wa taiē, etā ilà busi kibi ék sené ie' ta. Erē ie' tteke blo' tò taiē, e' kuēkī kē ie' éna ì aneia. ³⁴Bule es ta ilà busi kibi tò iché itsirla a:

—Bō ittsó, ye' sené se' yé ta. I'ñe nañewe iskà ttōkasō blo' wa. Etā be' senú ie' ta. Etā es se' bōl ulà a alà dōmi.

³⁵E' nañewe ta ie'pa tò iyé skà ttēka blo' wa. Etā ilà busi tsirla sené ie' ta. Erē ie' tteke blo' tò taiē, e' kuēkī kē ie' éna ì aneia. ³⁶Es ilà busipa bōl e' bukluwēka iyé wa. ³⁷Etā ikibi ék alà kune kiè mékaitō Moab. I'ñe ta Moab aleripa datse e' batamik. ³⁸Ñies itsirla de alàē, kiè mékaitō Ben-amí. I'ñe ta amonwak datse e' batamik.

Abraham ena Abimélec

20 ¹Abraham e' yéttsa Mamré a, mía tkörö ká kiè Négueb ee. Etā ie' e' tséat senuk ká kiè Guerar ee. Guerar ate Cadés ena Sur e' shushaē. ²Ie' tò ká e' wakpa a iché tò Sara dör ie' kutà. Ká e' blú kiè Abimélec, e' tò Sara tsuk patké alakōlie e' a. ³Erē nañewe ta ie' kapowa e' dalewa, Skëköl tté ie' ta kabsuē a ta iché ia:

—Alaköl tsuk patkébö e' wēm ta', e' kuēkī be' duōwami.

⁴Erē kam ie' ser Abraham alaköl ta, e' kuēkī ie' iüté:

—A kēkēpa, ye' kē kī e' nuí ku' ōwes e' ttēwamibō? ⁵E'ma Abraham wák tò ye' a iché tò alaköl e' dör ie' kutà. Ñies ilaköl tò ye' a iché tò Abraham dör ie' akē. E' kuēkī ye' tò ì kōs wē er bua' wa. Kē ye' wā iwamblēne er sulu wa.

⁶Skëköl tò iskà iüténe kabsuē a ta ichéitō ia:

—Ye' éna iane buaē tò be' tò iwé er bua' wa. E' kuēkī kē ye' wā be' kane ie' kökwā as be' kē tò ì sulu wamblō ye' kī. ⁷Abraham dör ye' tteköl, e' kuēkī bet be' yú ilaköl mukne ia. Ie' tò ye' a ikieraē as be' seria ttsē'ka. Erē be' kē dē'ne imukne, e' ta be' ena be' yamipa kōs duōralur.

⁸Bule es bla'mi ta Abimélec shkēne ikanē mēsopa kiéitō ta ì suéitō kabsuē a e' kōs pakéitō ie'pa a. Mik e' ttsé ie'pa tò etā taiē ie'pa suanéka iyökī.

⁹Etā Abimélec tò Abraham kié ta iché ia:

—Ílók be' tò iwamblé sa' ta es? Be' kuēkī Skëköl tò sa' pauñé ewēwa, erē Skëköl tò sa' pauñé es, etā ì sulu wambléyō be' ta? Íyi ese kē kawō ta' wamblénuk. ¹⁰Be' tò ì sulu wamblé ye' ta, etā ì dör iwà?

¹¹Abraham tò iüté:

—Ye' tò ibikeitsé tò ká i' kī kē yi tò Skëköl dalöieta'. Ye' suane dö' a' ye' ttēwa ye' alaköl yottsā ye' ulà a. ¹²Erē iyēne tò ie' dör ye' kutà. Ie' yé dör ye' yé, erē ie' mī kē dör ye' mī. Ñies ie' dör ye' tayē. ¹³Mik Skëköl tò ye' a iyē' tò be' e' yóttssā be' yé ká a, etā yō iché ye' alaköl a: “Ká

wa'ñe wé se' demi, eta ichó tö ye' dör be' akë."

¹⁴Eta Abimélec tö Sara méne iwëm Abraham a. Nies iyiwak kakméitö Abraham a obeja ena baka. Nies kanè mésopa kakméitö ie' a wëpa ena alakölpa. ¹⁵Eta ie' iché Abraham a:

—Ye' ká saü seraä wé wa be' wöbatse e' kī be' yú senuk.

¹⁶Eta Sara a ichéitö:

—Ye' tö inuköl wömule kakmé be' akë a dökā mil ekkë. E' dör i sulu wambléyö be' tā be' wakpa ulitane wöa e' patuöie. Es be' kè jaëneia.

¹⁷Eta Abraham tö Skëköl a ikié tö Abimélec ena ilaköl duöke, e' bua'üne. Eta Skëköl tö ie'pa bua'wéne. ¹⁸Alakölpa kōs tso' Abimélec u a, e'pa shü mo'wä Jehovah tö as kè idöiarak aläe Sara kuëki. Ie'pa kōs shü wötséene Jehovah tö.

Sara alà kékā Abraham a

21 ¹I yë' Jehovah tö Sara a tö be' alà körakā, e' wä tka wës iyëne bak es. ²Erë Sara ena iwëm dör këkëpalatke, erë ie' dunekā e' wä kune. Alà e' kune mik Skëköl tö ikéwö yë' ie' a eta. ³Sara alà kune wëm e' kiè mékā Abraham tö Isaac. ⁴Mik Isaac kī ká de pāköl, eta Abraham tö itóttola kkuölitla téé tsir wës Skëköl tö ie' a iyë' es. ⁵E' kéwö ska' tā Abraham kī duas tso' cien eyök (100). ⁶Eta Sara tö ibikeitsé: "Skëköl tö ye' jañawékā. Mik sulitane wä ijchenewa tö ye' de aläe eta taië ie'pa jañumi ye' tā. ⁷Kam ye' alà kōkā eta kè yi a iyënuke tö ye' dōmi aläe. Erë i' tā ye' alà kékā Abraham a, ie' kënewatke eta."

Agar ena Ismael uyéttsa bānet

⁸Eta Abraham alà Isaac de bërie tā itsu'batsée e' kéwö tkö'wé Abraham tö taië. ⁹Eta Sara tö isuë tö Abraham alà kune egiptowak kiè Agar e' tā kiè Ismael, e' tö Isaac wayueke suluë. ¹⁰E' kuëki Sara mīa ichök Abraham a: "I kōs tso' be' wä mè se' alà Isaac a, e' kè kawö tā' blatè se' kanè méso e' alà a. E' kuëki iyuóshkar aläe."

¹¹Ismael dör Abraham alà ñies e' kuëki i ché Sara tö e' tö ie' eriawé taië. ¹²Erë Skëköl tö iché ia: "Be' aleripa chökke e'pa dōraë Isaac wa. E' kuëki kè be' tkinuk be' alà kibi ék kī ena imi kī. I kōs ché Sara tö e' ú. ¹³Be' alà kune a' kanè méso tā, ñies e' aleripa alöweraëyö taië, ie' dör be' alà e' kuëki."

¹⁴Eta bule es bla'mi tā Abraham tö Agar a chké mé. Nies di' méitö ia iyiwak kkuölit yöule di' tsoie ese a. E' tiékā ie' tö seraä itsi kī tā iyuéshkar ilà Ismael e' tā. Agar mīa shkëmi äanas wé kè yi serku' ese ska' ká kiè Beerseba e' ëkā. ¹⁵Mik idi' enewa, eta ilà tkéseritö kal dikia. ¹⁶Ie' kè kī ilà kiane suë duökwa, e' kuëki imia e' tkéser kukuie. Mik ie' e' tkéser iski eta ilà iëmi.

¹⁷Ilà iuke e' ttsé Skëköl tö tā bet Jehovah biyöchökwak bua'ie e' tö Agar a ichaké ká jaì a: "¿A Agar wës be' de? Kè be' suanuk. Be' alà tkër iuk e' ttsé Skëköl tö. ¹⁸Be' yú be' alà yulök. Ikōkā ulà a kè arwa. Ye' tö ie' aleripa alöweraë taië."

¹⁹Eta Skëköl tö Agar a di' tum kkaché et. Ie' mīa di' e' tsuk,

iyiwak kkuölit a e' méitö Ismael a ye'. ²⁰Skëköl tö Ismael kk'öné buaë. Ie' talane sené ká wé kî kè yi ku' kiè Parán eë. Ie' de sulëname buaë. ²¹Ie' kibine ta imì tö iulabatséwa alaköl dör egiptowak ese ta.

**Abraham ena Abimélec
tö kawö mé ñi a**

²²E' kéwö ska' ta blu' kiè Abimélec míá ttök Abraham ta. Ie' ñippökwakpa wökir, kiè Ficol, e' mí ie' wapie. Eta Abimélec tö iché Abraham a:

—Sa' wa ijcher tö Skëköl be' kimeke taië i kôs wekebö e' wa. ²³E' kuëki be' ttè mú ye' a ie Skëköl wö wa tö be' kè tö i sulu wamblepa ye' kî ñies ye' ala'r kî ena ye' aleripa kôs e'pa kî. Be' ttè mú ye' a tö be' er bua' chöraë ye' a wës ye' er buaë ché be' a es. Ñies be' ttè mú ye' a tö be' er buaë chöraë ká i' wé be' serke e' wakpa a.

²⁴Abraham tö iiuté:

—Tó. Es ye' ttè mé be' a.

²⁵Erë Abimélec wakpa tö di' tum biule yë'ttsa et Abraham wakpa ulà a. E' chaké Abraham tö ie' a. ²⁶Ie' tö iiuté:

—Erpa be' ye' tkiwéwa ttè e' wa. Kè bö ichópa ye' a, e'ma kè ye' wa ijcher. Brör éyi tö e' wamblé be' kî?

²⁷Abraham tö baka ena obeja kakmé Abimélec a eta ie'pa böi kawö mé ñi a. ²⁸E' ukuöki ta Abraham tö iobeja alakipa pupula e' dapa'wé döka kuktö ek tsiní. ²⁹Mik e' sué Abimélec tö eta ie' tö Abraham a ichaké:

—Éi kuëki be' iyiwak kuktö dapa'wé ek tsiní?

³⁰Abraham tö iiuté:

—Iyiwak kuktö, e' meke ye' tö be' a iwà kkachoie tö mokî ye' tö di' tum e' bi'.

³¹Ie'pa böi kawö mé ñi a eë e' kuëki ká e' kinewa Beerseba.*

³²Ie'pa kawö mé ñi a, e' ukuöki ta Abimélec ena Ficol e'pa biteyal filisteowak ká a. ³³Eta Abraham tö kal kuá kiè tamarisco ese kuatké elka Beerseba. Eë ie' tö Jehová dör Skëköl yöbië e' dalöié. ³⁴Eë ie' sené ká taië filisteowak ká a.

Skëköl tö Abraham ma'wé ilà wa

22 ¹E' ukuöki ta Skëköl tö Abraham ma'wé tö mokî ie' tö idalöieta'. Ie' chakéitö:

—A Abraham.

Abraham tö iiuté:

—Éi?

²Eta Skëköl tö iché ia:

—Be' alà eköl è kiè Isaac e' dalër be' éna taië, e' tsúmi Moria. Mik be' demi eë, eta ye' tö be' a kabata kkacheke, e' kî be' alà ttówa ta iña'úwa ye' a ye' dalöioie.

³Bule es bla'mi ta Abraham e' kéka ta burro payuéitö. Bö' jchéitö tsèmi. Eta ie' míá wé Skëköl tö ie' a iyë' eë ilà ena ikanè mésopa böi e'pa ta. ⁴E' böiki es ta Abraham tö ká yëne ie' a e' kî sué kamië. ⁵Eta ie' tö iché ikanè mésopa a:

—Ée a' e' tsúat burro i' ta. Ye' ena ye' alà, sa' micho kabata jai a Skëköl dalöiök, e' wa sa' döne.

* **21.31 Beerseba:** Hebreoie ká kiè e' wà kiane chè ttè mène ñi a e' di' tum biule ö Obeja kuktö e' di' tum biule.

⁶Etä Abraham wä bö' mí e' ppékaitö Isaac kuli' kī. Tabela ena bö'ka bö' batsoie e' mí Abraham wä. Etä imíyal ñita. ⁷Etä Isaac tö iché iyé a:

—A, yéwö.

Abraham tö iiüté:

—A alà, ìi kiane be' kī?

Isaac tö iché iä:

—A Yéwö, bö' tso' se' wä, ñies bö'ka, erë éwé obeja pupula tteke-wä Skëköl a e'?

⁸Iyé tö iiüté:

—A alà, Skëköl wák tö e' meraë se' a.

Ie'pa mir ñita. ⁹Mik ie'pa demi wé Skëköl tö iyé' Abraham a ee, etä Abraham tö ák kataté et ka'ie. E' ukuökī tā ibö' dapa'wéka ka' e' kī tā ilà klö'wéwaitö payuéwä mékaitö bö' bata kī. ¹⁰⁻¹¹Ie' tabela klö'wéwä ilà ttowä ña'wé Jehovah a. E' wöshä tā Jehovah biyöchökwak bua'ie e' tö Abraham chaké siwä' kī:

—iA Abraham, a Abraham!

Ie' tö iiüté bet:

—ìi?

¹²Jehová biyöchökwak bua'ie e' tö iché iä:

—iBe' alà kè shka'war, kè ittar-wä! Be' wák alà eköl ème e' kè kkëone be' wä ye' yökī. E' wa ye' wä ijcher tö mokī be' tö ye' dalöieta' taië.

¹³E' wöshä Abraham tö isuë tö obeja wë'ñe e' malitsëwä idula' a kal tsitsir chale a. Ie' tö iyiwak e' klö'wéwä jché ña'wéwä ilà skéie Jehovah dalöioie. ¹⁴Ie' tö ká e' kië méka i' es: “Ì kiane se' kī e' mera Jehovah tö.” E' kuëkī i'ñe tā se' tö ichekeia: “Ì kiane se' kī, e' merdaë se' a Jehovah kébata a.”

¹⁵⁻¹⁶Jehová biyöchökwak bua'ie e' tö Abraham skà kié ká jai a tā ichéitö iä:

—Jehová tö iché: ‘Buaë be' tö ye' dalöieke, be' alà eköl è, e' métsabö ye' a. ¹⁷E' kuëkī ye' er buaë chöraë be' a taië. Be' aleripa alöweraëyö taië wës bëkwö tso' taië ká jai a es, wës tsa'wö tso' taië dayë kkömik es. Ñies ie'pa e'



I' dör obeja wë'ñe malitsëwä idula' a. (Génesis 22.13)

alörakā ibolökpa kī kekraë. ¹⁸Be' tō ye' ttō dalöié, e' kuëkī be' aleripa batamik ye' er buaë chöraë ká ulitane wakpa a.'

¹⁹Eta Abraham biteane wé ikanè mésopa atéat ee tā imíyal sēraa ñita dōmine Beerseba wé ie' serke ee.

Nahor ala'r

²⁰⁻²³E' ukuökī tā biyō debitū Abraham kī tō ie' èl kiè Nahor, e' alaköl kiè Milcá, e' ala'r de pāköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Ildaf ena Betuel e' dör Rebeca yé.

²⁴Nahor alaköl skà tso' kiè Reumá, e' tā ie' ala'r kéka tkël. E'pa kiè dör Teba, Gáham, Tahas, ena Maacá.

Sara blēnewa

23 ¹Mik Sara kī duas tso' cien eyök kī dabom böyök kī kul (127), ²eta ie' blēnewa ká kiè Quiriat-arbá ate Canaán ee. Ñies ká e' kiè Hebrón. Abraham schōne e' iēitséitō siarē. ³Ie' tkēr idēütō nu o'mik e' e' kéka tā imía ttök hititawakpa tā, tā ichéitō ie'pa a:

⁴—Eré ye' dör ká kuā'kī wak serke a' shūa e' è, eré ká wataú ña pöie ye' dēütō blowa.

⁵Ie'pa tō iiuté:

⁶—A kēkēpa, be' welikè sa' tō, sa' ttō ttsó. Sa' a tā be' dör kēkēpa tajē e' serke sa' shūa. E' kuëkī be' dēütō nu bló sa' pō bua'ie ese a. Sa' ulitane kē tō ichepa be' a tō kē iblar sa' pō a.

⁷Ie' e' duéka ie'pa wörkī tā ie' e' tkéwa kuchē kī ie'pa dalöiök ⁸tā ichéitō ie'pa a:

—Mokī a' kī ikiane tō ye' dēütō nu blēwayō iē a' ká a, e' tā wēm kiè Efrón dör Sóhar alà, e' a ichó ⁹tō ákuk tso' ie' ká kkò a kiè Macpelá e' wataútsa ye' a ye' yamipa pöie. Ye' tō ipatuēmi ie' a kōs ituē ekkē. Es ákuk e' atē ye' ulà a a' shūa.

¹⁰Eta Efrón dör hititawak e' tkēr-ñak ie'pa shūa, e' tō Abraham iuté darērē as iyamipa ena kōs daparke ká e' wékkō a e'pa tō ittō ttsó. Ie' tō iché Abraham a:

¹¹—A kēkēpa, kē ye' tō ákuk watuepa be' a. Ká e' ñies ákuk tso' ia, e' kakmekeyō be' a é. Ye' yamipa kōs tso' iē e'pa tō ye' ttō ttsé tō ká e' kakméyō be' a. Be' dēütō nu bló ee.

¹²Eré Abraham e' tkéwane kuchē kī ká e' wakpa wörkī ¹³tā ichéitō ie' a sulitane wörkī:

—Ye' ttō ttsó. Be' pablèyō tō ká e' ské klö'ú ye' ulà a. E' ukuökī ye' dēütō nu blekewayō.

¹⁴Ie' tō iiuté:

¹⁵—A kēkēpa, ye' ttō ttsó. Ká e' ské dör inuköl wōmule dōka cien tkéyök (400), eré inuköl ekkē è, kē e' kī se' tkinuk. Be' dēütō nu bló ee.

¹⁶Eta kōs ie' tō ká ské ché imalepa wörkī e' mēne buaë Abraham a, ekkē patuéttsaitō. * ¹⁷⁻¹⁸Es Efrón ká tso' Macpelá ate Mamré diwō tskir-ke e' éka e' de Abraham ulà a iákuk tā ena kal tso' kōs ikī e' tā. Hititawak ena sulitane dami ká e' wékkō a e'pa kōs dör ká tone e' ttekölpa.

¹⁹E' ukuökī tā, Abraham tō idēütō nu bléwa ákuk tuéitō

* **23.16** Es ie'pa wōblar íyi watauk ñi a. Eré Efrón tō iché tō ká e' kakméitō Abraham a eré e' kē yēne. Ñies e' ane Abraham éna, e' kuëkī ie' tō Efrón patué bèrē kōs Efrón ie' a iché ekkē.

Macpelá ee. Ká e' atē Mamré atē Canaán e' o'mik tsinet (Mamré kiè ñies Hebrón). ²⁰Ká e' watuéttsa ie' a hititawak tò. Es ká e' ena ákuk e' de Abraham ulà a iyamipa pöie.

**Abraham tò alaköl
yulök patké Isaac a**

24 ¹Abraham dēwā kēkēpalaie. Ie' a Jehová er buaē ché iyi ulitane wa. ²Ká et tā ie' tò ikanè méso kibi kié. E' dör ie' iyi kōs e' kueblu. Ie' tò iché ia:

—Be' ulà múwā ye' tu' dikia iwà kkachoie tò moki i kiekeyö be' a e' waweraëbö. ³Jehová dör ká jai ena ká i' e' Kēköl e' wörki be' ttē mú ye' a mokiē tò ye' alà kē kar senukwā Canaán ie se' serke e' alékölpa tā. ⁴Be' yú ká wé ye' manét ee, etā ee alaköl yuló eköl ye' yamipa shuā senukwā ye' alà tā.

⁵Ie' tò iiuté:

—Dö' alaköl kē bitu ye' tā, e' tā žwes ye' iwēmi? žBuaē idir be' a tò be' alà mi' ye' wā dò wé be' manét ee?

⁶Ie' iiuté:

—iAu, kē ye' alà tsarmi ee! ⁷Jehová dör ká jai Kēköl, e' tò ye' yē'ttsa ye' yé u a ena ye' yamipa ká a. Ie' tò ittē me' ye' a tò ká i' meraëitö ye' aleripa a. Ie' tò ibiyöchökwak patkeraë be' kimuk alaköl tsukbitu ye' yäkie. ⁸Alaköl kē shkak be' tā, e' tā kē be' tkinuk. Kē be' kàne iskà yulök. Erē kē ye' alà tsarmi ee.

⁹Etā ikanè méso ulà méwā ie' tu' dikia tā ittē mé ia tò iweraë wes iuk patkéitö es. ¹⁰E' ukuöki tā ie' tò iwökir iyi kōs bua'buā, ese shté

tsēmi kakmè. Ekkē kōs payuéitö iyiwak kiè kameio e' ki dōkā dabop. Etā ie' mia iyiwak wēttsē tkörö Nahor atē Mesopotamia ee. ¹¹Mik ie' demi tsinet Nahor, etā ká tuirketke. Diwö ekkē tā ká e' alékölpa mi'ke di' tsuk. E' wōshā tā ie' de di' tum biule e' kkōmik tā ikameio kēitö e' tulöksēr enuk ee. ¹²Etā ie' tò iché Skēköl a: “A Jehová, be' dör ye' wökir Abraham e' Kēköl. Ye' kimú iñe ñies er buaē chō ye' wökir a. ¹³Ie di' tum biule o'mik ye' e' tsukeat bērbēr è ká i' busipa tso' di' tsuk e' dalewa. ¹⁴Kawö mú ña tò wēne ék a ye' iché: ‘Be' kakö' ówa ye' a di' kakmú yé', as e' tò ye' iutö: ‘Be' di' yó ñies be' kameio a ikakmekeyö.’ Es ye' éna iane tò e' ék shushté be' tò Isaac a alaköl-lie. Es ye' wā ijchēmi tò be' er bua ché ye' wökir a.”

¹⁵Etā kām i chekeitö e' or, etā ie' isué alaköl datse eköl kakö' bune kuli' ki di' tsoie. E' dör Rebeca, ie' dör wēm kiè Betuel e' alà busi. Betuel mi dör Milcá ena iyé dör Nahor. Nahor dör Abraham él. ¹⁶Rebeca dör busi buaala kām iser wēm tā. Ie' mia dōttsa di' tum biule e' a ikakö' wā iök. ¹⁷Mik imítke etā Abraham kanè méso tunemi itöki tā iché ia:

—Be' we'ikèyö, di' dami be' wā e' kakmú ña yè.

¹⁸Ie' tò iiuté,

—A kēkēpa, be' di' yó.

E' bet ie' kakö' éwa klö'wéwā ulà a tā di' méitö ia yé. ¹⁹Mik ie' di'yé one tā Rebeca tò iché ia:

—Ye' mí di' tsuk ñies mè be' kameio a.



I' dör di' tum biule ese. (Génesis 24.11)

²⁰Bet ikakö' wà ka'wéitö wé
iyiwak di'yöke e' a tã imí di' kí tsuk
iyiwak a. Es iwéitö kameio ulitane
a. ²¹E' dalewa Abraham kanè méso
tso' isauk bèrè, wà dör tö ie' kî ikia-
ne jchenowã yësyësë tö Jehová tö
ie' kímé ì dalërmik ie' shkò e' wa
as idöttsã buaë ö au. ²²Mik kameio
di'yé one, etã ie' tö ula'tsio sù es dör
gramo teröl ese tkéwã busi yik a.
Ñies ulaio méitö böt, e' es dör cien
gramos tsatã. ²³Etã ie' tö iché iã:

—Be' we'ikèyö, ichö ña ¿Yi alà
busi be' dör? ¿Ye' chömi i'ñe nañe-
we be' yé u a kapökrö ye' kanè
mésopa tã?

²⁴Ie' iüté:

—Ye' dör Betuel alà busi, e' dör
Milcá ena Nahor alà wëm. ²⁵Sa' u
a a' chömi. Ñies a' kameio a chke
tso'.

²⁶Etã Abraham kanè méso e'
tkéwã kuchë kî Jehová dalöiök
²⁷tã ichéitö: “Jehová dör ye' wökir
Abraham e' Këköl. E' kîkökka ye'
tso'. Këkraë ie' tö ye' wökir Abra-
ham kîmeke buaë. Këkraë ie' er
buaë chöke ye' wökir a. Ie' wã ye'
debitu buaë ñalã kî dò ie ye' wökir
yamipa u a. E' kueki ikikèkayö.”

²⁸Rebeca tunemi shkäläläë imì
u a ì kos tka ie' tã e' pakök. ²⁹⁻³⁰Ie'

akë kiè Labán, e' tò ula'tsio sué ena ulaio sué ikutà ulà a. Nies ì ché Abraham kanè méso tò e' tté ttséitö. E' kuëki ie' bitea ññaletsuk di' tum biule a. Ie' de Abraham kanè méso ska' e' tso'ia ikameio ta di' tum biule ska'. ³¹Etä Labán tò iché ia:

—Jehová tso' be' ta buaë.

iMishka ye' ska'! ¿Wes be' e' tsukeat u'rki? Ye' u kanewétke be' a ñies kameio a.

³²Es Abraham kanè méso bitea ie' ta. Eë ie' tò dali tso' kameio ki e' éwa ta itiéitö. E' ukuöki ta ie' wa di' debitü Abraham kanè méso a ena iwapiepa a klò skuoie.

³³Mik ie'pa tò itié, etä Abraham kanè méso tò iché:

—Kè ye' chköpa kam ye' tò iók ye' debitü e' wà pakò a' a etä.

Labán tò iiuté:

—E'ma ichó. ¿Ì dör iwà?

³⁴Ie' tò iché:

—Ye' dör Abraham kanè méso.

³⁵Jehová tò ikimé taië. Ie' tò iblu'wé taië. Obeja, baka, orochka, inukölchka, kanè mésopa wëpa ena alakölpa, kameio ena burro, e' kos méitö ia taië. ³⁶Nies ilaköl Sara e' tò alà mé ia eköl wák wëm ikënewatke etä. Ì kos tso' ye' wökir wä e' méitö ilà a. ³⁷Ie' tò ye' ké tté muk ie' a. Ye' a ichéitö: 'Ye' alà kè kar senukwä Canaán wé ye' serke e' alékölpa ta. ³⁸Be' yú wé ye' yépa tso' eë ta alaköl yuló eköl ye' yàkie ye' ditséwö shua.' ³⁹Ye' tò iiuté: 'A ye' wökir Abraham, ¿dö' alaköl kè bitü ye' ta?' ⁴⁰Ie' tò ye' iuté: 'Këkraë ye' serke buaë Jehová wöä, e' kuëki ie' tò ibiyöchökwak patke-

raë be' ta as be' kawö tkò buaë ññala ki, ñies as alaköl kübö ye' yàkie ye' yamipa ye' yé wa e'pa shua. ⁴¹Erë ye' yamipa kè éna ilà busi patkak be' ta, e' ta kè be' tkinuk. Kè ì tté ta'ia be' ki.'

⁴²⁻⁴⁴"E' kuëki ye' debitü i'ñne di' tum biule ska'. Eë ye' tò ikié Jehová dör ye' wökir Abraham e' Këköl e' a: 'tò mokü be' ye' kimeke alaköl yulök ye' wökir Abraham yàkie, e' ta as e' bitü ye' ska' ië di' tum biule ska'. Mik ye' tò ie' a di' kak kié, etä as imütö ye' a ena ichöitö: Nies ye' tò be' kameio a ikakmeke. Es ye' isuëmi tò alaköl e' shushtë be' tò ye' wökir yàkie.' ⁴⁵Mik e' chekeyö e' erketke, etä ye' isué tò Rebeca datse ikakö' bune ikuli' ki. ⁴⁶Mik ie' di' yinetke etä ye' tò ie' a iché: 'Be' we'ikèyö, di' dami be' wä e' kakmú ña yè.' E' bet ikakö' éwaitö ta ichéitö: 'Be' di' yó. Nies imekeyö be' kameio a.' Ie' ye' a di' mé ñies ye' kameio a. ⁴⁷E' ukuöki ta ye' tò ie' a ichaké: '¿Yi alà busi be' dör?' Ie' iiuté: 'Ye' dör Betuel alà busi e' dör Nahor ena Milcá alà.' Etä ula'tsio sù e' tkéwayö iyik a ena ulaio tkéwayö böt iulà a. ⁴⁸E' ukuöki ta ye' e' tkéwä kuchë ki ta Jehová dalöiéyö. Ie' dör ye' wökir Abraham e' Këköl e' kikékayö. Ie' wä ye' debitü buaë yësyësë busi shukititö ye' wökir yamipa shua ilà a e' ska'. ⁴⁹Es ¿a' er buaë chöke ye' wökir a? ¿A' e' chöke ikimuk er bua' wa? Ichó ña i' ta yësyësë ima a' tò iché, es ye' éna iarmi tò ì wëmiyö."

⁵⁰Etä Labán ena Betuel e'pa tò iiuté:

—E'ma i' kōs debitu Jehová ttō wa. E' kueki kē wēs sa' a i' onuk. Kē sa' a i' yēnuk yēs. ⁵¹I' Rebeca. Itsūmi be' wōkir a senukwā ilā tā wēs Jehová ki ikiane es.

⁵²Mik Abraham kanè méso tō ttē e' ttsé, etā ie' e' tkéwā kuchē ki iwōtsa méwā íyōk ki Jehová dalōiōk. ⁵³E' ukuōki tā ie' tō íyi yöule orochka wa ena inukōlchka wa ñies datsi' bua'buā e' taiē yélur méitō Rebeca a. Ñies ie' tō ikakmé Rebeca akē a ena imi a. ⁵⁴E' ukuōki tā ie' ena iwapiēpa chké di'yé tā ikapere eē. Bule es tā iti'nerak tā Abraham kanè méso tō iché:

—Ye' míāne ye' wōkir ska'.

⁵⁵Erē Rebeca akē ena imi e'pa tō iché iā:

—Rebeca kē tsarmi bet. Kāwō mú ie' a as ie' e' tsūat sa' tā ká dabop, e' wa wē' be' wā imi'mi.

⁵⁶Erē ie' tō iché ie'pa a:

—Kē ye' wōklō'ukia a' tō. Jehová tō ye' kímé as i' kōs dōttsa buāe ye' a. E' kueki ye' ómi ye' wōkir u a.

⁵⁷Ie'pa tō iiuté:

—Sa' mí Rebeca kiōk chakē ĩma ichēmiitō?

⁵⁸Etā Rebeca kiérakitō tā ichaké-rakitō iā:

—A Rebeca ĩbe' shkak wēm i' tā? Ie' tō iiuté:

—Tó.

⁵⁹Es ie'pa tō Rebeca ena alakōl tso' ie' kkō'nuk kekraē e'pa a kāwō mé as imi'rak. Ñies Abraham kanè méso ena iwapiēpa kōs e'pa a kāwō mérakitō as imi'rak. ⁶⁰Ie'pa mitke tā Rebeca yamipa er buāe ché ie' a ttē i' wa:

“A sa' yami,

As be' alōr taiē shūtēē.

As be' aleripa e' alōka ibolōkpa kōs ki.”

⁶¹Etā Rebeca ena ikanè mésopa e' tuléka ie'pa kameio ki tā imíyal Abraham kanè méso itōki.

⁶²E' kéwō ska' tā Isaac serke Négueb wé di' tum biule tso' kiē “Skēkōl tso' e' tō ye' sueke” eē, e' dene iyé ska'. ⁶³Tsālī tā Isaac e' yéttsa shkōk kabikeitsōrami. E' wōshā tā ie' isuē tō kameio datse tseē. ⁶⁴E' wōshā Rebeca tō ie' suē ñies tā ie' e' éwa kameio ki. ⁶⁵Rebeca tō ichaké Abraham kanè méso a:

—ĭWēm doā wī se' kke, e' dōr yi? Ie' iiuté:

—E' dōr ye' wōkir Isaac.

Etā Rebeca wō pabakéwā datsi'tak wa.

⁶⁶Abraham kanè méso tō i' kōs tka ie' tā e' paké Isaac a. ⁶⁷E' ukuōki tā Rebeca mítser Isaac wā imi Sara blēnewā e' u a. Es Isaac senéwā ie' tā. Isaac éna Rebeca dalēr taiē, es ie' er pabléne imi blēnewā e' kueki.

Abraham ena Queturá e'pa aleripa

25 ¹Abraham alakōl ské tséwā kiē Queturá. ²Ie' ala'r kéka Abraham tā wēpa dōka terōl. E'pa kiē dōr Zimrán, Jocsán, Medán, Madián, Isbac ena Súah. ³Jocsán dōr Sebá ena Dedán, e'pa yé. Dedán aleripa e' ditséwō dōka mañal kiē asurwak, letuswak ena leumwak. ⁴Madián ala'r wēpa kiē Efá, Éfer, Hanoc, Abidá ena Eldaá. E'pa kōs dōr Queturá aleripa.

⁵⁻⁶I kòs tso' Abraham wà e' àtè Isaac ulà a. Erë kàm Abraham duòwà, e' yòkì ie' tò íyi kakmé ilakölpa malepa ala'r a. Ie'pa patkémiiitò senuk ká bánet àtè diwö tskirke e' èkà kàmiè as kè ikurak Isaac ska' tsinet.

Abraham blènewa

⁷Abraham sene' duas cien eyök kí dabom kulyök kí skel (175) sèraa ⁸età iblènewa buaè ikènewatke kè weine siarè. Es ie' michoë idèütöpa itöki. ⁹⁻¹⁰Ila'r Isaac ena Ismael e'pa tò inú blé ilaköl Sara pö e' o'mik ákuk kiè Macpelá eë. Ákuk e' àtè Mamré diwö tskirke e' wa. Ká e' bak hititawak kiè Efrón dör Sóhar alà e' ulà a. Ká e' wato'ttsa hititawak tò Abraham a. ¹¹Abraham blènewa, e' ukuöki tà Skèköl er buaè ché Isaac a. Ie' e' tséat senuk tsinet di' tum biule kiè “Skèköl tso', e' ye' sueke” eë.

Ismael ala'r

¹²Ismael dör Abraham alà Agar tà. Agar dör Abraham alaköl Sara, e' kanè méso e' dör egiptowak. Ikkè dör Ismael ala'r e'pa kiè ¹³wes ikunerak es: Nebaiot, e' dör ilà tsá. E' itöki Quedar, Adbeel, Mibsam, ¹⁴Mismá, Dumá, Masá, ¹⁵Hadar, Temá, Jetur, Nafis ena ibata kiè Quedmá. ¹⁶E'pa kòs dör Ismael ala'r dòkà dabom eyök kí böl (12). Ie'pa ká kiérak iwákpa kiè wa. Ie'pa kòs dör iwakpa ká wökirpa.

¹⁷Ismael kí duas de cien eyök kí dabom mañayök kí kul (137) tà

iblènewa. Es ie' michoë idèütöpa itöki. ¹⁸Ie' aleripa mía senuk Havilá ena Sur e' shusha. Ká e' àtè Egipto wöshaë Asiria ñalé kke. Ie'pa serke eë bánet Abraham aleripa malepa yökì.

Jacob ena Esaú kune

¹⁹Ttè i' dör Isaac dör Abraham alà, e' pakè. ²⁰Isaac kí duas de dabom tkèyök (40) tà isenéwa Rebeca tà. Rebeca dör Betuel e' alà busi ena Labán kutà. Ie'pa dör arameowak serke ká kiè Padán-aram eë. ²¹Rebeca kè dò alàë. E' kuëki Isaac tò Jehová a ikié as Rebeca dò alàë. Jehová tò ittò ttsé tà Rebeca dunekà e' wakpa dör klò. ²²Erë klöpa ñippöke taië ie' shua. E' kuëki ie' ibikeitsé: “Ye' weirke i' es, e'ma çiök ye' sermiia?” E' kuëki ie' mía iwà chakök Jehová a. ²³E' tò ie' a iché:

“Be' shua ala'r tso' böl.

Mik ie'pa de kèchke, età ikibi èk doraë itsirla kanè mésoie.

Ie'pa aleripa doraë ká böt ñi bolökpa ese wakpa.

Itsirla aleripa doraë diché kibiie ikibi aleripa tsata.

E' kuëki ie'pa ñippémitke kàm ikur e' yökì.”

²⁴Rebeca kéwö de, età klöpa kune wèpa. ²⁵Ikéwe èk kune e' tsà dör mashmash ipàkö shamamaë. Ie' kiè mékaitö Esaú.* ²⁶Alà tsá kune e' klöulewa iël tsirla wà iklò kaniñak a iulà et wa. E' kuëki ikiè mékaitö

* 25.25 Esaú: Esaú kiè ñies Seír. Hebreoie Seír wà kiane chè pakò. Génesis 36.8 saú.

Jacob.* Mik Rebeca klöpa kune etä Isaac kī duas tso' dabom teryök (60).

Iyé wā ì tso' mekeat Esaú a
e' kēwō watuēttsaitō

²⁷Klöpa kibinetke. Esaú dör yëria poë. Ie' wöbatsö sulu yëble wa. Erë iël Jacob, e' kè dör es. Ie' serke bèrë. Ie' wöbatsö senuk u a è. ²⁸Iyiwak kañiru tteke Esaú tō e' chkà wa Isaac wöbatsö suluë. E' kuëkī Isaac kī Esaú kiar kibiie Jacob tsatā. Erë Rebeca kī Jacob kiar kibiie Esaú tsatā.

²⁹Kā et tā Jacob tso' ulök. E' dalewa Esaú debitū shtrinewā taië datse kañikā. ³⁰Ie' iché Jacob a:

—Be' we'ikèyö, ì alé be' tō mat se kakmú ye' a ñè. Sulu ye' dué bli wā. E' kuëkī Esaú kiè Edom* ñies.

³¹Jacob tō iiuté:

—Keweie ì mekeat se' yé tō be' a be' dör ilà kibi e' kuëkī, e' kēwō múttsa ye' a chkò i' skéie.

³²Esaú tō iché:

—Ye' tteke bli tō dö' e' tō ye' ttèwā, e' tā ì mekeat se' yé tō ye' a ìie bua' e' dör ye' a?

³³Jacob tō ikī ché ia:

—I' tā be' ttè mú ye' a tō mokī be' tō ye' a imeke.

Etā Esaú tō ittè mé Jacob a yësyësë Skëköl wōā. Es ì mekeat iyé tō ie' a, e' kēwō métttsaitō Jacob a. ³⁴Jacob tō chkò mé ia pan tā. Mik Esaú chké one di' yé one, tā ie' e' kéka tā imía. Ie' dör ilà kibi e' ulà a íyi bua' kēwō tso', e' kè kī ie' tkine yës.

Isaac mīa Guerar

26 ¹E' kēwō ska' tā ketba ane taië ká e' kōs kī wēs ibak Abraham kēwō ska' tā es. E' kuëkī Isaac mīa Guerar wé filisteowak blú serke kiè Abimélec ee. ²Ee Jehová e' kkaché ie' a tā ichéitō ia: “Kè be' minuk Egipto. Be' e' tsúat wé ye' be' a iché ee. ³Be' senúia ká i' kī. Ye' tso' be' tā. Ye' er buaë chöraë be' a. Ká i' kōs meraëyö be' a ñies be' aleripa a. Es ye' ttè muke be' a wēs kewe ime'yö be' yé Abraham a es. ⁴Be' aleripa alöweraëyö taië wēs bëkwö tso' taië es. Ká i' kōs merayö be' aleripa a. Ñies ie'pa batamik ye' er buaë chöraë ká ulitane wakpa a. ⁵Abraham tō ye' ttè kōs e' iütë' buaë. Ttè mé ye' tō ie' a e' kōs blë' buaë ie' tō e' kuëkī ye' tō ttè buaë e' meke be' a ñies.”

⁶Isaac e' tséat senuk Guerar. ⁷Ká e' wakpa tō Isaac a ichaké: “¿Rebeca dör be' yaie?” Erë ie' suane ichök: “Ie' dör ye' alaköl.” E' kuëkī ie' iché: “Ie' dör ye' kutà.” Ie' tō ibikeitsé tō ká e' wëpa tō ie' ttèwami ilaköl buaala kuëkī.

⁸Isaac kī ká de taië ee. Ká et tā, ká e' blú kiè Abimélec, e' tō isuë ukkö tsitsir a tō Isaac tso' ilaköl Rebeca peñuk. ⁹Bet itsuk patkémii-tō tā ichéitō ia:

—¿Mokī tō alaköl se' dör be' alaköl? ¿Ì kuëkī be' tō iyë' kuaë tō ie' dör be' kutà?

Isaac tō iiuté:

—Ye' ibikeitsé tō isalema a' ye' ttèwami ie' kuëkī.

* 25.26 Jacob: Hebreoie s'kiè e' wà kiane chè s'klò kaniñak.

* 25.30 Edom: Hebreoie s'kiè e' wà kiane chè mat.

¹⁰Erë Abimélec tö iché iä:

—¿I kuëki i' wamblébö sa' tã?

Tsir etã wëm wele senéwã ie' tã, e' tã iekkë tã be' tö sa' ké ì sulu wamblök Skëköl wöã.

¹¹Abimélec tö iché sulitane a:

—A' isie tö Isaac tsiriwé ö ilaköl tsiriwé, e' tã e' tterawã.

¹²Duas e' wa Isaac tö dalì kua-tké, wà wöne buaë, Jehovah er buaë ché ie' a e' kuëki. ¹³Ie' de íyi blú taië. Taië íyi tso' ie' wã. ¹⁴Ie' wã obeja ena baka tso' taië. Ñies kanè mésopa tso' taië ie' wã. E' kuëki filisteowak er ttsë'r suluë ie' kî. ¹⁵E' kuëki ie'pa tö di' tum bi' iyé Abraham e' kanè mésopa tö, e' kôs wötéwã íyök wa. ¹⁶Bata ekkë tã Abimélec tö iché Isaac a:

—Be' yöne íyi blu' taië sa' tsatã, e' kuëki ibe' yúshka!

¹⁷Etã Isaac míã senuk Guerar kakkue kî. ¹⁸Eë di' tum bi' iyé tö, e' wöté'wã filisteowak tö iyé blénewa ukuökî tã, e' kôs biéneitö tã ikië mékaitö wës iyé tö ime'ká es. ¹⁹Ká et tã ie' kanè mésopa tso' di' tum biök ká e' kî, etã ie'pa tö di' tum a di' tuökekã taië ese kué et. ²⁰Erë ká e' obeja kkö'nukwakpa debitu ñippök Isaac obeja kkö'nukwakpa tã. Ie'pa tö iché tö di' tum e' dör ie'pa icha. E' kuëki Isaac tö di' tum biule e' kië mékã “Ñippök.” ²¹E' ukuökî tã Isaac kanè mésopa di' tum skà bié et, e' kî iskà ñippé-rak. E' kuëki di' tum biule e' kië mékaitö “Se' ñi bolök.”

²²Ie' míã kãmië ká e' kî, eë di' tum skà biéitö et. E' kè kî ñi bunerak. Ie' iché: “Iñe tã Jehovah tö ká bua' mé se' a wë' tã se' serdaë

buaë.” E' kuëki ká e' kië mékaitö “Ká tso' taië se' a.”

²³E' ukuökî tã ie' míã Beerseba.

²⁴E' nañewe Jehovah de ie' ska' tã ichéitö iä:

“Ye' dör be' yé Abraham e' Këköl.

Ye' tso' be' tã, e' kuëki kè be' suanuk.

Abraham dör ye' kanè méso e' dalërmik ye' er buaë chöraë be' a, ñies be' aleripa alöwëraëyö taië.”

²⁵Eë Isaac tö ák kataté et kã'ie iyiwak jchoie Jehovah dalöioie. Eë ie' sené tã ikanè mésopa tö di' tum bié et eë.

Isaac ena Abimélec

kawö mé ñi a

²⁶Ká et tã, Abimélec datse Guerar debitu ttök Isaac tã. Iyamipa debitu böl ie' tã. Eköl kië Ahuzat. Iëköl kië Ficol. E' dör Abimélec ñippökwakpa wökir. ²⁷Isaac tö iché iä:

—A' éna ye' ar suluë. A' ye' yö'shkar a' ká kî. Etã ¿iök a' do ye' ska'?

²⁸Ie'pa tö iiuté:

—Sa' isuë tö Jehovah tso' be' tã. E' kuëki sa' biteã be' a ichök tö kawö mùwasö ñitã. ²⁹Sa' kè wã be' tsirioule ì wa. Këkraë sa' tö be' kimé. Mik be' manetwã, etã sa' kè wã ì tté ku' a' kî. Iñe tã iwënëwã tö be' a Jehovah er buaë chöke taië. E' kuëki be' tté mú sa' a tö be' kè tö ì sulu wamblepa sa' kî.

³⁰Età Isaac tò kawö buaë tkö'wé ie'pa ta, chké wa di'yé wa. ³¹Bule es bla'mi ta ie'pa tò ikawö mé ñi a tò kè ñippöiarak. E' ukuöki ta ie'pa e' chéat ñi a er bua' wa.

³²E' diwö shà ta Isaac kanè mésopa tso' di' biök, e'pa wä ibiyö de tò sa' di' kué. ³³Ie' tò di' e' kiè méka Sebá. * E' kueki i'ñe ta ká e' kièia Beerseba.

³⁴Mik Esaú ki duas de dabom tkëyök (40), età ie' senéwa alakölpa böl ta. Eköl kiè Judit e' yé kiè Beerí, e' dör hititawak. Iëköl kiè Basemat e' yé kiè Elón, e' dör hititawak ñies. ³⁵Alakölpa böl e'pa tò Isaac ena Rebeca eriawéka tsiriwéka taië.

**Isaac er buaë ché
Jacob ena Esaú a**

27 ¹Isaac dewa kékëpalatke. Ie' kè wöbla wawëria. Ká et ta ilà kibi Esaú e' kiéitö ta ichéitö ia:

—iA alà!

Esaú tò iiuté:

—A yéwö, ìi?

²Età Isaac iché ia:

—Be' tò isué tò ye' kënewatke dö' wekké alè ta ye' duöwa. ³E' kueki ye' ki ikiane tò be' kuaböt klö'ú ta be' yú ye' a yëblök. ⁴Età iwakaneú ña buaë wës ye' wöbatsö iwa es, ta itsúbitu ña katè. E' wa ye' er buaë chöke be' a kam ye' duöwa e' yöki.

⁵Erë Isaac ttöke Esaú ta e' ttsé Rebeca tö. E' kueki mik Esaú mia yëblök kañika ⁶età bet ie' tò iché Jacob a:

—A alà, ye' ttò ttsó. Ye' tò be' yé ttsé ttök be' èl Esaú ta, ta iché ia:

⁷“Be' yú yëblök, e' wakaneú ña buaë ta itsúbitu ña katè. E' ukuöki ta ye' tò be' a iyi kos bua' e' kéwö mekeyö be' a Jehovah wörki kam ye' duöwa e' yöki.” ⁸E' kueki ye' ttò ttsó buaë. ⁹Be' yú chibo pupula bua' bua ese tsúbitu ña bötö ta ikanewëkeyö buaë wës be' yé wöbatsö iwa es. ¹⁰E' ukuöki ta be' tò chké tsúmi be' yé a as inuitö. Es iyi kos e' kéwö atmi be' a be' èl skéie.

¹¹Erë Jacob tò iché imi a:

—Ye' èl pa shamamaë. Ye' kè dör es. ¹²Ye' yé tò ye' kèmi, e' ta ittsewami tò ye' idir, età ie' ichèmi tò ye' tso' ie' dalöseukwa. Ie' kè er buaë chepa ye' a. E' skéie ie' er sulu chöraë ye' ki.

¹³Erë imi tò iiuté:

—A alà, as ie' er sulu chò ye' ki. Ye' ttò iütö. Be' yú chibola chéyö be' a e' tsuk.

¹⁴Età Jacob mia chibola tsuk e' debitu iwa imi a. E' kanewé imi tò buaë wës Isaac wöbatsö iwa es. ¹⁵Ilà kibi Esaú datsi' tso' blëule u a e' bua' bua yëttsa iékaitö ilà tsirla ki. ¹⁶E' ukuöki ta chibola kkuölit wa Jacob ulà ena ikuli' patréwaitö. ¹⁷Chkö bua' ena pan yuétkeitö, e' méitö Jacob a tsèmi iyé a.

¹⁸Jacob dewa iyé ska' ta ichéitö ia:

—A yéwö.

Isaac tò iiuté:

—A alà, ìbe' dör ye' alà wéne ék?

¹⁹Ie' iiuté:

* 26.33 Sebá: Hebreoie di' biule kiè e' wà kiane chè ttè mène ñi a.

—Ye' dör Esaú, be' alà kibi ék. Ì chébö ña, e' kanewétkeyö. Be' e' tkóser iyiwak ttéyö e' katök. E' ukuökì tã be' iyi buaë e' kéwö mekebö ye' a, e' mú ye' a.

²⁰Erë Isaac tö ichaké iã:

—A alà, ¿wes be' ulà de iyiwak e' ska' bet?

Ie' iiuté:

—Jehová dör be' Këköl e' tö ye' kímé e' wa ikuéwayö bet.

²¹Isaac tö iché iã:

—Be' e' skówa ye' o'mik pattsèyö tö mokìe be' dör ye' alà Esaú.

²²Ie' e' skéwa iyé o'mik as ipattsòitö. Isaac tö iché:

—Be' ttò e' dör Jacob ttò. Erë be' ulà e' dör Esaú ulà.

²³Jacob ulà kò shamamaë wes iël kibi ulà es, e' kuëkì Isaac kè éna iane buaë tö e' dör Jacob. Mik ie' er buaë chöketke ilà a, ²⁴etã iskà chakéneitö:

—¿Mokì be' dör ye' alà Esaú?

Ie' iiuté:

—Tó, ye' dör Esaú.

²⁵Iyé tö iché iã:

—A alà, iyiwak ttébö kanewébö e' mú ña katè as ye' er buaë chò be' a.

Ie' tö iyé tié ñies vino mé iã yè. Isaac chké, vino yé. ²⁶E' ukuökì tã ichéitö iã:

—A alà, be' e' skówa ye' o'mik ye' wöalattsó.

²⁷Mik Jacob e' skéwa iyé wöala-ttsök, etã iyé tö idatsi' alattsé tã ier buaë ché ilà a ttè ikké wa:

“Tó, ipaalar wes ye' alà paalar es.

Ie' paalar buaë wes kañikã kkö'nè Jehová tö e' alar è.

²⁸As Skëköl tö be' a mò wöli mè këkraë be' dalikua kì.

As ie' tö be' dalikua kòs e' wöü buaë

as be' wã trigowö tã taië ena vino tã taië.

²⁹Kã kuã'kì wakpa taië as e' dò be' kanè mésopaie.

As ie'pa e' tulòwarak kuchë kì be' wörkì be' dalöiök.

As be' mú dò be' ëlpa wökirie.

As ie'pa e' tulòwã kuchë kì be' wörkì be' dalöiök.

Wépa er sulu ché be' kì, esepa kì Skëköl er sulu ské chöraë.

Ñies wépa er buaë ché be' a, esepa a Skëköl er buaë ské chöraë.”

³⁰Isaac er buaë chétke Jacob a tã Jacob míatke. E' bet tã Esaú tso' yëblök e' dene. ³¹Ñies ie' tö chkè alé buaë, e' mí iwã iyé a tã ichéitö iã:

—A yéwö, dúla ttéyö e' alí kató.

E' ukuökì tã be' er buaë chöke ye' a e' chò ña.

³²Isaac tö ichaké:

—¿Yi dör be'?

Ilà tö iiuté:

—Ye' dör Esaú be' alà kibi.

³³Isaac tkinewã painékã taië tã ichéitö:

—E'ma ¿yi dare yëblök, e' wã chkè debitü ña? E' katéwayö sèraa kãm be' dò e' yökì. E' a ye' er buaë chétke. Es ie' a ye' er buaë ché e' atetke.

³⁴Mik Esaú tö ì ché iyé tö e' ttsé, etã ie' erianekã anekã taië tã ichéitö:

—iA yéwö, ye' a er buaë chò ñies!

³⁵Erë Isaac tö iiüté:

—Be' ël datke ye' kitö'uk e' a ye' er buaë chétke be' skéie.

³⁶Esaú tö iiüté:

—Wëe' ie' kiè Jacob. I' ta bötöki-cha iwambléitö ye' ta i' es. Be' iyi kéwö mekebö ye' a ye' dör be' alà kibi e' kuëki, e' kéwö yë'ttsa ye' ulà a ie' tö kuaë. I'ñe ta be' er buaë chöke ye' a e' yëttsaitö ye' yöki. ¿Warma be' er buaë chöke ye' a e' kè ta'ia?

³⁷Isaac tö iiüté:

—Ittsó. Ye' tö ie' mékatke be' wökirie. Ye' tö be' aleripa kōs e' métke ie' kanè mésopaie. Ñies ye' tö ichétke as chkewö ena vino dò ie' ulà a taië. A alà, ¿i memia ye' tö be' a i' ta?

³⁸Erë Esaú tö ikí ché iyé a:

—A yéwö ¿be' er buaë chöke sa' a e' dör etkè? iYe' a er buaë chó ñies! Eta Esaú iéka taië.

³⁹Isaac tö iché ia:

“Be' serdaë wé mò wöli kè ta' taië ese ska'.

Eë be' dalikua kè wörpa buaë.

⁴⁰Be' ñippöraë tabè wa o'ka ta iíyi kuëki, e' mik be' serdaë.

Be' döraë be' ël kanè mésoie.

Erë mik be' ñippémi ie' ta,

eta be' e' yörattsä ie' ulà a.”

Jacob tkashkar Esaú yöki

⁴¹Isaac er buaë ché Jacob a Esaú skéie. E' kuëki Esaú éna suluë Jacob arke. Ie' ibikeitsé: “Ye' yé duökewatke. Mik iduowa e' kéwö tka, eta ye' ël tterawayö.”

⁴²Mik Rebeca wa ijchenewa tö Esaú tö iël bikeitsé ttèwa, eta Jacob tsuk patkéitö ta iché ia:

—A alà, ittsó. Be' ël Esaú e' pablöke tö ie' be' tterawa. ⁴³E' kuëki ye' ttò ttsó. Be' tkóshkar bet ye' akè kiè Labán serke Harán e' u a. ⁴⁴⁻⁴⁵Be' e' tsúat ie' ska' ká taië dò mik be' ël er buanene be' ki ena i sulu wamblébö e' chowane ie' éna eta. E' ukuöki ta ye' tö be' tsuk patkeraë, e' wa be' döne. iYe' kè ki ikiane tö ye' ala'r bōl e' duòwa diwö etkè a!

⁴⁶E' ukuöki ta Rebeca tö iché Isaac a:

—Esaú alakölpa dör hititawak e'pa tö ye' shtriwétke taië. Jacob senéwa alaköl ese ta, e' ta ye' mú duòwa.

28 ¹Eta Isaac tö Jacob kié ta ishke'wéitö ta ichéitö ia:

—Kè be' senukwa canaánwak ta. ²Be' yú be' duöchke kiè Betuel serke Padán-aram e' ska'. Eë be' senúwa be' nau Labán alà busipa e' eköl ta. ³Skëköl Diché Ta' Íyi Uli-tane Tsata as e' er buaë chō be' a. Ñies as ie' tö be' aleripa alöu taië ká wa'ñe. ⁴Ie' tö iyë'atbak Abraham a tö ká i' meraëitö ie' a. E' ki se' serke shkal. As ie' er buaë chō be' a ena be' aleripa a wes ie' er buaë yë' Abraham a es as ká i' dò a' ulà a.

⁵Es Isaac tö Jacob patkëmi Padán-aram. Jacob demi inau Labán ska'. Labán dör arameowak kiè Betuel, e' alà. Ie' dör Rebeca akè. Rebeca dör Jacob ena Esaú e'pa mi.

Esaú senéwa Mahalat ta

⁶Esaú wa ijchenewa tö Isaac er buaë ché Jacob a ñies tö ipatkëmi-tö ká kiè Padán-aram senukwa eë.

Ñies ie' wā ijchenewā tō mik iyé er
bua' ché Jacob a etā ichéitō iā:

—Kè be' senukwā canaánwak tā.

⁷Ñies ie' wā ijchenewā tō Jacob
mía ká kiè Padán-aram wēs iyé
ena imì tō iché iā es. ⁸Es ie' éna
iane tō iyé kè kī ikiane tō ie'pa
serwā canaánwakpa tā. ⁹E' kuekī
ie' mía alaköl skà yulök Ismael dör
Abraham alà e' ska'. Ee ie' senéwā
Ismael alà busi kiè Mahalat e' tā,
e' dör Nebaiot kutà. Es alaköl kī
tséwāitō eköl e' kè dör canaánwak
wēs imalepa es.

Jacob kabsué Betel

¹⁰Etā Jacob e' yéttsā Beerse-
ba michoë Harán. ¹¹Ie' michoë
wé katuine ikī tā ee ikapere. Ák
méwāitō wökir kataie, e' kī ie'
kapöwā. ¹²Ee ie' kabsué. Ie' isué tō
klökata batsië tkër iski ibata dökā
ká jai a. E' kī ie' isué tō Skëköl
biyöchökwakpa shköke wo'k wa'k.
¹³Ñies ie' isué tō Jehová dur ie'
o'mik tā ichéitō iā: “Ye' dör Jeho-
vá. Ye' dör be' talà, Abraham, ena
be' yé, Isaac, e'pa Këköl. Ká i' wé
be' tēr, e' meraëyö be' a ena be'
aleripa a. ¹⁴Ie'pa alördaë taië wēs
ká po es. Ie'pa michoë senuk ká
wa'ñe. Ye' er buaë chöraë ká ulita-
ne wakpa a be' ena be' aleripa e'pa
batamik. ¹⁵Ye' tso' be' tā. Ye' tō be'
kkö'neraë ká wa'ñe wé be' mir ee.
Be' dörane ye' wā ká i' kī. Kè yö
be' we'ikepa. Ttè kōs méyö be' a, e'
waweraëyö es.”

¹⁶Mik Jacob ti'neka, etā ie' ibi-
keitsé: “Mokī Jehová tso' ká i' kī, e'

kè jcher ye' wā.” ¹⁷Taië ie' suane tā
ibikeitséitō: “Ká i' dör batse'r taië.
iïe dör Skëköl wé! iïe dör ká jai
wékkö!”

¹⁸Bule es tā Jacob e' kéka bla'mi.
Ák méwāitō iwökir kataie, e'
kékaitō duékaatitō iwà kkachoie tō
ká e' dör batse'r. Kiò téitō ák bata
kī iwà kkachoie tō ká e' tso' Skëköl
dalöioie. ¹⁹Ká e' kiè mane'wéttsane
ie' tō Betel* Kewe tā ká e' kiè Luz.

²⁰Ee ie' tō ittè mé Jehová a i'
es: “Be' tso' ye' tā ena ye' kkö'né
be' tō i' ye' mir etā, ena be' tō chkè
ena datsi' mé ye' a, ²¹ñies ye' dene
buaë ye' yé ska', e' kōs wébö ye'
a, e' tā be' klö'weraëyö ye' Këkö-
lie. ²²Ák duékayö i', e' dör iwà
kkachoie tō ië be' dalöiërdaë. A
Skëköl, i kōs mekebö ye' a, e' mú
blatèsö dökā dabop tā e' tsá eyök
meraneyö be' a.”

Jacob demi Labán ska'

29 ¹E' ukuökī tā, Jacob
mía pë' serke diwö tskir-
ke e' ëkä. ²Ee ie' tō di' tum biule
sué et kañikā. E' pamik obeja
daparke mañayök enuk ee di' e'
yekerakitō e' kuekī. Di' tum biule
kkò kī ákkue bërie me'r et. ³Iyiwak
kkö'nukwakpa wöblanewatke tō
as iyiwak ulitane daparkā ee, e'
ukuökī tā ákkue skeuke di' tum
biule kkò kī as iyiwak di'yö. Iyiwak
di'yane one tā ie'pa tō ikkò pabaké-
wane ákkue wa. ⁴Jacob tō iyiwak
kkö'nukwakpa a ichaké:

—A yamipa, éká wé wakpa a'
dör?

* 28.19 Betel: Hebreoie kiè e' wà kiane chè Skëköl wé.

Ie'pa tö iiüté:

—Sa' dör Harán wakpa.

⁵Ie' tö iskà chakéne:

—¿A' wā wēm kiè Labán dör Nahor alà, e' suule?

Ie'pa tö iiüté:

—Tö, e' suule sa' wā.

⁶Ie' tö ichaké:

—¿Is ie' tso'?

Ie'pa tö iiüté:

—Ie' tso' bua'. Isaú. Wì busi datse e' dör ie' alà kiè Raquel e'. Ie' datse iyé iyiwak wëttsé.

⁷Ie' tö iché:

—Ká tso'ia ñiwe. Diwö tso'ia kákké iyiwak dapa'wowa ek tsíní. Ì kuéki a' kè tö di' mè ia tā ièmirak chkök.

⁸Erè ie'pa tö iiüté:

—Kè sa' a e' wamblénuk. Sa' kawöta ipanuk. Mik obeja de seraá, eta sa' tö di' tum kkò ppekeka tā di' meke sa' tö iyiwak a.

⁹Ie' ttöke ie'pa tā, e' dalewa Raquel debitü iyé iyiwak wëttsé, ie' dör iyé iyiwak kkö'nukwak e' kuéki. ¹⁰Jacob tö Raquel sué inau iyiwak wëttsé, e' bet ie' tunemi di' kkò kéka tā iyiwak a di' méitö. ¹¹E' ukuökü tā Raquel shke'wéitö wöa-latséitö tā ie' iékaie ttsé'ne buaé kuéki. ¹²Ie' tö iché ia: “Ye' dör Rebeca alà ena Labán nauyö.” E' bet tā Raquel tunemi ichök iyé a.

¹³Mik Labán tö inauyök tté ttsé, eta bet itunemi inaletsuk. Ipaklö'wéwaitö tā iwöalattséitö tā imítser iwā iu a. Ì kos tka Jacob tā e' pakéitö inau a. ¹⁴⁻¹⁷Tā Labán

tö iché ia: “Mokië be' dör ye' yami ekka.”

Jacob senéwā Lía ena Raquel tā

Labán alà busi bö, ikibi ék kiè Lía, itsirla ék kiè Raquel. Lía wöbla e' kè dör buaala* erè Raquel dör buaala wa'ñe.

Jacob sené Labán ska' dò si' et. E' ukuökü tā Labán tö iché ia:

—Be' dör ye' yami, erè be' kè kawöta kaneblök ye' a éme. Ichó ña íkos be' tö ye' ña'wèmi?

¹⁸Jacob wöbatse Raquel wa, e' kuéki ie' tö Labán iüté:

—Be' tö kawö mé ye' a senukwā Raquel tā, e' tā e' skéie ye' kane-blöke be' a dökā duas kul.

¹⁹Labán tö iiüté:

—Ye' a tā e' dör buaé. Be' je' a ye' tö imèmi buaé. Ye' kè éna imak o'ka a. Be' e' tsúat ye' ska'.

²⁰Es Jacob kaneblé' dökā duas kul Raquel dalërmik. Erè ie' kī Raquel kiane taië, e' kuéki kawö ekké e' ttséitö ká bërber è. ²¹Mik duas kul tka, eta Jacob tö iché Labán a:

—Kawö yé'yö be' a, e' detke. Kawö mú ye' a senukwā be' alà busi Raquel tā.

²²Eta Labán tö sulitane a ishkeñé tö a' shkó ulabatsé e' kéwö tkö'uk. ²³Erè katuine, e' shua Lía mí ie' wā Jacob a Raquel skéie tā Jacob kapé ie' tā. ²⁴Labán tö ikanè méso eka kiè Zilpá, e' me'tke Lía a ikanè mésoie. ²⁵Bule es bla'mi tā Jacob tö isuéwā tö e' dör Lía. Ie' mía Labán ska' tā ichéitö ia:

* 29.14-17 Lía wöbla e' kè dör buaala: Hebreoie tté e' wà kè jcher se' wā bua'iewā. Isalema e' wà kiane ché Lía wöbla dör buaala.

—¿Ì wamblé be' tò ye' ta? Ye' kanéblé be' a Raquel dalërmik. ¿Iók be' tò ye' kītō'wé es?

²⁶Labán tò iiuté:

—Ìe sa' wöblar tò alà busi kibi ese serkewā keweie, e' itōkī itsir-la ék. ²⁷Se' kawōtā Lía ulabatsōke e' kéwō tkō'uk dōkā ká kul. Mik kéwō e' tka, etā ye' tò be' a Raquel meke ñies. Erë be' kawōtā skà kanéblökne ye' a duas kul Raquel dalërmik.

²⁸E' dör buaë Jacob a. Mik Lía ulabatsè kéwō e' diwō tka, etā Labán tò Raquel mé Jacob a alakölie ñies. ²⁹Ñies ie' tò ikanè méso eka kiè Bilhá e' mé Raquel a ikanè mésoie. ³⁰Es Jacob senéwā Raquel ta ñies. Erë ie' kawōtā kanéblökne skà Labán a dōkā duas kul, erë ie' éna idalër kibiie Lía tsata.

Jacob ala'r

³¹Jehová tò isué tò Jacob kè kī Lía kiane bua'ie. E' kuëkī Lía a alà méitō. Erë Raquel kè dōtā' alàë.

³²Lía dunekā alà kune ta ie' tò iché: “Ye' eriarke taië e' sué Jehová tò, e' kuëkī i'ñe ta ye' dalërdaë ye' wëm éna.” E' kuëkī ikiè mékaitō Rubén.*

³³E' ukuökī ta ie' alà skà kune eköl ta ichéitō: “Ye' wëm kè tkine ye' kī e' sué Jehová tò e' kuëkī alà skà méitō ye' a.” E' kuëkī ikiè mékaitō Simeón.*

³⁴Ie' alà skà kéka ta ichéitō: “Ire' ye' ala'r deka mañal e' kuëkī ye' wëm éna ye' dalërmi kibiie.” E' kuëkī ikiè mékaitō Leví.*

³⁵E' ukuökī ta ie' alà skà kéka ta ichéitō: “I'ñe ta ye' tò Jehová kīkekekā.” E' kuëkī ikiè mékaitō Judá.* Etā ekkè è ie' alà dè'.

Raquel ala'r

30 ¹Mik Raquel tò isué tò ie' kè dò alàë, etā ie' sibineka iël kī. Ie' tò iché iwëm a:

—Be' kè tò ye' a alà mè, e' ta ye' duörawā.

²Jacob uluneka ie' kī ta ichéitō ia:

—Ye' dör Skëköl kalì, e'ma ye' a alà mermi be' a. Ie' wák tò be' méat kè dò alàë.

³Ie' tò iiuté:

—Ittsó, ye' kanè méso kiè Bilhá, e' ta be' senú. Mik ie' alà kéka etā e' dör wës ye' alà es. Es ye' döraë alàë ie' batamik.

⁴Es ie' tò ikanè méso Bilhá e' mé iwëm a alakölie, e' ta Jacob sené.

⁵Ie' ta Jacob alà kéka. ⁶Raquel tò iché: “Skëköl tò ye' tsatké buaë. Ie' tò ye' ttò ttsé ta alà méitō ye' a wëm.” E' kuëkī ie' tò ikiè méka Dan.*

⁷E' ukuökī ta Bilhá alà skà kune Jacob ta. ⁸Raquel tò iché: “Ye' ñippé taië ye' èl ta etā ye' e' aléka iki.” E' kuëkī ikiè mékaitō Neftalí.*

* 29.32 Rubén: Hebreoie s'kiè e' wà kiane chè ye' eriane e' suéitō.

* 29.33 Simeón: Hebreoie s'kiè e' wà kiane chè ittsök.

* 29.34 Leví: Hebreoie s'kiè e' wà kiane chè ñita.

* 29.35 Judá: Hebreoie s'kiè e' wà kiane chè Skëköl kīkëkasö.

* 30.6 Dan: Hebreoie s'kiè e' wà kiane chè Skëköl tò s'tsatké buaë.

* 30.8 Neftalí: Hebreoie s'kiè e' wà kiane chè ñippök.

⁹Mik Lía tò isué tò ie' kè dē'ia alàè, età ie' tò ikanè méso kiè Zilpá, e' mé Jacob a alakölie. ¹⁰Zilpá alà kéká Jacob tá. ¹¹Lía tò iché: “iEdaa ì mène ye' a!” E' kuëki ilà kiè mékaitö Gad.*

¹²E' ukuöki tá Zilpá alà skà kéká Jacob tá. ¹³Lía tò iché: “iYe' ttsë'r buaë! Ire' alakölpa kôs tò icheraë tò be' ttsë'r buaë.” E' kuëki ilà kiè mékaitö Aser.*

¹⁴Trigo wö alirke e' këska' tá Rubén míá kañiká. Eë ie' tò kalwö kiè mandrágora* e' alí kué. E' bite iwá imì Lía á. Mik Raquel tò kalwö e' sué tá ichéitö Lía á:

—Be' we'ikèyö, kalwö debitü be' alà wá be' á, e' kakmú ña.

¹⁵Lía tò iiuté:

—¿Be' kè á wè' idir tò be' wá ye' wëm mítser? iKíie tá be' éna kalwö debitü ye' alà wá ye' á, e' yaktsá ye' ulà á!

Erë Raquel tò iché iá:

—Kalwö e' skéie i'ñe nañewe ye' wëm patkekeyö be' tá kapök.

¹⁶Kätuirketke tá Jacob tso' kane-blök e' debitü tá Lía míá iñaletsuk tá ichéitö iá:

—Ye' tò ye' alà mandrágora e' mé Raquel á, e' skéie be' kawöta kapök ye' tá i'ñe nañewe.

E' nañewe Jacob kapé ie' tá. ¹⁷Etá Skököl tò Lía ttò ttsé tá iduneka tá

ilà skà kune Jacob tá. Es ie' alà deká skel. ¹⁸Lía tò iché: “Ye' tò ye' kanè méso mé ye' wëm á e' skéie Skököl ye' á alà i' mé.” E' kuëki ilà kiè mékaitö Isacar.*

¹⁹E' ukuöki tá Lía alà skà kéká Jacob tá, e' tá ideká teröl. ²⁰Ie' iché: “Skököl tò ye' á ì buaë kakmé. Ire' ye' ala'r de teröl. E' kuëki ye' wëm éna ye' dalërdaë jaishet.” E' kuëki ilà kiè mékaitö Zabulón.*

²¹Bata ekké tá ie' alà skà kune alaköl. E' kiè mékaitö Dina. ²²Erë ñies Raquel kímé Skököl tò. Ie' tò ala'r mé iá wës Raquel tò ikié iá es. ²³Ie' duneka tá ilà tsá kune kiè mékaitö José. Ie' tò iché: “Ye' jaëne! siarë e' yéttsá Skököl tò ye' kí.

²⁴Jehová mú tò ye' á alà kí mè iá eköl.” E' kuëki ikiè mékaitö José.*

Jacob iyiwak alöne taië

²⁵José kune e' ukuöki tá Jacob tò iché Labán á:

—Ye' ómine ye' kaska'. ²⁶Ye' alakölpa ena ye' ala'r e'pa mú ye' á as imi'rak ye' tá. Ye' kaneblétke be' á ie'pa skéie. Be' wá ijcher buaë tò kôs ye' kaneblé be' á.

²⁷Erë Labán tò iiuté:

—Be' we'ikèyö. Be' e' tsúatia senuk ye' ska'. Ye' tò itötké tò Jehová er buaë ché ye' á be' batamik.

²⁸Ichó ña kôs be' kí inuköl kiane

* 30.11 Gad: Hebreoie s'kiè e' wà kiane chè *kawö buaë mène*.

* 30.13 Aser: Hebreoie s'kiè e' wà kiane chè *ittsë'r buaë*.

* 30.14 *mandrágora*: Ká e' kéwöska tá ie'pa tò ibikeitseke tò mandrágora wö katé alakölpa tò, e' tá e' tò ie'pa kímèmi dök alàè.

* 30.18 Isacar: Hebreoie s'kiè e' wà kiane chè *ské*.

* 30.20 Zabulón: Hebreoie s'kiè e' wà kiane chè *kakmeule*.

* 30.24 José: Hebreoie s'kiè e' wà kiane chè *ilè kímú*.

be' kanè skéie, e' ma ekkë ye' be' patuèmi.

²⁹Ie' tò iiüté:

—Be' wä ijcher tò ye' kaneblé buaë be' a. Nies ye' tò be' iyiwak kkö'né buaë be' a. ³⁰Mik ye' dë'bitu be' ska', etä be' kè wä i ku' taië. I'ñe tä be' wä iyi tso' taië. Jehová er buaë ché be' a ye' kuëki. Erë zmik ye' kaneblömi ye' wák a? Ye' wöché yamipaë.

³¹Labán tò iskà ché iä:

—¿Kos be' ki ikiane tò be' patuëyö?

Ie' tò iiüté:

—Be' kè tò ye' patau. Erë i chekeyö be' a e' iütó, e' tä ye' tò be' iyiwak kkö'nemi. ³²I'ñe ye' mi'ke be' iyiwak shushtök. Obeja kos dalolo ena chibo kos wöaule shkitshkit ö ulaula ese klö'wekeyö ye' wák a e' patuoie. ³³Mik be' de ye' iyiwak sauk tä ee be' isuëmi tò obeja dalolo ö chibo wöaule shkitshkit ö ulaula ese è tso', e' tä be' wä ijcherwami tò ye' dör wëm yësyësë. E' kè dör es, e' tä be' wä ijcherdaë tò ye' tò be' iyiwak ekiblë.

³⁴Labán tò iiüté:

—Tó, buaë idir. Iüsö wes be' iché es.

³⁵Erë e' diwö shä tä ie' mía ie' iyiwak shushtök. Ie' chibo kos tso' wöaule skëkshkëk ö ulaula ese yéluritö. Nies ie' obeja kos tso' dalolo ese yéluritö tä iméitö ila'r wëpa a kkö'në. ³⁶E' ukuöki tä iyiwak yélur ie' tò e' wëttsë ie' mía shkë dò ká mañat Jacob yökí. Etä Jacob kawöta Labán iyiwak malepa e' kkö'nuk.

³⁷Erë Jacob tò kal kuä'ki kuä'ki dò mañalka e' ulà aki téë. Elka

kië álamö, skà kië almendro, skà kië castaño. Kal ulà kkuölit takla jchëloritö as iwër wöaule saruru skëkshkëk. ³⁸⁻³⁹E' ukuöki tä kal ulà e' tuléwaitö wë iyiwak daparke di'yök e' wöshaë. Eë iyiwak wöbatsöke ñi wa. Iyiwak wöbatsöke ñi wa kal ulà ñe' wöshaë e' ala'rla kos tskirke wöaule skëkshkëk ö shkitshkit ö ulaula. ⁴⁰Iyiwak tskirke wöaule e' kos dapa'wëitö bänet ie' wák a. Eë wë'ñe kos uyéwaitö Labán iyiwak kos wöaule ö dalolo ese a as itskir wöaule ö dalolo. Es ie' iyiwak alörke taië bänet, kè ku' Labán icha tä ñitä. ⁴¹Mik iyiwak bua'buä ese wöbatsöke ñi wa, etä ie' tò kal ulà ñe' tulëwä wë iyiwak di' yöke eë. Es ie'pa tò kal ulà wöaule e' suë mik iwöbatsöke ñi wa e' dalewa. E' ala'rla tskirke kos e'pa dör wöaule. ⁴²Erë mik iyiwak sí po ese datse, etä ie' kè tò kal ñe' tulëwä. E' kuëki iyiwak sí po ese ala'rla kos tskirke e' dör Labán icha. Erë wë bua'buä ese dör ie' icha. ⁴³Es ie' de iyi blú taië. Obeja ena kanè mësopa wëpa ena alakölpa ñies kameio ena burro e' kos tso' ie' wä taië.

Jacob tkakshkar Labán yökí

31 ¹Erë Jacob tò ittse tò Labán ala'r dulakölpa tò ichëke: “Jacob tò se' yé iyi kos e' klö'wëwä, e' wa ie' e' blu'wë taië.” ²Nies ie' tò isuë tò Labán kè tò ie' suëia buaë wes kenet es. ³Etä Jehová tò ie' a ichë: “Be' yüne be' yëpa kaska' wë be' yamipa tso' eë. Ye' michoë be' tä be' kkö'nuk.”

⁴Jacob tò Raquel ena Lía tsuk patké dò wë ie' tso' obeja wëttsë eë ⁵tä ichéitö iä:

—Ye' wā ijchenewā tō a' yé kè kī ye' kianeia wēs kenet es. Erē ye' yé e' Kēköl tso' ye' tā kēkraē ye' kīmuk. ⁶A' wā ijcher buaē tō ye' kaneblé a' yé a moki. ⁷Erē ie' tō ye' kītō'wé kēkraē ye' kanē ské wa. Erē Skēköl kē wā ie' a ikéwō mēne as ì sulu wamblōitō ye' kī. ⁸Mik ie' tō ye' a iché: “Ye' be' patueke iyiwak wōaule shkitshkit ese wa”, etā iyiwak ulitane pane wōaule shkitshkit ème. Mik ie' tō ye' a iché: “Ye' be' patueke iyiwak wōaule shkēkshēk ese wa”, etā iyiwak ulitane pane wōaule shkēkshēk ème. ⁹Es Skēköl tō a' yé iyiwak yē'lur mē ye' a.

¹⁰“Iyiwak wōbatsōke nī wa e' kēwō ska' tā ye' kabsuē tō iyiwak wē'ne wōbatsōke ilāki wa, e' kōs wāk dōr wōaule shkēkshēk ena shkitshkit ena ulāula. ¹¹Kabsuē e' a, Skēköl biyōchōkwak ye' chaké ye' kiè wa tā ye' iūtē: ‘¿Ì?’ ¹²Ie' ye' a iché: ‘Isāú bua'ie tā be' isuēraē tō iyiwak wē'ne wōbatsōke ilāki wa, e' kōs dōr wōaule shkēkshēk ena shkitshkit ena ulāula. Ì sulu kōs wamblé Labán tō be' kī, e' suéyō, e' kuēkī ye' tō iwé es. ¹³Ye' dōr Kēköl dē'bitū be' wōrkī ká kiè Betel eē e'. Eē be' tō ák du'kaāt ye' dalōioie. Eē be' tō kawō me' ye' a. Be' e' kōka bet, be' e' yōttsa ká i' a. Be' yūne wé be' kune eē.”

¹⁴Etā Raquel ena Lía e'pa tō iūtē: —Kè sa' a sa' yé daliukuō tā'ia. ¹⁵Ñies sa' sué sa' yé tō suluē wēs o'ka es. Kīie tā sa' watō'ttsaitō be' a, sa' ské klōō'itō buaē e' ewéwaitō yēs. ¹⁶E'ma kōs Skēköl tō iyi yē'lur sa' yé ulā a, e' dōr sa' icha ena sa'

ala'r icha. E' kuēkī ì kōs ché Skēköl tō be' a e' iūtō.

Jacob e' yéttsa Padán-aram

¹⁷⁻¹⁸E' ukuōkī tā Jacob tō ila'r ena ilakölpa e'pa ké e' tkōkka kameio kī. Ie' iyiwak kōs ena ie' iyi kōs dē' ie' ulā a Padán-aram ikanē skéie, e' patkēmiitō kēweie ie' yōkī. Etā ie' e' yéttsa micho iyé Isaac ska' Canaán. ¹⁹Labán mīa ká bānet ioveja kōyōk tōk, e' dalewa ie' wā iyi diōköl tso' dalōiē e' kōs bléwami Raquel tō. ²⁰Jacob kē wā iyēne Labán a tō ie' mi'keā. Es ie' tō ikité buaē. ²¹Ie' tkashkar. Íyi tso' ie' wā e' kōs wēttsē. Bet tā ie' tkattsa di' kiè Éufrates, e' wīshet. Eē tā ie' micho ká kiè Galaad e' ká kōwō kī.

Labán tō Jacob tōtié

²²Jacob bakshkar e' kī ká de mañat, etā Labán wā ijchenewā tō ie' bakshkar. ²³Etā ie' mīa itōkī iyamipa tā. Ká de kul tā ie' tō ikué Galaad ká kōwō kī. ²⁴E' nañewe Labán kabsuē tō Skēköl de ie' wōrkī tā ichéitō ia: “Ye' ttō ttsō. Kē be' kane ttōk Jacob tā kēsik wa.”

²⁵Ie' de wé Jacob úla tulur Galaad ká kōwō kī eē. Eē ie' ena iyamipa, e'pa tō iúla tuléka kapo-waie ñies. ²⁶Ie' tō iché Jacob a:

—¿Ì wamblé be' tō i' es? ¿Iók be' tō ye' kītō'wé i' es? Be' wā ye' alā busipa bitetser wēs ñippōkwakpa tō s'tsēmi es. ²⁷¿Ì kuēkī be' ye' kītō'wé? Be' tkashkar akir ye' yōkī. Be' e' biyō chópa ye' a, e'ma kawō buaē tkō'wé ye' tō a' wēttsē ttsēne buaē wa, ma'ma kicha tā' ese wa



Jacob yamipa úla tuléka kapowaie. (Génesis 31.25)

ena sabak blar buaë ese wa. ²⁸Kè be' wā kawō méne ye' a ena ye' ala'r busipa ena ye' duöchkepa e'pa a as sa' e' chòat ñi a. Be' tō iwamblé wēs pē' suluë es. ²⁹Ye' wā diché tso' a' ulitane tsajioie buaë, erë eniā nañewe be' yé e' Kèköl tō ye' a iché: 'Ye' ttò ttsó. Kè be' kàne ttök Jacob tā kēsik wa.' ³⁰Be' mitkene be' yé u a wēs be' kī ikiane taië es, etā Ìie be' tō ye' wā íyi diököl tso' dalöiè e' ekiblé?

³¹Etā Jacob tō iiuté:

—Ye' suane be' yōkī. Ye' ibikeits dö' be' ye' yōkī be' ala'r busipa yèttsane er sulu wa. ³²Yi wā be' íyi diököl tso' dalöiè e' tso', e' tā as e' wák duōwā. Se' yamipa kōs tso' íe se' sauk, e'pa wörki be' yú be' íyi yulök. E' kuébö, e' tā itsúmi.

Erë ie' kè wā ijcher tō Raquel tō iyé íyi diököl e' blé'wabitu.

³³Etā Labán tkawā Jacob úla a ie' íyi yulök. E' ukuōkī tā ie' tkawā Lía úla a. Nies Lía ena Raquel kanè

mésopa bōl e'pa úla shuyuléitō. Erë kè ie' wā ikune. Ie' e' yéttsa Lía úla a mía Raquel úla shuyulök. ³⁴E' dalewa Raquel tō iyé íyi diököl bléwā kameio tsikkuō dikia tā ie' wák e' tkéka ibata kī. Labán tō ie' úla ulitane shuyulé erë kè iwa ikune yēs. ³⁵Raquel tō iché ia:

—A yéwö, kè be' ulunuk ye' kī. Ye' e' kōkami be' wörki, erë ye' duöke sik duè wā.

Labán tō ie' íyi diököl yulé taië. Erë kè ie' wā ikune. ³⁶E' kuēkī Jacob uluneka taië tā ichéitō Labán a:

—Ìi sulu wambléyö be' kī, e' kuēkī be' ye' tōtié dò íe? ³⁷Be' tō ye' íyi kōs e' shuyulé tā Ìbe', ì kuébö? E' tuló íe se' yamipa wörki as ie'pa tō ichò tō yi ttè dör mokië, be' ö ye'. ³⁸Ye' kaneblé' be' a duas dōka dabom böyök (20), e' dalewa tā be' chibo ena be' obeja e' kōs tskirke bua' buaë. Be' iyiwak bobokpa kè tkēulettsa yēs. Nies kè

ye' wā be' obeja pupula è kataule-wa. ³⁹Namu tö be' iyiwak ttéwā, e' tã kè ye' wā inú dë'bitu. E' nuí pato' ye' tö be' ā. Niwe ö nañewe be' iyiwak ekiblélur akblökwakpa tö, e' patauk be' tö ye' ka'. ⁴⁰Niwe ye' tteke kaba tö. Nañewe tã ye' tteke kase tö. Kè ye' kapowā buaë. ⁴¹Ye' kaneblë' be' ā duas dabom böyök (20) etā es ye' bak weinuk kekraë. Ye' kaneblë' duas dabom eyök kī tkël (14) be' alā busipa dalërmik. E' ukuöki tã ye' skā kaneblë' duas teröl be' iyiwak kuëki, erë be' bak ye' kitö'uk kekraë ye' kanè ské wa. ⁴²Abraham ena ye' yé Isaac e'pa Këkök kè kupa ye' tã, e' ma be' ye' patkë'bitu ulā wöchka. Erë Skë-köl tö isuë tö ye' siarla, e' kaneblë' taië, e' kuëki ie' tö be' wöuñé enia nañewe.

**Jacob ena Labán e'pa
kawö mé ñi ā**

⁴³Etā Labán tö Jacob iüté:

—Be' alakölpa dör ye' alā busipa. Be' ala'r dör ye' duöchkepa. Obeja kos e' dör ye' icha. Ì kos suëbö ië, e' dör ye' icha è. ¿Wes ye' ā ye' alā busipa ena ye' duöchkepa e'pa ormi? ⁴⁴E' kuëki be' shkó. Mishka kawö muk ñi ā. Es se' wā ijcherdaë tö wes se' kawötā ñi dalöiök.

⁴⁵Eë tã Jacob tö ák duékā ek ie'pa kawö muke ñi ā e' wā kkachoie. ⁴⁶Ie' tö iché iyamipa ā:
—Ák dapa'ú ië.

Ie'pa ulitane tö ák dapa'wé tã ichkérak ák dapaule e' o'mik. ⁴⁷Etā

Labán tö ká e' kiè mékā iwák ttö wa “Jegar Sahadutá”. Nies Jacob tö ikiè mékā iwák ttö wa “Galaad.”*

⁴⁸Labán tö iché:

—Iñe ák ikkë dapa'wéatsö kawö mésö ñi ā e' wā kkachoie.

E' kuëki Jacob tö ká e' kiè mékā es. ⁴⁹Ká e' kine ñies Mispá, wā dör tö Labán tö iché:

—Mik kè se' ñi suneia, etā ās Jehovah tö se' saú tö wes se' ñi wamblöke. ⁵⁰Be' tö ye' ala'r busipa we'iké ö be' senéwā alakölpa kuä'ki tã, e' tã e' suëraë Skëkök tö. Eré kè yi ku' e' sauk chène ye' ā, erë Skë-köl wák tö isuëraë.

⁵¹Etā Labán tö ikí ché Jacob ā:

—Ák dur i' ena ák dapaule i' e' dapa'wéyö se' böi shushaë. ⁵²Ák dur i' ena ák dapaule i' e' dör se' böi ā iwā kkachoie tö ië è se' kawötā dökwa. Kè ye' tköpami be' kker ñippök be' tã. Nies kè be' tköpami ye' kker ñippök ye' tã. ⁵³Abraham dör be' duöchke ena Nahor dör ye' duöchke, e'pa Këkök eköl è, ās e' tö se' shulö.

Etā Jacob tö kawö mé mokië Labán ā Skëkök dalöieke iyé Isaac tö e' wörki. ⁵⁴E' ukuöki tã ie' tö iyiwak jché ña'wé Skëkök dalöioie eë. Ie' tö iyamipa kié chkök. Ie'pa ulitane chké tã ikaperö eë.

⁵⁵Bule es bla'mi tã Labán tö iduöchkepa ena ila'r busipa e'pa wöalattsé e' choat ie'pa ā. Ie' tö iché iarak: a' mú kawö tkö buaë kekraë. E' ukuöki tã imichone ikaska'.

* 31.47 *Galaad*: Ká e' kiè dör böt erë iwā kiane chè ñies. E' dör ák dapaule kawö mène e' wa kkachoie.

Jacob tò Esaú ma'wé er bua'wè

32 ¹E' ukuöki tã Jacob mir è wé imíró eé. Ñalã kî Skëköl biyöchökwakpa de ie' ska'.

²Mik e'pa suéitö, etã ichéitö: “I'pa dör Skëköl ñippökwakpa.” E' kuëki ie' tò kã e' kiè mékã Mahanaim.*

³Etã ie' tò ikanè mésopa patkëmi biyö muk ie' èl Esaú a tò ie' datse. Ie' èl serke kã kiè Seír atë Edom eé. ⁴Ie' tò ichémi ikanè mésopa a: “A' tò ichö ye' èl a: ‘Be' èl Jacob datse be' wöki be' kanè mésoie. Ie' tò ichébitu be' a: Dwas ikkë kôs ye' sené Labán ska'. ⁵Ye' wã baka tso' ena obeja tso' ena burro tso' taië. Ñies kanè mésopa tso' ye' wã taië wëpa ena alakölpa. Be' dör ye' këkëpa. Be' a ttë i' patkëmiyö as be' tò ye' kiöwã er bua' wa.’”

⁶Mik ibiyö wakpa dene, etã ie' a ichéitö:

—Sa' dare be' èl ska', e' wák datse bet be' shké'uk. Etã ie' wã wëpa datse e' tã dökã cien tkëyök (400).

⁷Mik e' ttséitö, etã taië ie' suane. Taië ie' kabikeitséka wës ye' e' ümi. E' kuëki ie' tò iyamipa ena ikanè mésopa ena iobeja ena ibaka ena ikameio e' kôs blabatsélor böi tsiní. ⁸Ie' ibikeitsé tò isalema ye' èl ñippömi ek tsiní tã, e' dalewa iëk tsiní tköshkarmirak. E' kuëki ie' iblabatsélor es. ⁹E' ukuöki tã ie' tò iché Skëköl a: “A Jehová, be' dör ye' talà Abraham ena ye' yé Isaac e'pa Këköl. Be' ye' a iyë': ‘be' yúne be' yamipa ska', etã ye' tò be' kimeräe as be' kawö tkö buaë.’

¹⁰Be' er bua' ché ye' a. Be' kè wã ye' meätule bërbër è. Warma e' kè dör ye' siarla e' a. Ye' bakmi di' Jordán wì a kè wã i tã', e' kèwö ska' tã ye' wã shko kéli è dami. Erë i'ñe tã ye' wöché taië iyiwakie ena se'ie blabutsule böi tsiní. ¹¹Be' we'ikèyö, ye' tsatkó ye' èl Esaú e' ulã a. Ye' suane ie' yöki dö' ie' datse ñippök ye' tã; ñies dö' ye' alakölpa ena ye' ala'rla e'pa kôs ewëwa ie' tò. ¹²Be' tò ye' a iyë'atbak yësyësë tò be' tò ye' kimeräe as ye' kawö tkö buaë. Ñies be' tò iyë' tò ye' aleripa alördaë taië wës dayë tséwö kè shtartã es.”

¹³E' nañewe ie' kapére eé. Iyiwak tso' ie' tã eé e' shushtë ie' tò kakmè ie' èl a. ¹⁴Ikkë shutshtë ie' tò: chibo alaki dökã cien böyök (200); chibo wë'ñe dökã dabom böyök (20); obeja alaki dökã cien böyök (200); obeja wë'ñe dökã dabom böyök (20); ¹⁵kameio alaki pane ñiköl ilã tã, ese dökã dabom mañayök (30); baka alaki dökã dabom tkëyök (40); baka wë'ñe pupula dökã dabop (10); burro alaki dökã dabom böyök (20); burro wë'ñe dökã dabop (10). ¹⁶E' ukuöki tã iyiwak ekkë kôs tuléitö ikanè mésopa a iwakmik iwakmik ulawa ulawa tã ichéitö iarak:

—A' yú ye' yöki kewe. Kã ulat múat iyiwak a ulat ulat as kè iwöiërwã ñitã.

¹⁷Etã kanè méso kewe patkëmiitö e' a ichéitö:

—Mik be' tò ye' èl kué tã ie' tò be' chaké: “¿Yi be' wökir? ¿Wé be'

*32.2 Mahanaim: Hebreoie kã kiè e' wã kiane chè ñippökwakpa böltëpa.

micho? ¿Sekkë dör yi iyiwak?”,
 18 etä iütö: “A kékëpa, iyiwak i' kōs
 e' kak patké be' kanè méso Jacob
 tö be' a. Ie' wák datse sa' itöki.”

19 E' sù ikanè mésopa malepa
 patkëmiitö iyiwak wëttsë, e'pa a
 ichëmiitö ñies:

—Mik a' tö Esaú kué, etä ichö ia
 es è. 20 Kë a' éna ichökwa chë ia:
 “A kékëpa, be' kanè méso Jacob e'
 datse sa' itöki.”

Ie' tö ibikeitsé: “Iyiwak
 patkëmiyö keweie ye' ël a e' dör
 as ie' er buarne ye' ki. E' ukuöki
 ta ye' wák tö isuëmi. Es ie' tö ye'
 kiëwami er bua' wa.” 21 Es iyiwak
 kak patkëmiitö keweie ie' yöki. Erë
 ie' wák e' tsëat kapökrö ie' úla a.

Jacob ñippé kapa wa Skëköl ta

22-23 E' nañewe Jacob e' kéka. Ie'
 tö ilakölpa böl ena e'pa kanè méso-
 pa böl ena ila'r dökä dabom eyök ki
 eköl e'pa kōs dapa'wëitö ta iuyöktsa
 ké di' Jaboc wışhet ñies i kōs tso'
 iwa ekkë uyëttsaitö. 24 Ie' e' tsëat
 eköl. Eë ta wëm de eköl ie' ska' ta
 ie'pa ñippé kapa wa darërë dö kä
 ñine etä. 25 Erë wëm e' tö isuë tö kë
 ie' e' alöpakä Jacob ki. E' kuëki ie'
 tö itëwä itu' wöierkewä e' ki ta itu'
 wöyënettsa. 26 Etä wëm ñe' tö iché
 ie' a:

—Kä ñirkewatke e' kuëki ye' ówa.

Ie' tö iüté:

—Kë be' tö ye' a kawö bua' mè,
 etä kë ye' tö be' epamine.

27 Wëm tö ie' a ichaké:

—¿Ima be' kiè?

Ie' tö iüté:

—Ye' kiè Jacob.

28 Wëm tö iché ia:

—Kë be' kiëia Jacob. Be' kirdaë
 Israel. * Be' ñippé Skëköl ta ñies
 s'ditsö ta etä i kiane be' ki e' de be'
 ulà a, e' kuëki be' kiè mékayö es.

29 Jacob tö ie' a ichaké:

—Ichö ña, ¿ima be' kiè?

Ie' iüté:

—¿Iök be' ki ye' kiè kiane
 jchenuk?

Eë ta wëm ñe' er bua' chë ie' a.

30 Ie' tö kä e' kiè mékä Penuel. *

Ie' tö iché: “Erë ye' tö Skëköl wák
 suëwä ye' wöbla wa, erë kë ye'
 du'wä.” E' kuëki kä e' kiè mékaitö
 es.

31 Mik ie' tkökemitke Penuel, etä
 diwö tschine. Erë ie' tu' wöyënettsa,
 e' kuëki ie' shkōrami shaotshaot.

32 Ie' tēnewä itu'kicha ki, e' kuëki
 dö ikkë ta ie' aleripa kōs kë tö
 iyiwak tu'kicha kateta'.

Esaú er buanene Jacob ki

33 1 Mik Jacob tö isuë tö ie'
 ël datse ena wëpa taië
 datse ie' wä dökä cien tkëyök (400),
 etä ie' tö ila'rla blabatsé. E'pa
 méitö Lía a ena Raquel a ena e'pa
 kanè mésopa böl a. 2 Kanè méso-
 pa böl e'pa patkëmiitö keweie ila'r
 ta. E' ukuöki ta ie' tö Lía ena ila'r
 patkëmi. Bata ekkë Raquel ena ilà
 José e'pa patkëmiitö. 3 Etä ie' wák
 tkami kewe ie'pa yöki. Ie' mirwä
 ie' ël wörki e' dalewa ie' wöëmi
 dö iski es iwöömir dökä kuktöki-

* 32.28 *Israel*: Hebreoie s'kiè e' wä kiane chë ñippé Skëköl ta.

* 32.30 *Penuel*: Hebreoie kä kiè e' wä kiane chë Skëköl wö.

cha (7 veces). Es ie' demi tsinet iël wörki. ⁴Etä Esaú tūnebitu ie' wöki, tā ipaklō'wéwaitō ikuli' a tā iwōa-lattséitō tā iérak ñita. ⁵E' ukuöki tā Esaú tō Jacob alakölpa ena ila'rla e'pa sué tā ichakéitō iā:

—¿Wikkēpa dör yi?

Jacob tō iiuté:

—A kēkēpa, Skēköl tō ala'rla wikkēpa mé ye' a.

⁶Etä ilakölpa kanè mésopa e'pa de ila'rlaē tā iwō éwarak dō iski. ⁷E' ukuöki tā Lía de ila'rē tā ie'pa wöéwa iski ñies. Bata ekkē tā Raquel de ilà José tā etä ie'pa wöéwa dō iski ñies. ⁸E' bet tā Esaú tō ie' a ichaké:

—Iyiwak kuéyō ñalā ki ulawa ulawa ñie e' dör?

Ie' iiuté:

—E' dör as be' er buarne ye' ki.

⁹Esaú tō iiuté:

—Au, kē be' tkinuk ye' ki. Ye' wa itso' taiē. E' tsúat be' wák tō.

¹⁰Erē Jacob tō iskà ché iā:

—Au, kē be' tō ye' ttē watōk-tsa. Be' er buanene ye' ki e' tā iyi kakmekeyō be' a e' klō'ú. Be' tō ye' kiéwā buaē. Be' suéneyō e' dör buaē ye' a wēs Skēköl wák suéyō es. ¹¹Taiē Skēköl tō ye' blu'wé. Kē ì kianeia ye' ki. E' kuēki ye' be' pablē tō iyi kakméyō be' a e' tsú ye' ulā a.

Jacob tō iyiwak watké iā taiē, e' kkēpa iël Esaú tō iyiwak tsé iulā a. ¹²Esaú tō iché iā:

—E'ma mishka ñita. Ye' mi'ke kewe.

¹³Erē Jacob tō iiuté:

—A kēkēpa. Be' wā ijcher bua' tō ye' ala'r iā tsitsirla. Ñies obeja ena baka tso' alàē e' bikeitséyō dō' ishtrirwā tā iduölurmi sekka ká etkēme. ¹⁴Ye' a tā buaē idir tō be' yu'tke kewe, etä wē' ye' do be' itōki enaena wēs ye' iyiwak ena ye' ala'rla shkōmir es. Es ye' mir ie'pa tā dō be' serke Seír eē.

¹⁵Etä Esaú tō iiuté:

—E'ma buaē idir. Kawō mú ña ye' kanè mésopa welepa mukat be' a be' kimoie.

Erē Jacob tō iiuté:

—Au, ñiök be' e' we'ikō ye' wā ekkē chōkle?

¹⁶E' è diwō tā Esaú míane Seír iyamipa tā. ¹⁷Erē Jacob míā ká kiē Sucot* eē. Eē ie' u yué iwák a. Ñies iyiwak wé chali'wéitō. E' kuēki ká e' kiē mékaitō Sucot.

¹⁸Es Jacob manétat Padán-aram dō Canaán. Ie' dettsa buaē. Ie' sené ká kiē Siquem, e' wōsha. ¹⁹Wé ie' tō ká yué e' tuéttsa ie' tō. E' ské dör inuköl wōmulē dōkā cien eyök (100). Hamor dör Siquem yé, e' ala'r tō ká watué Jacob a. ²⁰Ká e' a Jacob tō ák kataté et ka'ie iyiwak jchoie Skēköl dalōioie. E' kiē mékaitō El-elohé-israel.*

Dina dalōsewéwā Siquem tō

34 ¹Jacob alà busi Lía tā kiē Dina, ká et tā e' míā ká e' wakpa busipa pakök. ²Etä Hamor e' dör heveowak e' dör ká e' wōkir, e' aladulaköl kiē Siquem e' tō Dina

* 33.17 Sucot: Hebreoie ká kiē e' wā kiane chē u yöule chalichali.

* 33.20 El-elohé-Israel: Hebreoie kiē e' wā kiane chē Israel Kēköl diché tā' taiē.

sué. Età ie' tò iklö'wéwà tà isenékà ità kèsik wa. ³Erë ie' wöbatse Dina wa taië tà ipabléitö taië. ⁴Età ie' tò iché iyé a:

—A yéwö, be' yú kèkëpa Jacob ska' ilà busi kiöktsà ye' a as ye' serwà ie' tà.

⁵Ì sulu wamblé Siquem tò Dina tà e' jchenewà Jacob wà. Erë ie' aladulakölpa tso' kañikà iyiwak kanéuk, e' kueki ie' kè wà iyëne ie'pa a. ⁶E' dalewa Hamor dör Siquem yé e' mía Jacob ska' ttök ie' tà.

⁷Mik Jacob aladulakölpa dene u a, età ì wamblëne Dina tà e' jchenewà ie'pa wà. E' tò ie'pa uluwéka taië. Siquem senéka Jacob alà busi tà e' dör iyi suluë Israel aleripa a. E' kè kawö tà' wamblë es. ⁸Erë Hamor tté ie'pa tà, tà ichéitö ia:

—Ye' aladulaköl Siquem, e' wöbatse taië a' kutà wa. A' we'ikèyö kawö mú ie' a senukwà ie' tà. ⁹Es a' yörmi sa' yamipaie. Es sa' serwami a' alà busipa tà. Ñies a' serwami sa' alà busipa tà. ¹⁰A' e' tsúat senuk sa' shuà. A' senú sa' ká a wé a' kî ikiane eë. A' tò iyi wataú ena iyi taú. A' tò ká taú. Kè yi tò a' wöklö'wepa.

¹¹Ñies Siquem tté Dina yé tà ena ikëpa tà, età ichéitö ia:

—Ye' a' pablè tò ye' ttè klö'ú. Ye' tò a' a iyi kakmeraë kôs a' kî ikiane ekkè. ¹²Kôs iské* dör e' tsatà a' tò ye' a ikí kié, e' tà ekkè meraëyö a' a. E' kè kî ye' tkine. Ye' tò iyi meraë taië a' a, erë kawö mú ye' a senukwà be' kutà tà.

¹³Erë Siquem tò ie'pa kutà dalösewéwà, e' kueki ie'pa tò ie' ena iyé iuté kachè wa. ¹⁴Ie'pa tò iché ia:

—Kè sa' a sa' kutà menuk wëpa kè tottola kkuölitla tëule tsir, esepa a. E' dör suluë sa' a jaë taië. ¹⁵Es è sa' tò a' iutèmi. A' wëpa kôs tottola kkuölit tée tsir wës sa' es, e' tà sa' tò a' ttò iutèmi. ¹⁶Es a' serwami sa' alà busipa tà. Ñies sa' serwami a' alà busipa tà. Es sa' sermi a' tà ñita wës ká etkè wakpa es. ¹⁷Erë kè a' wà a' tottola kkuölitla tëne wës sa' tò iché a' a es, e' tà sa' míyalne ká i' kî. Sa' kutà mítserne sa' wà.

¹⁸Età Hamor ena ilà Siquem e'pa a imène buaë. ¹⁹Taië duladula e' kî Jacob alà busi kiane, e' kueki bet iwéitö wës ie'pa tò iché es. Ie' dalò taië iyé ska' imalepa tsatà. ²⁰E' kueki ie' mía iyé tà ká kköi-ëule e' wékkö a. Eë ká e' wakpa ñi dapa'uke ttè shuloie. Eë Siquem ena iyé mía ttök iká wakpa tà. Tà ichéitö iarak:

²¹—Pë' debitú ie er buaë se' tà. Ie'pa de senuk se' tà, iyi tauk ena iyi watauk se' shuà. Ká tso' wë' ie'pa a. Se' serwami ie'pa alà busipa tà. Ñies ie'pa serwami se' ichapa tà. ²²Età as se' dò ká etkè wakpaie ie'pa tà ñita, età s'kawötà iuk wës ie'pa tò iché es. Ie'pa tò iché tò se' wëpa ulitane kawötà itóttola kkuölitla tök tsir wës ie'pa wöblane iuk es. ²³Età kôs ie'pa wà iyiwak tso', ì tso' e' doraë se' icha. Sö ichò ie'pa a tó. Età es ie'pa e' tsukeat senuk se' shuà.

* 34.12 iské: E' kéwö ska' tà ie'pa wöblar tò ilà busipa watueke inuaki a.

²⁴Età wëpa tso' ká e' kī kibine-tke, e'pa ulitane a buaë idir. Età ie'pa kōs tottola kkuölitla télor tsir.

²⁵E' ukuöki bökki es tã mik e' dalërkeia taië kè wa ie'pa e' tsatkër, età Jacob aladulakölpa dör Dina akëpa kiè Simeón ena Leví, e'pa míyal Siquem, età ká e' wakpa wëpa télurdakitö seraã tabè wa. ²⁶Es ie'pa tō Hamor ena ilà Siquem e'pa ttéwã tabè wa. Ie'pa tō ikutà yéttsã Siquem u a tã imíyal. ²⁷Ká e' wëpa ttélur seraã. E' ukuöki tã Jacob aladulakölpa malepa debitũ tã íyi kōs tso' ká e' kī e' tsémirakitö. ²⁸Es ie'pa wã obeja ena baka ena burro ena íyi kōs tso' ká kköiëulewã e' a, ñies ì kōs tso' kañikã e' mítser. ²⁹Ñies íyi tso' kōs u a, e' mítser ie'pa wã seraã. Ala'rla kōs ena alakölpa kōs e'pa klö'wélur ie'pa tō ie'pa kanè mésopaie. ³⁰Età Jacob tō iché Simeón ena Leví a:

—A' tō se' tsaié. A' kuëki ká i' wakpa e' dör canaánwak ena fere-seowak e'pa ulurdaë se' kī taië. Ie'pa ñi dapa'uraë ñippök se' tã. Kè se' wã ñippökwakpa tã taië, e' kuëki ie'pa e' alörakã se' kī. Ye' ena ye' yamipa kōs ttelurdaë ie'pa tō.

³¹Erë ie'pa tō iiuté:

—¿Ima ie'pa erbikò tō ie'pa wã sa' kutà mi'mitser wës alakölpa sulusi es?

**Skëköl er buaë ché
Jacob a Betel**

35 ¹E' ukuöki tã Skëköl tō iché Jacob a: “Be' yú

senuk Betel. Eë ák katatò ka'ie ye' dör be' Këköl e' kkayë' be' a mik be' bakshkar Esaú yökī età, e' dalöioie.” ²Età Jacob tō iché iyamipa a ena kōs itso'rak ie' tã, e'pa a ñies:

—Íyi diököl tso' a' wã dalöië, ese kōs tulóttssã bet. A' kuó tã a' datsi' mane'úlor. ³Mishkarak bet Betel. Eë ye' tō ák katateke et ka'ie iyiwak jchoie Skëköl dalöioie. Ie' tō ye' kīme' mik ye' bak erianuk taië età. Ie' tō ye' kköna' kōs ye' káka're ekkë.

⁴E' bet tã íyi diököl tso' ie'pa wã dalöië ese tulérakitö Jacob a. Ñies ikukuöio kōs, e' tulérakitö Jacob a. E' kōs wötéluritö kós klò ter tsinet Siquem e' dikia. ⁵Età ie'pa e' yélur. Erë ká tso' tsinet tsinet e' wakpa kōs suawéka taië Skëköl tō, e' kuëki e'pa kè wã ie'pa töiëne.

⁶Età Jacob ena iyamipa kōs demi ká kiè Luz atë Canaán. Ká e' kiè ñies Betel. ⁷Età eë ák katatéitö et ka'ie iyiwak jchoie Skëköl dalöioie. Eë Skëköl e' kkayë' ie' a mik ie' bakshkar iël yökī età. E' kuëki ák katatéitö e' kiè mékaitö El-Betel.*

⁸E' ukuöki tã ká e' a Rebeca kkö'nukwak bak kiè Débora, e' blënewã tã inú bléwarakitö kós klò ter eë e' dikia. Kal e' ter ká kiè Betel e' o'mik. Jacob tō ká e' kiè méka “Ië kéli”.

⁹⁻¹⁰Mik Jacob biteane Padán-aram dene Canaán, età Skëköl e' kkachéne etökichane ie' a. Età Skëköl er buaë ché ie' a i' es:

“Be' kiè Jacob,

* 35.7 *El-Betel*: Hebreoie kiè e' wã kiane chè *Skëköl tso' Betel*.

erë be' kè kièiä es.
I'ñe tä be' kiè mékayö Israel.”

Skëköl tö ie' kiè mane'wëttsä,
11 e' ukuöki tä ichéitö iä:

“Ye' dör Skëköl Diché Tä' Ýyi
Ulitane Tsätä e';
Be' ala'r ena be' aleripa alönú
taië.

Be' aleripa alördaë taië,
e'pa döraë ká taië wakpaie.
Ñies ie'pa shüä blu'pa döraë.

12 Ká me'bakyö Abraham ä ena
Isaac ä,
e' méyö be' ä ñies be' aleripa
ä.”

13 Mik Skëköl tté one Jacob tä, tä
imía. 14 Eë Jacob ák duékä ek sè sù.
Ák e' ki ie' tö kiö ena vino té iwà
kkachoie tö e' dör batse'r Skëköl ä.
15 Ká e' kiè mékaitö Betel.

Raquel blënewä

16 E' ukuöki tä ie'pa e' yélur
Betel míyal Efrata. Kam ie'pa dõmi
Efrata e' tso'ia elkeë, etä Raquel
alà kurketke e' diwö de. E' tö
Raquel kiri'wëwä taië erë kè iwà
kür yës. 17 Ie' tso'tke suluë ichók
etä ikkö'nukwak dur eë, e' tö iché
iä: “Kè be' suanuk. Be' alà küne.
E' wák dör wëm.” 18 Etä Raquel
wake' duökewätke, isiwa' bata
tkökeiä, e' shüä ilà kiè mékaatitö
Ben-oní. * Erë ilà yé tö ikiè mane'wé
Benjamín.*

19 Es Raquel blënewä. Inú wöté-
warakitö Efrata ñalé ki. I'ñe tä ká
e' kiè Belén. 20 Etä wé Raquel nu
blëwaitö e' ki ák duékä ek Jacob
tö iwà kkachoie. I'ñe tä ák e' tkëriä
Raquel pö kkachoie.

21 Etä Israel* michoë wé imi'kerö
eë. Ie' e' tséat senuk ká kiè Mig-
dal Éder e' wishké. 22 Ie' tö ká yué
senoie eë, e' ukuöki tä ilà Rubén
senékä ie' alaköl kiè Bilhá e' tä, e'
jchenewä ie' wä.

Jacob aladulakölpa

Jacob aladulakölpa dökä dabom
eyök ki böi (12). 23 Ie' ala'r Lía tä e'pa
dör Rubén, e' dör ikibi, ñies Simeón,
Leví, Judá, Isacar ena Zabulón.
24 Ila'r Raquel tä e'pa dör José ena
Benjamín. 25 Raquel kanè méso kiè
Bilhá, e' tä ila'r dör Dan ena Neftalí.
26 Lía kanè méso kiè Zilpá, e' tä ila'r
dör Gad ena Aser. E'pa dör Jacob ala-
dulakölpa küne Padán-aram e'pa.

Isaac blënewä

27 Jacob mineä iyé Isaac sauk ká
kiè Mamré eë. Ká e' kiè ñies Arbá
ö Hebrón. Ká e' ä Abraham ena
Isaac bak senuk. 28-29 Isaac këne-
wätke. Mik ie' ki duas tso' cien
eyök ki dabom paryök (180), etä
iblënewä mía idëütöpa itöki. Ila'r
Esaú ena Jacob e'pa tö inú wötewä.

Esaú aleripa

36 1 I'pa dör Esaú aleripa.
Esaú kiè ñies Edom. 2 Esaú

* 35.18 Benoni: Hebreoie s'kiè e' wà kiane chè ye' *griane* e' alé.

* 35.18 Benjamín: Hebreoie s'kiè e' wà kiane chè ye' *ulà bua'kka* e' alé.

* 35.21 Israel: E' dör Jacob kiè pa'alí me'ká Skëköl tö iki e'.

senéwā canaánwak alakölpa mañal tã. Eköl dör Adá, e' dör hititawak kiè Elón, e' alà busi. Iëköl kiè Oholibamá, e' dör Aná alà busi ena heveowak eköl kiè Sibón, e' talà.

³Bata ék kiè Basemat, e' dör Ismael alà busi ena Nebaiot kutà. ⁴Adá alà tsá kune e' kiè Elifaz. Basemat alà kiè Reuel. ⁵Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán etã e'pa.

⁶Esaú wã ilakölpa ena ila'r wëpa ena ila'r busipa ena imalepa kôs serke ie' ska' e'pa kôs míyal ie' wã e' tã senuk kã bānet iël Jacob e' yökí. Nies ie' wã iyiwak kôs ena ì kôs dë' ie' ulà a Canaán, e' mítser sërãã. ⁷Esaú ena Jacob wã iyi tso' taië. E' kuëkí ie'pa kè chë'kaiã ñita. Kè ì ku'ia wë' ie'pa böl iyiwak a katè. ⁸E' kuëkí Esaú (e' kiè ñies Edom) e' mía senuk Seír kébata a.

⁹I' dör Esaú aleripa bak senuk Seír ké köwö kí, e'pa kiè edomwak. ¹⁰I'pa dör Esaú ala'r: Elifaz e' dör Esaú alà Adá tã, ena Reuel e' dör Esaú alà Basemat tã.

¹¹Elifaz ala'r dör Temán, Omar, Sefó, Gatam ena Quenaz. ¹²Elifaz alaköl skà bak eköl kiè Timná, e' tã ilà tã' eköl kiè Amalec. E'pa dör Esaú alaköl kiè Adá e' uyökpa.

¹³Reuel ala'r dör Náhat, Zérah, Samá ena Mizá. E'pa dör Esaú alaköl kiè Basemat e' uyökpa.

¹⁴Esaú alaköl kiè Oholibamá, e' dör Aná alà busi ena Sibón talà. Ie' ala'r dör Jeús, Jaalam ena Coré.

¹⁵I'pa dör Esaú aleripa e'pa ditséwöpa wökirpa:

Esaú alà kibi kiè Elifaz e' aleripa dör: Temán, Omar, Sefó, Quenaz,

¹⁶Coré, Gatam ena Amalec. E'pa dör Elifaz aleripa e'pa ditséwöpa wökirpa bak senuk Edom. Ie'pa dör Adá uyökpa.

¹⁷Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwöpa wökirpa bak senuk Edom. Ie'pa dör Basemat uyökpa.

¹⁸Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwöpa wökirpa.

¹⁹E'pa kôs dör Esaú (kiè ñies Edom) e' aleripa. E'pa dör ie'pa ditséwöpa wökirpa.

²⁰I'pa dör wëm dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, ²¹Disón, Éser, ena Disán. E'pa dör Seír ala'r wëpa. Ie'pa dör horeowak wökirpa bak senuk Edom. ²²Lotán ala'r dör Horí ena Hemam. Lotán kutà dör Timná. ²³Sobal ala'r dör Alván, Manáhat, Ebal, Sefó ena Onam. ²⁴Sibón ala'r dör Aiá ena Aná. Kã e' tã Aná tso' iyé kiè Sibón e' burro kkö'nuk e' dalewa ie' tö di' tum kué taië kã sí po e' a. ²⁵Aná alà wëm kiè Disón. Ie' alà busi kiè Oholibamá. ²⁶Disón ala'r dör Hemdán, Esbán, Itrán ena Querán. ²⁷Éser ala'r dör Bilhán, Zaaván, ena Acán. ²⁸Disán ala'r dör Us ena Arán.

²⁹Horeowak wökirpa dör Lotán, Sobal, Sibón, Aná, ³⁰Disón, Éser, ena Disán. E'pa dör horeowak wökirpa iyamipa wa. Ie'pa bak senuk Seír.

³¹I'pa dör Edom blu'pa, kãm Israel aleripa blúpa dò e' yökí.

³²Bela, e' dör Beor alà, e' de Edom wakpa blúie. Ie' ká kiè Dinhaba. ³³Bela blënewa e' skéie Jobab yöne blu'ie. Ie' dör Zérah alà. Ie' datse Bosrá. ³⁴Jobab blënewa e' skéie Husam datse Temán e' yöne blu'ie. ³⁵Husam blënewa e' skéie Hadad dör Bedad alà e' yöne blu'ie. Bedad e' ali'ka Madián wakpa kî ká kiè Moab ee. Husam ká kiè Avit. ³⁶Hadad blënewa, e' skéie Samlá yöne blu'ie. Ie' ká kiè Masrecá. ³⁷Samlá blënewa, e' skéie Saúl yöne blu'ie. Ie' ká dör Rehobot. Ká e' ate di' kkò a tsinet. ³⁸Saúl blënewa, e' skéie Baal-hanán yöne blu'ie. Ie' dör Acbor alà. ³⁹Baal-hanán blënewa, e' skéie Hadad yöne blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

⁴⁰I'pa dör Esaú aleripa kiè iyamipa wa ñies iká wa: Timná, Alvá, Jetet, ⁴¹Oholibamá, Elá, Pinón, ⁴²Quenaz, Temán, Mibsar, ⁴³Magdiel ena Iram. Esaú kiè ñies Edom. E'pa qos dör Edom ká blu'pa wé isenerak iká kî ee.

37 ¹Jacob e' tséat senuk Canaán wé iyé bak senuk ee. ²Ttè i' dör Jacob aleripa e' pakè.

José ena iëlpa

Jacob alà kiè José, mik e' kî duas tso' dabom eyök kî kul (17) etá ie' tso' iyé obeja kkö'nuk iëlpa ta. Iëlpa dör iyé alakölpa kiè Bilhá ena Zilpá, e'pa ala'r. Etá i sulu qos wambleke iëlpa tö ie' wöwa, ese kcateke seraá ie' tö iyé a.

³Ie' kune mik iyé Jacob kënewatke etá. E' kueki Jacob kî ie' kiar

ila'r malepa tsata. E' kueki Jacob tö datsi' yué ie' a kitküle buaë.

⁴Erë mik ie' ëlpa wa ijchenewa tö ie'pa yé kî ie' kiar ie'pa ulitane tsata etá ie'pa éna iar suluë, kë ishke'weta'.

⁵Ká et ta ie' kabsué e' pakéitö iëlpa a. E' kueki ie'pa éna suluë ie' kí ane. ⁶Ie' tö ikabsué paké iëlpa a i' es:

—Ye' ttò ttsó. Ye' kabsué e' pakekeyö a' a. ⁷Ye' kabsué tö se' ulitane tso' kanablök kañika dalì shüa. Se' tso' dalì wöshtök e' tsatésö ettsak ettsak. Ye' tö isuë tö bet ye' icha e' duéka bua' shkë'ka. A' ichapa e' dapa'wé ye' icha pamik shkit ta e'pa tö ye' icha dalöié.

⁸Etá iëlpa tö iüté:

—¿Be' éna iwà chak tö be' döraë sa' blúie? ¿Sa' serdaë be' dikia?

Ie' kabsué ena wës ipakéitö ie'pa a, e' kueki ie'pa éna suluë ie' kí ane.

⁹E' ukuöki ta ie' skà kabsuéne, e' pakéitö iëlpa a ñies. Ie' tö iché ie'pa a:

—Ye' kabsué tö diwö ena si'wö ñies bëkwö döka dabom eyök kî et (11), e' qos tö ye' dalöieke.

¹⁰Mik ie' tö ikabsué e' paké iyé a ena iëlpa a, etá iyé tö iuñé:

—¿Ì kiane chë be' kî kabsué e' wa? Ttsëskua be' mì ena be' ëlpa ena ye', sa' kawöta be' dalöiök.

¹¹Ie' ëlpa éna iar suluë. Erë iyé tö ibikeitsé taië: ¿ì kébisué José tö es?

José watuéttsa iëlpa tö

¹²Ká et ta José ëlpa míyal dò Siquem iyé iyiwak wëttsë kakö yulök. ¹³Etá Jacob tö iché José a:

—Be' ëlpa tso' tsinet Siquem iyiwak kkö'nuk. Ye' kî ikiane tö be' yú isauk.

Etä José tö iiuté:

—E' buaë. Ye' mí isaukrak.

¹⁴Jacob tö iiuté:

—Èkèkè. Be' yú be' ëlpa sau, is itso'rak, is iyiwak tso' ñies. E' wa be' wä ye' ä itté dõmine.

Etä Jacob tö ie' patkëmi. Ie' e' yéttsa Hebrón ké kkue kî mía Siquem. ¹⁵Eë ie' shkòdur chò kañika, e' kuéwä wëm eköl tö tä e' tö ie' ä ichaké:

—¿Ì yulök be' tso'?

¹⁶Ie' tö iiuté:

—Ye' tso' ye' ëlpa yulök. ¿Be' kè wä ijcher wé ie'pa tso' ye' yé iyiwak kkö'nuk?

¹⁷Wëm e' tö iiuté:

Ie'pa kè ku'ia ië. Ie'pa mineyalbak. Ye' ittò ttsérak tö ie'pa mi'keä Dotán.

Etä ie' mía iëlpa yulök. Etä ie'pa kuéitö Dotán. ¹⁸Etä iëlpa tö ie' sué kamië tö ie' datse. Kam idò e' dalewa iëlpa kawö mérak ñi ä ie' ttowä. ¹⁹Ichérakitö ñi ä:

—Kabsaukwak datse. ²⁰Ittöwasö. Inú batröömiso kauk kè ä di' tä' ese ä. Etä ichösö tö iyiwak sulusi ie' katéwa. Es ie' kabsuë e' kè wä tkòpa yës.

²¹Mik Rubén tö ttè e' ttsé, etä ie' éna iël tsatkak. E' kuëkî ie' tö iché iëlpa ä:

—Kè ittarwä. ²²Kè a' tö ie' pé tkö'uk. A' tö iómi kauk i' ä. Kè a' ulà mukkä iki.

Rubén éna José tsatkak tsèmine iyé ä, e' kuëkî ie' tö iché ie'pa ä es. ²³Erë mik José debitü iëlpa ska', etä ie'pa tö ie' datsi' kîtkëule bua', e' yéttsa. ²⁴Etä iklö'wëwarakitö

batréemi, kauk tso' di' blóie, erë kè iwà tä' ese ä.

²⁵E'ukuökî tä ie'pa e' tuléwä chkök, e' shuä ie'pa isuë tö taië Ismael aleripa datse. E'pa datse Galaad michoë Egipto dalì dami iwä e' watauk. Kameio kî ie'pa wä kiò alar buaë e' dami. Ñies kiò masmas kiè bálsamo ena mirra e' dami iwä. ²⁶Etä Judá tö iché iëlpa ä:

—Se' ël ttéwasö tä e' tté blésö, e' tä e' wa ¿i buaë dõmi se' ulà ä? ²⁷Ye' ichè buaë idir tö iwatauttsasö Ismael aleripa ä. Ie' dör se' ël se' yami ekka, e' kuëkî kè sö ittöwä.

E' mène buaë iëlpa ä. ²⁸Mik iyi wataukwakpa datse Madián e'pa tkami eë, etä ie'pa tö iël yéttsa kauk ä watuéttsarakitö Ismael aleripa ä inuköl wömule dökä dabom böyök (20) ské ekkè. Es Ismael aleripa wä José minetser Egipto.


²⁹Mik Rubén debitü kauk kkò kî, etä kè iël ku'ia. E' tö ie' eriauwé taië. E' kuëkî idatsi' jchélor. ³⁰E' ukuökî tä, ie' mía iëlpa ska' tä ichéitö ie'pa ä:

—Se' ël tsirla kè ku'. ¿Wës ye' e' ùmi?

³¹Etä ie'pa tö chibola ttéwä tä e' pé wa José datsi' patiëkarakitö.

³²Etä datsi' e' patkëmiitö iyé ä tä ichémi ia: “Datsi' i' kué sa' tö. Ì sau bua'ie. ¿Kè idör be' alà datsi'?”

³³Etä Jacob tö iché: “iTó, i' dör ye' alà datsi'! Iyiwak sulusi wésele tö ye' alà ttéwä katéwa.” ³⁴Etä Jacob tö idatsi' jchéloyar eriane kuëkî. Etä datsi' tso' iëno mik schönewä ese iékaitö. Etä ilà blënewä e' eriaitséitö ká taië. ³⁵Etä ila'r, wëpa ena alakölpa, e'pa qos de ie' pablök,



Ismael aleripa wā dali dami kameio kī watuē. (Génesis 37.25)

erë kè ie' pablër yës. Ikí iuke taië shütë ilà dalërmik. Ie' tò iché: “Ye' schó eriaitséraë dò mik ye' duowa ekkë, es ye' döraë ie' ska'.”

³⁶Etā madiánwakpa demi Egipto. Eë ie'pa tò José watuëttsa wëm kiè Potifar e' a. Wëm e' kaneblöke Egipto blú a. Potifar dör Egipto blú tsatkökwakpa e' wökir.

Judá ena Tamar

38 ¹E' kéwö ska' tā Judá e' batséttsa iëlpa yökí míá senuk wëm kiè Hirá e' ska'. E' serke ká kiè Adulam. ²Eë Judá tò alaköl sué eköl. E' dör wëm canaánwak kiè Súah e' alà busi, e' tā ie' senéwa. ³E' ukuökí tā idunekā tā ilà kune wëm, e' kiè mékaitö Er. ⁴E' ukuökí ilà skà kune wëm, e' kiè mékaitö Onán. ⁵E' ukuökí tā ilà skà kune wëm, e' kiè mékaitö Selá. E' kune mik ie' serke ká kiè Quezib, eë etā.

⁶Judá tò alaköl yulé senowaie ilà kibi kiè Er e' tā. E' kiè Tamar. ⁷Etā Er serke suluë shütë Jehová wöa. E' kuëki Jehová tò ittéwa. ⁸Etā Judá tò iché Onán a:

—Be' kawötā senukwā be' dabököt tā alà kòkā be' èl blënewā e' a wës se' wakpa a imeneatbak es.

⁹Onán éna iane tò ie' alà kurmi kos ischó tā, e' kè dör ie' wák ala'r. E' kuëki mik ie' serke ischó tā, etā bet tā ie' e' skéu bānet as kè alà kòkā ischó tā. Es ie' kè wā iël a iditséwö meneat. ¹⁰E' dör suluë ichók Jehová a, e' kuëki ie' tò Onán ttéwa ñies. ¹¹Etā Judá tò iché iyāk Tamar a:

—Be' yú senuk be' yé u a wës schó es dò mik ye' alà Selá talane etā.

Erë Judá tso' Tamar kit'ö'uk. Ie' ibikeitsé tò Selá duowami wës iëlpa duolur es. Es Tamar minea senuk iyé ska'.

12Ká de taië tá Judá alaköl dör Súah alá busi e' blënewa. Ie' schó kéwö tka tá ie' mía ká kiè Timnat, wé itso'rak ie' obeja köyök tök eë. Ie' yami kiè Hirá e' dör adulamwak, e' mí ie' tá ie' wapiöuk. 13-14Tamar tö isuë tö Judá alá kiè Selá, e' detke këchke erë kè ie' senëwa ie' tá. E' wa ie' wá ijchenëwa tö Judá tö ie' kitö'wé Selá wa. E' kueki mik ie' wá ijchenëwa tö inuaki mía Timnat iobeja köyök tök, eta ie' e' paiöke schóie e' mane'wëttsaneitö. Iwö pabakëwa datsi'tak wa as kè yi a iwërwa. Eta imía ká kiè Enaim. Eë ie' e' tkéser Timnat ñalé kkò a.

15Mik Judá tö Tamar suë tá ie' ibikeitsé tö e' dör alaköl sulusi iwö pabakëwa e' kueki. 16Eta ie' mía iwöki. Kè ie' wá iëri tá' tö e' dör ie' yàk. Eta ichéitö ia:

—¿Se' ser ñita?

Eta Tamar tö iché ia:

—¿Ì meke be' tö ye' a iskéie?

17Eta Judá tö iiuté:

—Ye' chibo patköke be' a etö iskéie.

Ie' iiuté:

—Èkëkë. Erë be' íyi tsá múat ye' a dò mik be' tö chibola patké eta.

18Judá tö ie' a ichaké:

—¿Ì kiane be' kî tö ye' imèat be' a?

Eta ie' tö iiuté:

—Be' tabechka tso' e' kiè shtoië, e' múat ye' a ikichaë. Ñies be' shko kéli múat ye' a.

Judá tö imé ia tá ie' sené ie' tá. Eta alaköl duneka. 19E' ukuöki tá Tamar mía iu a eta idatsi'tak wa iwö pabakëwa e' yëttsaitö. Eta ie' e' paiéne schó es.

20E' ukuöki tá Judá tö chibo patkëmi iyami adulamwak e' ulà a as ie' tö imù alaköl a as alaköl e' tö ie' íyi méat alaköl ulà a e' mübitune. Erë ie' yami kè wá alaköl e' kuneia. 21Eta ie' tö ká e' wakpa a ichaké:

—Alaköl sulusi e' dör enaimwak atéat ñalá ska', ¿wé e'?

Eta ie'pa tö iiuté:

—Íe alakölpa sulusi kè dë'.

22Eta ie' biteane Judá wörki tá ichéitö ia:

—Kè ye' wá alaköl kune. Ye' tö ichaké ká e' wakpa a. Ie'pa tö ye' a iché: 'Íe alakölpa sulusi kè dë'.'

23Judá tö iiuté:

—As ye' íyi tsúatitö es kè yi tö sa' jaëwëpa. Kè ye' iane iwiie. Ye' tö ichibo patkëmi be' ulà a, erë kè be' wá alaköl kune.

24Eta si' mañat ulatök tá Judá kî biyò de tö:

—Be' yàk Tamar e' sene' wëpa kuä'kî tá. Ie' duneka.

Eta Judá tö iché aneule:

—ìIyóttsa tá ñña'úwa!

25Erë mik ie' yekettsa ie'pa tö ttëwa, e' wösha ie' ttè mémi inuaki a: “Yi íyi a'tser ye' ulà a i', e' wák tö ye' duéka. Be' isaú. ¿Yi kiè shto tabechka i' ikichaë ena shko kéli i'? ¿e' suule be' wá?” 26Mik Judá tö ie' íyi suëwa iyàk ulà a tá ichéitö: “Alaköl i' dör buaë. Kè ye' wá iulabatse ye' alá Selá tá. Ye' e' wamblé sulu ie' kî.” Eta kè ie' seneia ie' tá.

27Tamar alá kune klò wák dör wëpa. 28Itsörke e' wösha, eta eköl ulà dettsa kewe. Eta ie' kkö'nukwak tö datsi'kicha batsë e' muëwa ilà ulà mik tá ichéitö: “I' ék

kune kewe.” ²⁹Erë e' wöshaë bet ta alà ulà tiéwane etökichane età iëk kune keweie. Età ikkö'nukwak tō iché iā: “¿Wes be' kune keweie?” E' kueki ikiè mékaitō Fares. * ³⁰E' ukuöki tā, iulà a datsi'kicha tkër batsë e' kune, e' kiè mékaitō Zérah.

**José tkashkar Potifar
alaköl ulà a**

39 ¹José minetserak iwā Egipto. Kā e' ki wëm tso' eköl kiè Potifar, e' tō ie' tuëttsa Ismael aleripa a. Wëm e' kane-blöke Egipto blú a. Ie' dör Egipto blú tsatkökwakpa wökir. ²Erë Jehová tso' José tā, e' kueki i kōs kanewekeitō e' dōkettsa buaë iwökir egiptowak e' ska'. ³Iwökir tō isuë tō Jehová tso' José tā, e' kueki i kōs kanewekeitō e' dōkettsa buaë. ⁴E' kueki iwökir ki iklarke taië. Ie' tō iméka ie' wák kimukwakie. Nies imékaitō ie' íyi kōs e' kuebluie. Ie' wā íyi kōs tso' e' kkö'nekeitō. ⁵Mik Potifar tō ie' méka íyi kōs kuebluie, etā Jehová er buaë chémi Potifar a. Ie' íyi kōs tso' iu a ena kañikā e' kōs mir buaë. ⁶José tō Potifar íyi ulitane kkö'neke buaë. E' kueki Potifar kē wöki i wëneia yës. I ñak ie' éna e' è bikeitsekeitō.

José wák dör bua'blukā. ⁷Kā de iki taië etā iwökir alaköl wöbatsekā iwa. Kā et tā ie' iché iā:

—Be' senúka ye' tā.

⁸Erë José kē wā ie' ttè iütëne tā ichéitō iā:

—Ye' ttō ttsó. Ye' wökir íyi ulitane méat ye' ulà a sunoie. Ye' tso' íe,

e' tā kē ie' tkine ie' íyi kōs ki. ⁹Ye' tso' ie' u kueblu kibiie. Ye' wökir kē wā i kkëone ye' ki. Be' è kē meneat iwā ye' a be' dör ie' alaköl e' kueki. ¿Wes ye' tō i sulu i' wamblëmi be' tā? ¿Wes ye' tō i sulu wamblëmi Skëköl ki?

¹⁰Këkraë alaköl tō ie' a iche-ke: “Be' senú ye' tā.” Erë ie' kē tō iütetā yës. Ie' tō iulawaté këkraë.

¹¹Kā et tā ie' tkawā weshkë íyi kanéuk etā iwökir alaköl e' è tkër.

¹²Etā iwökir alaköl tō ie' klö'wéwā idatsi' a tā ichéitō iā:

—Be' senú ye' tā.

Erë ie' tkashkar iulà a mía tuneule. Ie' datsi' yënettsaat alaköl ulà a. ¹³Mik iwökir alaköl tō isuë tō José datsi' atë ie' ulà a ¹⁴etā ie' tō ikanè mésopa kié tā ichéitō ie'pa a:

—Isaú, ye' wëm wā hebreowak dë'bitu e' tso' se' wayuök. Ie' dewā ye' ska'. Ie' senakkā ye' tā kësik wa erë ye' anekā taië. ¹⁵Mik ie' ittse tō ye' anekā taië tā ie' tkashkar tuneule. Ie' datsi' yënettsaat e' atë ye' ulà a.

¹⁶E' ukuöki tā ie' tō José datsi' blé kkayënoie iwëm a mik idene etā. ¹⁷Mik iwëm dene, etā ipakéitō iā tā ichéitō iā:

—Be' wā hebreowak dë'bitu kanè mésoie, e' tkawā weshkë ye' ska'. Ie' senakkā ye' tā. ¹⁸Erë mik ye' anekā taië, etā ie' tkashkar tuneule tā idatsi' atë tēr íe. ¹⁹Es be' kanè méso tō ye' dalösewéwā.

Mik iwökir tō ttè e' ttsé etā ilunekā taië. ²⁰⁻²¹José klö'wéwaitō

* 38.29 Fares: Hebreoie s'kiè e' wā kiane chë tkabitu keweie.

wötökwā patkéitō wé Egipto blú bolökpa tso' wötëule eē. Erë Jehová tso' José kimuk s'wōto wé a ñies. Ie' er bua' chōke iā. Ie' tō s'wōto wé wōkir ké er buaē chök iā. ²²S'wōto wé wōkir tō imékā s'tso' wötërulēwā malepa kōs kuebluie. José tō i kōs wēke s'wōto wé a e' kéwō meke. ²³Jehová tso' José tā. Ie' tō ikimeke as i kōs dōttsā buaē ie' a. E' kueki i kaneweke José tō e' kē suēku'ia s'wōto wé wōkir tō tō is imir.

Kabsuē bōt e' wà paké José tō

40 ¹⁻²E' ukuōki tā wēm dör Egipto blú a vino mukwakpa e'pa kueblu ena wēm dör blu' a pan yuōkwakpa e'pa kueblu, e'pa bōl tō iblú tsiriwēkā. E' kueki ie' ulunekā ie'pa ki ³tā ie'pa patkéitō wötēwā ikkō'nukwakpa kueblu e' u a s'wōto wé tso' e' a. Eē José tso' wötëule ñies. ⁴Eta Egipto blú kkō'nukwakpa e' kueblu tō José ké wēpa bōl ñe'pa kkō'nuk. Eē ie'pa sené wötëule ká taiē.

⁵Ká et nañewe tā ie'pa bōl kabsuē kuā'ki kuā'ki. E' wà dör kuā'ki kuā'ki. ⁶Bule es bla'mi tā José debitu isauk. Ie' tō isuē tō ie'pa eriane. ⁷E' kueki ie' tō ie'pa a ichaké:

—¿Iók i'ñe tā a' wō wēr siar?

⁸Ie'pa tō iiuté:

—Sa' kabsuē, erë kē yi ku' sa' a iwà pakök.

Ie' tō iché ie'pa a:

—¿A' kē wā ijcher tō Skëköl tō s'kabsuē e' wà chēmi se' a? ¿Ima a' kabsuē? E' chō ña.

⁹Eta blu' a vino mukwakpa kueblu e' tō ikabsuē paké iā tā ichéitō:

—Ye' kabsuē tō uva kicha me'r ye' wōshā ¹⁰e' ulà tso' mañat. E' dapēnekā e' wōrkua bune taiē tā iwōrkua míane iwóliie e' yua' tso' taiē. ¹¹Egipto blú tka' a'tser ye' ulà a. E' a uvawōli diò tuéeyō. E' ukuōki tā ye' wák tō imé blu' a. Es ye' kabsuē.

¹²José tō iché iā:

—Be' kabsuē e' wà kiane yēnuk i' es: Be' tō uva kicha ulà kébi-suē mañat. E' wà kiane yēnuk ká mañat. ¹³Ká mañat tā blu' tō be' shuleraē. Be' kané meraneitō be' a. Vino meranebö ie' a wēs be' tō iō' kuaē es. ¹⁴Be' we'ikèyō, mik iwà tka, eta kē be' éna ye' chōkwa. Ye' tté chō blu' a as itō ye' yōttsā iē. iBe' er buaē chō ye' a! ¹⁵Ye' dör hebreowak e' ekiblē'wābitu ie'pa tō. Ye' kē wā i sulu wamblēne. Ye' tso' wötëule é.

¹⁶Mik blu' pan yuōkwakpa kueblu e' tō isuē tō José tō iyami kabsuē e' wà paké tā idettsā buaē eta ie' tō ie' icha paké iā ñies. Ie' iché:

—Ye' kabsuē tō ye' wā kkō dami mañal ye' wōkir ki, e' a pan saruru dami. ¹⁷Kkō tkēr kákke ék e' a pan dami blu' a daklili. Erë pan dami ye' wā kkō a ye' wōkir ki e' ñeke dù tō.

¹⁸Eta José tō iché ie' a:

—Be' kabsuē e' wà kiane yēnuk i' es: kkō mañal e' dör ká mañat. ¹⁹E' wà kiane chē tō ká mañat tā blu' tō be' kuli' tōkōk patkeraē, tā be' nu kichatkerakā kal ulà a. Dù tō be' nu katerawā.

²⁰Ká de mañat tā blu' tō idués-wō tkō'wé chkē wa di'yē wa taiē

ikueblupa ulitane kanebloke ie' a e'pa a. E' shua ie' tö ivino mukwakpa kueblu ena ipan yuökwakpa kueblu e'pa bül tsukbitu patké s'wöto wé a ikueblupa ulitane wörki. ²¹Vino mukwakpa kueblu e' a ikané méneitö. Ie' tö blu' a itka' méne wes kuaë es. ²²Erë pan yuökwakpa kueblu, e' patkémi nu kichatkéka wes José tö iyë' es. ²³Erë vino mukwakpa kueblu e' kè er aneia José ska'.

**Egipto blú kabsué bötökicha
e' wà paké José tö**

41 ¹Duas de bök, e' ukuöki ta Egipto blú kabsué tö ie' dur di' kiè Nilo e' kkömik. ²Ie' isuë tö baka deyal di' a kuktö. E' dör baka bua'buaë jani'janila. E' iëter chkök kuachka shua. ³E' itöki baka skà deyal kuktö di' a. Erë e' dör suluë sí sulula. E' míyal di' kkömik baka malè o'mik. ⁴Eta baka sí sulu-la kuktö, e' tö baka bua'buaë kuktö e' katélur.

Eë ta blu' ti'neka. ⁵E' ukuöki ta bet ie' kapowane ta ikabsuéne tö i talarke kuò sù kiè trigo e' klò elka è a ila'k deka kul. Ila'k e' dör bua'buaë iwö blubluë. ⁶E' itöki iskà tskine e' klò elka è a ila'k deka kul ñies, erë sulula idir. Siwa' datse diwö tskirke e' kke e' tö isiwéwa ña'wéwa suluë mía wö yabé è. ⁷Eta ila'k kul siulewa sulu e' tö ila'k bua'bua katélur sera.

Blu' ti'neka ta iëna iane tö ie' kabsuke moki. ⁸Erë bule es bla'mi ta ie' kabsué e' tö ie' eriawéka. E' kueki ie' tö Egipto iyi tötkökwakpa ena iyi jcher taië ese wakpa, kos

tsuk patké. Ie' kabsué e' pakéitö ie'pa a. Erë ie'pa ulitane kè a ie' kabsué e' wà ane. ⁹Eta vino mukwakpa kueblu e' tö iché blu' a:

—A blu', erpa ye' éna ida a tö sulu ye' e' wamblé. ¹⁰Mik be' uluneka taië be' pan yuökwakpa kueblu ki ena ye' ki, eta be' tö sa' wötökwa patké' be' kkö'nukwakpa kueblu e' wé a. ¹¹Ká et nañewe ta pan yuökwakpa kueblu kabsué. Ye' kabsué ñies. Sa' kabsué e' wà ta' ulawa ulawa. ¹²Eë wëm dur eköl dula-dula hebreowak, e' dör s'wöto wé wökir e' kané méso. Ie' a sa' tö sa' kabsué e' paké ta ie' tö iwà ché sa' a. ¹³Iwambléne yësyësë wes ie' tö sa' a iyë' es! Ye' dene ye' kané a ta iëköl nu kichatkéka kal ulà a.

¹⁴Eta blu' tö José tsuk patké ta iyëttsarakitö bet s'wöto wé a. José tsà téé buaë, e' paié buaë, ta ide ie'pa wa blu' wörki. ¹⁵Blú tö iché ia:

—Ye' kabsué erë kè yi éna iwà ane. Erë ie'pa tö iché ye' a tö buaë be' tö s'kabsué e' wà paké.

¹⁶Ie' tö iiuté:

—A këkëpa e' kè yënuke ye' a. Erë Skëköl tö e' chëmi be' a be' kimoie.

¹⁷Blu' tö iché ia:

—Ye' kabsué tö ye' dur di' kiè Nilo e' kkömik. ¹⁸Ye' isuë tö baka deyal di' a kuktö. E' dör baka bua'buaë jani'janila. E' iëter chkök kuachka shua. ¹⁹E' itöki baka skà deyal di' a kuktö. Erë e' dör suluë sí pola. iKè ye' wa baka suule sí poë suluë ká i' a ekké chökle! ²⁰Eta baka sí sulula kuktö, e' tö baka bua'buaë kuktö e' katélur. ²¹Baka sí suluë e' tö baka bua'buaë katélur

erë kè iwër tö ikatélor. Itso'ia sí poë wës kenet es.

“Eë ta ye' ti'neka. ²²Eta bet ye' skà kapowane ta ye' skà kabsuëne tö ì talarke kuò sù e' klò elka è a ila'k deka kul. Ila'k e' dör bua'buaë iwö blubluë. ²³E' itöki iskà tschine e' klò elka è a ila'k deka kul ñies. Erë e' ala'k dör sulula. Siwa' datse diwö tskirke e' kke e' tö isiwéwa ña'wéwa suluë mía wö yabé è. ²⁴Eta ila'k kul siulewa sulu e' tö ila'k bua'bua katélur serea. E' kos pakéyö s'tötkökwakpa a erë ie'pa shua kè yi a iwà ane yës.”

²⁵Eta José tö blu' iüté:

—A kèkèpa, be' kabsuë bötkicha, e' wà dör etkè. Ì weraë Skèköl tö kukuie e' chök ie' tso' be' a kabsuë a kam iwà tkò e' yöki. ²⁶Baka bua'buaë ena ala'k bua'buaë e' wà dör etkè, e' dör duas kul. ²⁷Baka sulula sí poë deka ibua'buaë itöki ena ala'k suluë siulewa siwa' wa, e' wà dör etkè. E' dör duas kul skà. E' duéswö wa ketba ardaë s'ki dò duas kul e'. ²⁸Ì weraë Skèköl tö kukuie e' chök ie' tso' be' a wës ye' tö be' a ichétke es. ²⁹Kewe dali wördaë taië Egipto kos a doka duas kul. ³⁰E' ukuöki ta duas skà datskene kul e' dör ketba taië duéswö. Bli e' tö Egipto kos sulu'wera. E' kuëki duas kul buaë e' a dali wöne taië e' kè arpaia yi éna. ³¹Bli ardaë taië darërë, e' kuëki dali wönebak taië e' peli kè wërpaia yës. ³²A kèkèpa, be' kabsuë bötkicha, e' wà kiane chè tö Skèköl tö iweraë mokië. Bli doraë se' ki bet.

³³A kèkèpa, be' kawöta wëm yulök eköl erbikò buaë wa íyi

jcher taië ese. E' múka ká kuëbluie.

³⁴Ikaneü i' es: wëpa yuló as ie'pa mi' Egipto kos a daliwö kak blök daliwö tso' taië duas kul e' dalewa. Mik daliwö tso' doka saco skel eta ikió ia sacco et blënoie ketba yöki. ³⁵Ie'pa a ichó tö daliwö ñe' kos dapa'ú bānet bānet ká tso' kos Egipto e' a. E' kkö'nuk patkó be' wák tö sulitane tioie. ³⁶Es daliwö blërdaë a' wakpa ulitane a as ie'pa kè ttò ketba tö mik ketba duéswö de s'ki eta.

José yöne Egipto wökirie

³⁷Ì ché José tö ie' a e' mène buaë ie' a ena ikuëblupa kos e'pa a. ³⁸E' kuëki ie' tö iché ie'pa a:

—Wëm i' a Skèköl Wiköl tso'. Kè se' a wëm skà kurpa wës ie' es.

³⁹Eta ie' tö iché José a:

—Skèköl tö íyi ulitane ikkè e' kkaché be' a. E' kuëki be' erbikò buaë, be' wa íyi jcher taië sulitane tsata. ⁴⁰Be' tkekekayö ye' ká kos e' wökirie. Sa' wakpa kos tö be' ttò dalöieraë. Ye' eköl è dör kibiie be' tsata, ye' dör blu' e' kuëki. ⁴¹Ìñe ye' tö iché tö be' dör Egipto wökir kibi. ⁴²Eta blu' tö iulatsio tso' iwa ikka shtioie, e' yéttsa iéwa José ulatska a. José paiérakitö datsi' bua'bua ese wa. Ñies bulë dör oro ese iéwaitö José kuli' a et. ⁴³E' ukuöki ta ie' tö José ké e' tkökka shkök karreta shkoke ie' karreta itöki e' ki. Ie' tö ie'pa welepa patkëmi kewe ichök pè' a aneule: “iA' e' skó! iKawö mú se' wökir kibi datse as e' tkömi!” Es ie' tö José yué Egipto wa'ñe e' wökirie.

⁴⁴Eta blu' tö iché José a:

—Ye' dör Egipto blú erë kě yi a i onuk ká i' kī, be' kě wā ikéwō mēne e' tā.

⁴⁵Ie' tō José kiē mékā Safe-nat-panéah egiptowak ttō wa. Ie' tō tayē kiē Asenat e' mé José a senowaie. E' dör wēm kiē Potifera e' alá busi. Potifera dör egiptowak sacerdote* eköl. Ie' kanēblöke ká kiē On eē. Es José atē Egipto wa'ñe e' wökirie. ⁴⁶Mik ie'pa wā José dē'bitū blu' ska', e' kéwō ska' tā ie' kī duas tso' dabom mañayök (30).

José e' chéat blu' a tā imítke ikaneuk Egipto kōs a. ⁴⁷Duas kul tsá shuā dali wōne taiē shūte. ⁴⁸Daliwō e' kōs kak dapa'wé José tō tā ibléitō ká wa'ñe. Wé dali e' wōne ese wakpa ká a ibléat u tso' daliwō blóie ese a. Es ibléitō ká ulitane tso' Egipto e' a. ⁴⁹Ie' tō daliwō dapa'wé taiē wēs dayē tséwō kě ishtar es. E' kuēkī ie' kě wā ishtaneia.

⁵⁰Ketba kéwō kām dōwā e' yōkī José alaköl kiē Asenat, e' alá kune bōl wēpa. ⁵¹Mik ilā tsá kune, etā José tō iché: “Skēköl tō ye' bak erianuk ena ye' yamipa e' kōs chōwéwa ye' éna.” E' kuēkī ikiē mékaitō Manasés.* ⁵²Mik ilā skā kune, etā ie' iché: “Skēköl tō ye' a alá mé ká wé kī ye' bak weinuk taiē eē.” E' kuēkī ikiē mékaitō Efraín.*

⁵³Duas kul dali wōne taiē Egipto e' tka. ⁵⁴E' ukuökī tā duas kul skā

debitū e' dör ketba poē duéswō wēs José tō iyē' es. Ketba de ká wa'ñe erē Egipto kōs a chkewō tso'. ⁵⁵Mik Egipto wakpa tekette ketba tō, etā ie'pa mía iblú a chkewō kiök. Ie' tō iché iarak: “A' yú José ska' tā i kōs chéitō a' a e' wā iutō.”

⁵⁶Mik ketba de ká wa'ñe, etā José tō dali tso' blēule iwé a e' kōs kkōppée chkewō watuō Egipto wakpa a. Ketba kī datse taiē shūte. ⁵⁷Ká ulitane wakpa a kě i ku'ia katanoie, e' kuēkī ie'pa de Egipto chkewō tauk José ska'.

José ělpa mía Egipto

42 ¹Mik Jacob wā ijchenewa tō chkewō tso' Egipto watuē, etā ila'r a ichéitō: “Ílók a' iēter ñi sauk è? ²Ye' a iyēne tō chkewō tso' Egipto. A' yú eē chke-wō tauk as kě se' duölur ketba wā.”

³Etā José ělpa dōkā dabop, e'pa míyal Egipto chkewō tauk. ⁴Erē Jacob kě wā ilā Benjamín, e' dör José ěl táie imi wa, e' patkēnemi iēlpa tā ie' ibikeitsé dō' i tkō itā ñalā kī. ⁵Ketba tso' taiē Canaán e' kuēkī taiē Canaánwakpa míyal chkewō tauk Egipto. Esepa shuā Jacob ala'r mirwarak chkewō tauk ñies.

⁶José dör Egipto ká kuēblu. Ie' tō chkewō watuēke sulitane datse itauk e'pa a. Mik iēlpa demi iwörkī, etā ie'pa wōéwa dō iski ie' dalöiök. ⁷Ie' tō ie'pa suéwā bet tō ie'pa dör

* 41.45 *sacerdote*: Sacerdote i' kě dör wēs i'ñe itso' es. E' skéie ie'pa dör egiptowakpa siwā' e' wā kanēukwakpa.

* 41.51 *Manasés*: Hebreoie s'kiē e' wā kiane chē ichōwéwa ye' éna.

* 41.52 *Efraín*: Hebreoie s'kiē e' wā kiane chē alá kéka ö dali wör.

iëlpa. Erë ie' e' éwa iyöki wës kè ie' wä isuule es. Kè ie' e' kkayënewä ie'pa a tö ie' dör ie'pa ël. Etä ie' tö iëlpa chaké kësik wa:

—¿Wé a' sekkëpa bite?

Ie'pa tö iiuté:

—Sa' bite Canaán chkewö tauk be' ska'.

⁸Ie' tö ie'pa suéwä, erë ie'pa kè wä ie' sunewä. ⁹Ie' tö iëlpa kébisu' e' anewä ie' éna. Ie' tö iché ie'pa a:

—A' dör sa' bolökpa datse sa' sauk tö wës a' döwami ñippök sa' tä e' alokä sa' ki.

¹⁰Ie'pa iiuté:

—A kékëpa, e' kè dör es. Sa' kè dör a' bolökpa. Sa' debitu chkewö è tauk. ¹¹Sa' kos i' e' yé dör eköl è. Sa' serke buaë yësyesë. Kè sa' dör yi bolökpa.

¹²Ie' tö ichéne ie'pa a:

—Au. A' sekkë tso' kachök. A' datse sa' ká sauk tö wës a' döwami ñippök sa' tä e' alokä sa' ki.

¹³Erë ie'pa tö iiuté:

—Sa' tso' be' wörki wës be' kané mésopa es. Sa' dökä dabom eyök ki böl (12). Sa' yé dör eköl è. Sa' serke Canaán. Sa' ël tsirla ék e' atë sa' yé tä. Iëköl blënewatke.

¹⁴Erë ie' tö iskà chénerakia:

—Ye' ichétke tö a' dör sa' bolökpa. ¹⁵Egipto blú ttò wa yö ichè a' a tö a' kè wä a' ël tsirla e' dë' ië, e' tä a' kè mi'pa ká i' ki. Es ye' isuëmi tö a' ttò mokí. ¹⁶A' eköl yú a' tsirla tsukbitu. A' malepa atë wötëule. Es ye' wä ijchermi tö a' ttöke e' dör mokí. E' kè yëne, e' tä a' dör sa' bolökpa. E' chéyö Egipto blú ttò wa.

¹⁷Ie' tö ie'pa wötéwä sekkä dökä ká mañat. ¹⁸Ká de mañat etä ie' tö iché iarak:

—Ye' tö Skëköl dalötsetä'ka. I cheke ye' tö a' a e' ú, e' tä ye' kè tö a' ttökwa patkepa. ¹⁹Yëne tö a' dör wëpa ttò mokí ese, e' tä a' eköl múat wötëule. A' malepa yúne, chkewö tsúmi a' yamipa tteke ketba tö e'pa a. ²⁰E' ukuöki tä a' ël tsirla e' tsúbitu ye' a suë. Es ye' tö isuëmi tö a' ttöke e' dör mokí. E' kè dör es, etä a' duöralur.

Etä ie'pa tö iché: “E' dör buaë sa' a.” ²¹Etä ichérakitö ñi a:

—Mokië se' e' wamblë' suluë se' ël José tä. Mik ie' kköyë' taië se' a tö i sulu kè wamblar ie' ki eré se' isu' tö taië ie' eriane, erë kè e' ska' se' tkine. E' nuí ki se' weirke i'ñe.

²²Etä Rubén tö iiuté:

—Ye' tö iyë' a' a: “Kè i wamblar José ki.” Erë a' kè wä ye' ttò iütëne. E' kueki i'ñe tä se' kawöta idu'wä e' nuí patauk.

²³José ttöke iëlpa tä egiptowak ttò wa e' pakekene o'ka tö ie'pa a iwakpa ttò wa. E' kueki ie'pa kè wä ijcher tö ie'pa ttöke e' ane ie' éna. ²⁴Mik ie' tö ie'pa ttöke e' ttsé, etä ie' e' skéttsa mía bänet iuk. Mik ie' er dekane ttoie, etä ie' dene ie'pa ska'. Ie' tö Simeón yöktsa patké tä ipayuëwarakitö iëlpa wörki.

²⁵E' ukuöki tä ie' tö ikané mésopa patké iëlpa sku' wä iök chkewö wa. Ñies ichéitö iarak: “Ie'pa chkewö e' ské iöwä iwakpa bil ekkë sku' a. Ñies chkë bakómirakia ñe ñalä ki.” Etä ie'pa tö iwé wës ie' tö iché iarak es. ²⁶E' ukuöki tä ie'pa tö ichkewö mékä iburro ki tä imíyal.

²⁷Mik ie'pa demi ñalä ki wé ie'pa kapökerö eë etä ie'pa eköl tö isku' a burro chkö tso' e' kkö

wöttsee iburro tioie tã isuë tö inuköl àr sku' shuã. ²⁸Ie' tö iché iëlpa a:

—iIsaú! Ye' inuköl mébitune ie'pa tö e' àr sku' a.

Ie'pa ulitane suane taië eriane taië. Ichérakitö ñi a:

—¿Ì wamblök Skëköl tso' se' tã?

²⁹Mik ie'pa demine Canaán, etã ì tka ie'pa tã Egipto e' kôs pakérakitö iyé a. Ie'pa tö iché iã:

³⁰—Kã e' wökir e' tté sa' tã kësik wa. Ie' tö iché tö sa' dör ie'pa bolökpa. ³¹Sa' tö iché iã: “Sa' serke buaë. Kè sa' dör yi bolökpa. ³²Sa' dökã dabom eyök kî bøl. Sa' yé dör eköl è. Sa' èl eköl blënewatke, iëköl atë sa' yé tã Canaán.” ³³Etã ie' tö sa' iüté: “A' ttò mokî, e' tã a' èl eköl e' múat ië ye' ska' etã chke-wö tsúmi a' yamipa a. ³⁴Erë a' èl tsirla ék e' tsúbitu ña suë. Es ye' wã ijchermi tö a' ttò mokî. A' tö iwé es, e' tã ye' tö a' èl èmimine. Ñies a' íyi tuëmi bua' sa' kã i' kî.”

³⁵Mik José ëlpa tso' isku' wakkauk, etã ie'pa isuë sku' a inuköl deyal parratulewã. Mik e' suë, etã ie'pa tkirulune iyé ñies. ³⁶Jacob tö iché iarak:

—A' tso' ye' mukat alà kè tã'. José blënewã se' yökî. Simeón ñies, kè ku' se' tã. I' tã Benjamín kiane tsëmi a' kî darë wa. Këkraë ye' weirke.

³⁷Rubén tö iché iyé a:

—Bejamín múmi ye' a. Ye' tö ikkö'neraë buaë. Ye' wã idörane be' a. Ye' kè wã idë'ne, e' tã ye' alà bøl e' ttólur.

³⁸Ie' tö iüté:

—Ye' alà kè mîne a' tã. Iël José du'wã tã ie' è dawãia. Dö'~ì sulu

tkò ie' tã ñalã kî, e' tã këkëla i' duömiwã ilà dalërmik tã a' iane iwiie.

Benjamín ëlpa wã imítser Egipto

43 ¹Ketba tkëneia darë-rë Canaán. ²Chkewö dë'biturak iwã Egipto, e' enewa. Etã Jacob tö iché ila'r a:

—A' yüne chkewö skà tauk se' a.

³Erë Judá tö iüté:

—Wëm tso' eë e' tö iyë' sa' a yësyësë: “A' kè wã a' èl tsirla dë' ië, e' tã a' kè tö ye' suepa.” ⁴Be' tö sa' èl tsirla émi sa' tã, e' tã sa' mi'mi chkewö tauk be' a. ⁵Erë be' kè tö iëmi sa' tã, e' tã kè sa' mîne. Wëm e' tö sa' a iché: “A' kè wã a' èl tsirla dë' ië, e' tã kè a' tö ye' suepa.”

⁶Jacob tö iüté:

—¿Iök a' tö ì sulu wambleke taië ye' kî? ¿Iök a' tö iché wëm e' a tö a' èl skà tso'ia eköl?

⁷Ie'pa tö iüté:

—Wëm e' tö sa' chakéwaie darë wa: “¿A' yé tso'ia ttsë'ka? ¿A' èl skà tso'?” Kè wës sa' a ionukia. Sa' kawötã iütök yësyësë. Sa' kè wã ijcher tö wëm e' tö sa' a ichémi: “A' èl tsúbitu ye' a suë.”

⁸Judá tö iché ie' a:

—Se' senakia, e' tã be' alà ómi ye' tã. Ye' tö ikkö'neraë. Es be' ena sa' ena se' ala'r kôs kè duöpalur ketba wã. ⁹Ye' e' chò ie' skéie. Ì de wës ie' tã, e' nuí tuëraëyö. Ye' kè wã ie' dë'ne be' ska', e' tã ye' iane iwiie këkraë. ¹⁰Kè sö kawö chöuk taië. Warma i' tã sa' daretke bötökicha.

¹¹Iyé tö iüté:

—E'ma kè wës ionuk. A' tö iú i' es: A' sku' a íyi bua'buatso' se' kã

a, ese kak tsúmi wëm e' a. Bálsa-mo elkela ena bul alí elkela ena kiò masmas ena mirra ena kalwö wödalo katanoie ese kôs kak tsúmi ia elkela. ¹²Ñies inuköl tsúmi ia jaishet döka bötökicha. Wé a' wa idè'ne e' tsúmine mune ia a' wák ulawa dö' ie' wöa ká chë'wa. ¹³A' yúne wëm e' ska'. Alà tsúmi. ¹⁴Skë-köl Diché Ta' Íyi Ulitane Tsata e' a ikiéyö as wëm ñe' tò a' saü er siarë wa ta imú tò be' èl ena Benjamín óbitüne. Ye' atë alà kè ta', erë zwes ye' e' ümiiä?

¹⁵Eta Jacob ala'r tò íyi kak ié, ñies inuköl ié jaishet döka bötökicha. Ñies Benjamín mírak iwa ta imíyal. Mik idemirak José ska' ¹⁶eta ie' isué tò Benjamín debitü ie'pa wa. Ie' tò iché iu kuëblu a:

—Wëpa wíkkë tsúmi ye' u a. Be' yú baka ttökwä elka e' kaneü se' a. Ie'pa chköke i'ñe ye' ta dibata a.

¹⁷Eta iu kuëblu tò iwakanewé wes ichéitö ia es. Imítserak iwa e' ta José u a. ¹⁸Erë taië ie'pa tkine-wa imítserak iwa José u a e' kuëki. Ie'pa ttöramirak ñita: Ie'pa tso' se' kitö'uk. Ie'pa tò inuköl ië'mi se' sku' a e' nuí tkëne se' mik. E' nuí kuëki ie'pa tò se' klö'werawa kanëblök ie'pa a kanè mésopaie kè patuë ta' ese. Ñies se' iyiwak klö'werawarakitö nuí ki.

¹⁹Mik ie'pa demi u wékkö a, eta ie'pa de tsinet u kuëblu wörki ²⁰ta ichérakitö ia:

—A këkëpa, suköt sa' dë' ie chke-wö tauk. ²¹Erë sa' dë'mi wé sa' kapökerö eë ta sa' sku' kôs kkò wöttsée ta e' a kôs sa' tò chkewö to' e' inuköl kuëne sa' tò seraä. E'

debitüne sa' wa mène. ²²Ñies sa' wa inuköl skà de chkewö kí tuöie. Erë kè sa' wa ijcher yi tò sa' inuköl ië'kane sa' sku' a.

²³U kuëblu tò iiüté:

—Kè a' tkinuk. Kè a' suanuk. Ye' tò a' chkewö pato' e' inuköl klöo'. A' Këköl dör a' yé Këköl ñies, e' tò inuköl e' ië'wa a' sku' a.

E' ukuöki ta ie' tò Simeón yéttsa tsémi wé iëlpä tso' eë. ²⁴E' ukuöki ta imítserak iwa seraä José u a. Eta di' méitö iarak klö skuoie. Ñies iburro tiérakitö. ²⁵Ie'pa wa ijchenewa tò eë ie'pa chköke José ta dibata a. E' kuëki ie'pa wa íyi kak de ie' a e' dapa'wérakitö mè ie' a.

²⁶Mik ie' dewa weshkë, eta ie'pa wa íyi kak de e' mé ia. Ie'pa wöéwaie dö iski idalöiök. ²⁷Ie' tò ie'pa shkë'wé ta ichakéitö:

—A' yé de këkëpalatke yë' a' tò ye' a suköt zis e' tso'? ¿Idobyërkeia?

²⁸Ie'pa skà wöéwane dö iski ta ichéitö:

—A këkëpa, tó, sa' yé tso' buaë. Ie' dobyërkeia.

²⁹Eta José ká sué ipamik shkit, ta Benjamín dör iël ekka imi wa ena iyé wa e' suéitö. Eta ichéitö ie'pa a:

—A' èl tsirla yë' a' tò zé' dör wí?

Ie' tò iché Benjamín a:

—A alà, Skëköl er buaë chò be' a. ³⁰Ie' tò iël suéwa e' tò ie' ttsë'wé buaë ta ie' iakkä. Bet ta ie' e' ské-ttsa mía wé ikapöke eë iuk. ³¹Mik ie' ié one ta ier pablëne ta iwö skuée ta imíane iëlpä skà ta ichéitö: “Chkò watió bet.”

³²José tiérakitö bánet. Iëlpä tiérakitö bánet. Egiptowak chköke

José u a e'pa tiérakitö bānet ñies. Hebreowak dör ñá egiptowak a e' kuëki ie'pa kè a kawö ta' chkök ie'pa ta ñita. ³³José tö ie'pa tulök-wa patké chkök ñi o'mik wes duas tso' iki es dö ibataë. Ie'pa tö ibikeitsé: “¿Wes ie'pa wa se' duéswö jcher?” E' kuëki ie'pa tkinewa taië ta ñi suéka. ³⁴Ie'pa dene chke tso' José mesa ki e' wa. Es iméitö ulitane a. Erë Benjamín a chke méitö kibiie doka sketökicha ielpa dene e' tsata. Ie'pa chke taië blo'yé José ta ttsë'ne buaë.

José tka' tso' iwa wayè

44 ¹E' ukuöki ta iu kuëblu kiére José tö ta ichéitö ia:

—Ie'pa sku' qos wà iókā chië chkwö wa. Ñies ie'pa inuköl iókane isku' qos kkò ki. ²Ñies ye' tka' yöule inukölchka wa tso' ye' wa wayè e' iókā ie'pa ël tsirla e' sku' kkò ki, inuköl chkwö patuq e' ta ñita.

Etā u kuëblu tö iwakanewé wes José tö iché ia es. ³Bule es bla'mi diwö tschine ta José tö ielpa a kawö mé shkökne iu a iburroë. ⁴Kam ie'pa dōmi kamië, etā ie' tö iché iu kuëblu a:

—Be' yú ie'pa itōki. Mik be' ikué, etā ichō ia: ‘Ye' e' wé buaë a' ta, ¿iók a' e' wamblé sulu ye' ki? ¿Iók a' tö ye' wōkir tka' yöule inukölchka wa, ⁵e' dör wayè ena íyi tōtkoie, e' bléwabitu a' tō? A' e' wamblé suluë.’

⁶Mik ie' ikuérak, etā ichéitö wes iwōkir tö iché ia es. ⁷Etā ie'pa tö iiuté:

—¿Iók be' tö ttè e' ché sa' a es? Kè ekké chók sa' e' wamblōpa.

⁸Sa' bite Canaán tkörö ie inuköl mine sa' sku' a e' mukne. ¿Wes be' ibikeitsèmi tö sa' tö inukölchka ö orochka e' bléwami be' wōkir u a? ⁹Sa' sku' shuyuló. Yi icha a ikuébö, as e' wák duōwa. Sa' malepa atē be' kanè mésopaie.

¹⁰Ie' tö iché ie'pa a:

—Iwà tkōraë wes a' tö iché es. Erë wé ék sku' a ikunewa e' è dōraë ye' kanè mésoie. A' malepa kè iane iwiie. A' mi'mine buaë.

¹¹E' bet ie'pa ulitane tö isku' éwa iski ta ikkò wōttsélor. ¹²U kuëblu tö sku' shuyulérak ikibi ék kéwe dö itsirla Benjamín ska'. Etā Benjamín sku' kkò a tka' àr. ¹³Ie'pa datsi' jchélor eriane taië kuëki. Ie'pa dalì payuéne burro ki ta ibiteyalne José ska'. ¹⁴Mik Judá ena ielpa demine José ska', etā José duriā. Ie'pa wōéwa iski iwōrkī.

¹⁵E' dalewa ie' tö iché iarak:

—¿Iók a' e' wamblö es? ¿A' kè wa ijcher tö wëm dör wes ye' es, e' s'tōtkè buaë?

¹⁶Judá tö iiuté:

—¿Ima sa' tö be' iutèmi? ¿Ì wa sa' tö be' a ikkachèmi tö sa' kè wa i sulu wamblène? Ì wamblèule sulu sa' wa e' sué Skököl tö. I' sa' iëter be' wōrkī. Sa' klö'ú be' kanè mésoie. Yi sku' a be' tka' kune e' klö'ú ñies.

¹⁷Erë ie' tö iiuté:

—Kè ye' a e' wamblèuk es. Yi sku' a ye' tka' kune, e' è atē ye' kanè mésoie. A' malepa mi'mine buaë a' yé ska'. Kè yi tö a' tsiriwepa.

Judá kköché siarla

Benjamín dalèrmik

¹⁸Etā Judá debitū José wōrkī tsinet, etā ichéitö ia:

—A këkëpa, be' we'ikèyö, mishka ttök se' bøl è. Be' dalò dör wes Egipto blú dalò es e' kuëki kè be' ulunuk ye' ki. ¹⁹Be' tò sa' a ichaki' tò sa' yé ta', sa' èl skà ta'. ²⁰Sa' tò be' iütè' tò, sa' yé ta' këkëpalatke, ñies sa' èl ta' eköl ià duladula. E' kune mik sa' yé kënewatke eta. Sa' be' a iyè' tò sa' yé ki taië ilà tsirla ék kiar. Alà e' è atéat imi a. Ie' èl blènewa. ²¹Be' tò sa' a iyè' tò alà e' tsúbitu suèyö. ²²Sa' tò be' a iyè' tò kè ie' dõpa. Kè ie' a iyé menukat ekörla. Mik ie' tò iyé méat eköl, eta iyé duöwami ie' dalërmik. ²³Erë be' sa' a iyè' tò sa' kè wä ie' dë', e' ta be' kè sa' kiepawä.

²⁴“Mik sa' dë'mine sa' yé wörki, eta i kôs yé' be' tò sa' a, e' paké sa' tò ie' a. ²⁵Ie' tò sa' a iché: ‘A' yúne chkewö taük.’ ²⁶Erë sa' tò iüté: ‘Sa' kawöta sa' èl tsirla tsukmi. Sa' kè wä ie' mîne, e' ta wëm e' kè tò sa' kiepawä.’ ²⁷Ie' tò sa' iüté: ‘A' wä ijcher buaë tò ye' alaköl e' tò ye' a alà mé bøl è. ²⁸Iaiaë eköl minea ye' yöki, kè ye' wä isüneia. Ye' ikl'wé tò ie' kötwä iyiwak sulusi tò. ²⁹A' wä ye' alà bata i' mítser ta i sulu tka ie' ta ñalä wa, e' ta wö'kela i' duörawä eriar è wä. Itka es, e' ta a iane iwiie.’

³⁰⁻³¹“Sa' yé éna ilà dalër taië. E' kuëki sa' demine ie' ska', erë ie' isuë tò ilà tsirla kè dë'ne sa' wä, e' ta ie' duörawä eriar è wä. E' wiie sa' iardaë. ³²Ye' tò ye' yé a iyè': ‘Ye' e' chò be' alà tsirla kkö'nuk. Ye' kè wä idë'ne, e' ta ye' iane iwiie këkraë.’ ³³E' kuëki ye' kköchò be' a tò ye' tsúat be' kanè mésoie, alà tsirla skéie. Ie' ómi as imi' iëlpa ta. ³⁴Alà

tsirla kè minene ye' ta, e' ta éwes ye' mi'mine ye' yé ska'? Ye' kè ki ye' yé kiane suë weinuk siarë.”

José e' chéka iëlpa a

45 ¹José kè a iwöklöneia ikanè mésopa ulitane tso' kaneblök ee e'pa wörki. E' kuëki ie' tò iché ie'pa a aneule: “A' kôs yúshka bánet. Sa' múat sa' wakpa è.” Es mik José e' chéka iëlpa a, eta ikanè mésopa kè ku' yës ie' ta.

²Eta ie' iéka taië, e' ttsé Egipto wakpa tò. Egipto blú a itté demi tò José tso' iük. ³José tò iché iëlpa a:

—Ye' dör José. éSe' yé tso'ia ttsë'ka?

Ie'pa tkirulune taië suane José yöki, e' kuëki kè ie'pa a ie' iütëneia.

⁴José tò iché ie'pa a:

—A' shkôwä tsinet ye' o'mik.

Mik ie'pa e' skéwä tsinet, eta ie' tò iché ie'pa a:

—Ye' dör a' èl José wato'ttsa a' tò tsëmi Egipto e'. ⁵Skëköl tò ye' patkë'bitu ie a' yöki kewe s'tsatkoie ketba ulà a. E' kuëki kè a' erianuk, kè a' tkinuk ye' wato'ttsa a' tò e' kuëki. ⁶Ketba de e' ki duas de bök. Eta duas skël kianeia. E' shua iyi kôs kuatkëmisö erë kè itskirpa yës. ⁷Erë Skëköl tò ye' patkë'bitu ká i' ki a' yöki kewe as a' aleripa kè erwa as Skëköl tò a' tsatkò ie' diché taië e' wa. ⁸Es Skëköl wák tò ye' patkë'bitu ie, e' kè dör a' ye' wato'ttsa e' kuëki. Skëköl tò ye' méka Egipto blú pattökwakie. Ye' dör ie' u kuëblu ena Egipto wa'ñe wökir. ⁹A' yúne bet ye' yé ska' ta ichó ia: ‘Be' alà José ttè i' patkébitu be' a: Skëköl tò ye' méka Egipto

ká kōs, e' wōkirie. Be' shkō ye' sauk bet. Kē bö ipanuk taiē. ¹⁰Be' serdaē ká kiē Gosen ee be' yamipa kōs tā, ñies be' iyiwak kōs ena i kōs tso' be' wā ekkē tā. ¹¹Ketba duéswō kianeia skel. E' kuēki ye' tō chkewō meraē a' ulitane a as a' wā chkewō tso' wē.' ¹²Ye' ēl Benjamín ena a' ulitane tō ichēmi ye' yē a tō moki ye' wák tté a' tā. ¹³Ipakō ye' yē a tō ye' dör Egipto wōkir. Ñies i kōs suē a' tō iē, e' pakó ia. iYe' yē tsúbitu bet iē!

¹⁴Eta José tō iēl Benjamín paklō'wēwā tā iīēkā. Es Benjamín tō José paklō'wēwā tā iīē ñies.

¹⁵Eta José tō iēlpa kōs wōalattsé, ñi paklō'wēwarak tā iīérak. Eta erpa iēlpa er deka ttök ie' tā.

¹⁶Eta Egipto blú u a tté demi tō José ēlpa debitu ie' ska', e' tō Egipto blú ena ikuēblupa kōs e'pa ttsē'wē buaē. ¹⁷Eta Egipto blú iché José a:

—Ichō be' ēlpa a: 'A' chkewō payuō iyiwak ki tā a' yúne Canaán.

¹⁸Eta a' yē ena a' yamipa kōs e' tsúbitu ye' a. Ká tso' Egipto e' bua'ie mekeyö a' a. Ñies chkewō tso' Egipto e' bua'ie mekeyö a' a.'

¹⁹Ñies ichō ie'pa a: 'karreta tsúmi taiē a' alakōlpa ena a' ala'r ena a' yē e'pa kōs tsobitu. ²⁰Egipto iyi tso' bua'bu a' kakmeraēyö a' a. E' kuēki kē a' tkinuk i tso' a' wā e' ki.'

²¹Eta Jacob ala'r tō iwé i' es. José tō karreta mé ie'pa a wēs Egipto blú tō iché es. Ñies chkō méitö ie'pa a ñē ñalā ki. ²²Ñies datsi' pa'alī mé iarak e' mane'woie. Erē Benjamín a datsi' kak-méitö sketökicha iēnoie. Ñies

inuköl wōmule méitö ia dōkā cien mañalyök (300). ²³Iyi bua'bu tso' Egipto e' kak patkēmi iyē a payöule burro ki dōkā dabop. Ñies trigowö ena pan ena chkewö skā e' payuéitö burro dabop skā ki iyē a ñē ñalā ki. ²⁴Mik José ēlpa mitke, eta José tō iché ie'pa a:

—Kē a' mīa ñippök ñalā ki.

²⁵Ie'pa e' yéttsa Egipto a demi Canaán iyē ska'. ²⁶Eta ie'pa tō iché iyē a: "Be' alā José tso'ia ttsē'ka. Ie' tso' Egipto ká kōs e' wōkirie." Ttē e' tō Jacob wōkrawēwā taiē. Kē uteia. Ie' kē wā ttē e' klōone. ²⁷Erē mik ie'pa tō i kōs yē' José tō ie'pa a e' paké iyē a, ñies mik Jacob tō karreta patké José tō ie'pa tsomi e' suē, eta ie' er dekanē ttsē'ne buaē. ²⁸Eta ie' iché: "E' è kata ye' a, ye' alā José tso'ia ttsē'ka. Ye' mi'ke isauk kam ye' blērwa, e' dalewa."

Jacob mīa Egipto

46

¹Eta Jacob e' yéttsa iu a. i kōs tso' iwa e' mítser seraā. Mik idemirak ká kiē Beer-seba ee, eta iyiwak ña'wéitö iyē Isaac, e' Kēköl dalōioie. ²E' nañewe Skēköl tté ie' tā kabsueie tā ikiéitö ikiē wa:

—A Jacob.

Jacob tō iiuté:

—¿I?

³Eta Skēköl iché ia:

—Ye' dör be' Kēköl. Ye' dör be' yē Kēköl. Kē be' suanuk shkōk-mi Egipto. Ee ye' tō be' aleripa alōweraē taiē. ⁴Ye' mi'ke be' tā Egipto. Ñies ye' wák tō be' aleripa yerattsane ká e' a. Ñies mik be' duökewatke eta José tso' be' o'mik.

⁵E' ukuöki ta Jacob e' yéttsa Beerseba a. Eta ie' ala'r tö ie' iéka karreta patkë' Egipto blú tö ie'pa tsömi e' a. Ñies ie'pa ala'r ena ie'pa alakölpa e'pa iékarakitö karreta a. ⁶Eta Jacob mía Egipto iyamipaë se. Ie' baka qos ena ie' obeja qos e' mítser ie' wa. Ñies i qos dë' ie' ulà a Canaán e' mítser ie' wa sera. ⁷Ila'r qos ena isibayökpa qos e'pa mía da'a Egipto.

⁸Ikkëpa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. ⁹Eta Rubén ala'r kiè: Hanoc, Falú, Hesrón, ena Carmí.

¹⁰Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mì dör canaánwak.

¹¹Leví ala'r kiè: Guersón, Quehat ena Merarí.

¹²Judá ala'r kiè: Er, Onán, Selá, Fares ena Zérah. (Er ena Onán, e'pa blënewa Canaán.) Fares ala'r kiè Hesrón ena Hamul.

¹³Isacar ala'r kiè: Tolá, Puvá, Job ena Simrón.

¹⁴Zabulón ala'r kiè: Séred, Elón ena Jahleel.

¹⁵E'pa qos dör Jacob ala'r kune Padán-aram Lía ta. Ie'pa kutà kiè Dina, e' kune eë ñies. Jacob aleripa qos wëpa ena alakölpa e' dökä dabom mañayök ki mañal (33).

¹⁶Gad ala'r kiè: Sefón, Haguí, Esbón, Suní, Erí, Arodí, ena Arelí. ¹⁷Aser ala'r kiè: Imná, Isvá, Isví ena Beriá. Ie'pa kutà kiè Sérah. Beriá ala'r kiè Heber ena Malquiel. ¹⁸E'pa dör Jacob aleripa Zilpá ta, e' mé Labán tö ilà busi Lía, e' a ikanè

mésoie. Ie'pa qos dökä dabom eyök ki teröl (16).

¹⁹Jacob alaköl kiè Raquel, e' ala'r kiè José ena Benjamín. ²⁰José ala'r dör ilaköl Asenat ta e'pa kiè Manasés ena Efraín. Ie'pa kune Egipto. Asenat dör wëm kiè Potifera, e' alà busi. Potifera dör egiptowak awá eköl. Ie' kaneblöke ká kiè On eë. ²¹Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. ²²E'pa dör Jacob aleripa Raquel ta. Ie'pa qos dökä dabom eyök ki tkël (14).

²³Dan alà kiè Husim. ²⁴Neftalí ala'r kiè: Jahseel, Guní, Jezer, ena Silem. ²⁵E'pa dör Jacob aleripa ilaköl Bilhá ta, e' mé Labán tö ilà busi Raquel a ikanè mésoie. Ie'pa dökä kul (7).

²⁶Jacob ta iyamipa ekka mène Egipto, e' wakpa dökä dabom teryök ki teröl (66). Ie' ala'r e' alakölpa, kè shtane ishüa. ²⁷José ala'r kune Egipto e'pa dör böl. Jacob yamipa dë'mi Egipto dökä dabom kuryök (70) sera.

²⁸Eta Jacob tö ilà Judá patkëmi kewe José a ibiyöchök: "Be' shkó Gosen ye' ñaletsuk." Eta mik ie'pa demi Gosen, ²⁹eta José tö ikanè mésopa ké ie' karreta yöktsa tsëmi iyé ñaletsöie. Mik idemi iyé ska' eta iyé paklö'wëwaitö eta ie' ié taië.

³⁰Eta Jacob tö iché José a:

—Ire' ye' blërwami buaë! Ye' be' suéne buaë, be' serkeia e' kuëki.

³¹Eta José tö iché iyamipa qos a:

—Ye' mía Egipto blú a a' biyöchök tö 'ye' ëlpa ena ye' yé yamipa qos serke Canaán e'pa

debitu e' tsukat ye' ska'. ³²Ie'pa dör iyiwak alöukwakpa. E' kueki ie'pa baka kos ena ie'pa obeja kos ena i kos tso' ie'pa wa e' debitu ie'pa wa.' ³³Mik Egipto blú tö a' chaké: '¿I dör a' kanè?', ³⁴e' ta ichó ia: 'Kekraë sa' kanè dör iyiwak alöuk wes sa' tsá bak es.' Egiptowak kè kàne senuk obeja alöukwakpa ta ñita, e' kueki Egipto blú kawö mèmí a' a senuk Gosen.

47 ¹Eta José mía ibiyó muk Egipto blú a ta ichéitö ia: "Ye' yé ena ye' elpa serke Canaán, e'pa debitu ie. I' ta ie'pa tso' Gosen. Ie'pa obeja ena baka ena i kos tso' iwa e' debiturak iwa serea." ²José tö ielpa shushtë doka skel ta imítser iwa Egipto blú ska' as ie' tö iwakpa saü. ³Eta Egipto blú tö José elpa a ichaké:

—¿I dör a' kanè?

Eta ie'pa tö iüté:

—A këkëpa, sa' dör obeja alöukwakpa wes sa' tsá bak es.

⁴Ketba meneka taië sa' kaska'. Sa' iyiwak a kè chkè ta'ia, e' kueki sa' bitea senuk ká i' ki. Be' we'ikè sa' tö, kawö mú sa' a senuk Gosen.

⁵Eta Egipto blú tö iché José a:

—Be' yé ena be' elpa de senuk be' ta. ⁶Ká tso' Egipto e' wé kiane be' ki e' mú ie'pa a senoie. Kos ká tso' Egipto e' bua'ie dör Gosen e' mú ie'pa a senoie. Be' yamipa shua wëpa tso' iyiwak kkö'nè buaë, e' ta esepa múka ye' iyiwak kkö'nuk.

⁷Ñies José wa iyé Jacob mí kka-chè Egipto blú a. Jacob tö Egipto blú shké'wé er bua' wa. ⁸Eta Egipto blú tö ie' a ichaké:

—¿Kos duas tso' be' ki?

⁹Jacob iüté:

—Ye' ki duas de cien eyök ki dabom mañayök (130) shkök wì a dià a. Kawö e' kè dör taië. E' tka ye' ki darërë. Erë kam ye' ki duas dò kos ye' yépa ki duas bak ekkè.

¹⁰E' ukuöki ta Jacob e' chéat Egipto blú a ta imía. ¹¹Eta José tö ká bua'buatso' Egipto, e' mé iyé ena ielpa a senoie wes Egipto blú tö iché es. Ká e' ate Ramsés. ¹²Ñies ie' tö chkewö meke iyamipa a kos ila'rla tso' u a u a ekkè.

José tö chkewö watué

Egipto wakpa a

¹³Ká ulitane kè iyi wöria, e' kueki ketba kí tkërke poë. Ketba tö s'tteke taië Canaán ena Egipto. ¹⁴Chkewö tué Egipto wakpa tö ena Canaánwakpa tö, e' ské kos blé José tö Egipto blú u a. ¹⁵Mik Egipto wakpa ena Canaánwakpa inuköl enewa serea, eta Egipto wakpa mía José ska' ta iché ia:

—iBe' sa' a chkewö mú! Kè sa' inuköl ta'ia. Kè idör bua' tö e' è kueki be' tö sa' méttsa duökwa ketba a.

¹⁶Eta ie' tö ie'pa iüté:

—A' kè wa inuköl ta'ia, e' ta a' iyiwak tsúbitu ña, e' skéie ye' tö a' a chkewö meke.

¹⁷Egipto wakpa wa kabaio ena obeja ena baka ena burro e' kos mí ie' a. E' skéie ie' tö chkewö mé ie'pa a dò duas ek. ¹⁸Das e' tka eta ie'pa míyalne ie' ska' ta iskà ché ia:

—Be' wa ijcher buaë tö kè sa' wa inuköl ta'ia. Ñies sa' iyiwak kos, e' dör be' icha. Sa' ká è tso'ia sa' wa ena sa' wakpa, e' è tso'ia sa' wa mè

be' a ¹⁹Sa' wákpa taú. Sa' ká taú ñies. E' skéie iwiwö mú sa' a. Sa' kanablömi sa' wákpa ká a Egipto blú a. Es sa' atē Egipto blú kanè mésopaie. Eta chkewö è memibö sa' a as kè sa' duölur ketba wā ena sa' ká kè weir è ichök.

²⁰Egipto wakpa tö iká watuéttsa José a ketba kuēki. Es Egipto ká kos de Egipto blú ulà a. ²¹Ñies Egipto wakpa kos atē blu' kanè mésopaie. ²²Ie'pa sacerdotepa ká e' è kè tone José wā. Egipto blú tö chkewö kakmeke ie'pa a, e' kuēki ie'pa kè wā iká watonettsa.

²³E' ukuöki tā José tö iché Egipto wakpa a:

—A' wákpa kos ena a' ká kos e' to'ttsa ye' tö se' blú a, e' kuēki i'ñe tā a' kos atē ie' ulà a. Iyiwö i' tsúmi a' tö tā ikuatkó. ²⁴Mik iwöne tā iwiwö tso' dōka saco skel, eta itsá yótttsa sacco et mè Egipto blú a. Iyiwö eyök atē e' dör a' a kuatkè, ñies a' yamipa ulitane a ñanoie.

²⁵Eta ie'pa tö iiuté:

—Be' tö sa' tsatké ketba ulà a. Be' er bua' sa' tā. E' kuēki sa' e' chöke Egipto blú kanè mésopaie.

²⁶Es José tö kawö mé Egipto wakpa a tö iwiwö tso' dōka sacco skel e' tsá yótttsa sacco et mè Egipto blú a. I'ñe tā e' wekeia ie'pa tö es. Egipto sacerdotepa è kè kawöta iwiwö tsá muk Egipto blú a, ie'pa ká kè dē Egipto blú ulà a e' kuēki.

Jacob tö ittè bata ché José a

²⁷Es Israel aleripa e' tséat senuk Gosen, ká e' atē Egipto. Ká e' kos de ie'pa ulà a. Ee ie'pa alöne taiē. ²⁸Jacob sene'ia ká e' a duas dōka

dabom eyök ki kul (17). Duas de ie' ki cien eyök ki dabom tkëyök ki kul (147).

²⁹Mik ie' tö ittsé tö iduökewatke, eta José tsuk patkëitö tā ichëitö ia:

—Moki be' er buaë chak ye' a, e' tā be' ulà múwā ye' tu' dikia iwā kkachoie tö moki i' kiekeyö be' a e' wawëraëbö. Ye' nu kè wötarwā Egipto. ³⁰Mik ye' blënewā mia ye' dëutöpa itöki, eta ye' nu yótttsa ká i' ki tsúmi wötëwā ie'pa pö a.

Eta José tö iiuté:

—Es yö iwëraë.

³¹Iyé tö iché ia:

—Ichö ña moki Skëköl wörki tö be' iwëraë es.

Eta José tö ittè mé moki iyé a. Eta Jacob wömëwā ika' ki tā Skëköl kikékaitö.

Jacob er buaë ché José ala'r a

48 ¹E' ukuöki tā ie'pa wā biyö debitu José a: “Be' yé duöke tso' suluë.” Eta José mia isauk ila'r böl mí iwā e' tā. ²Mik ie'pa tö iché Jacob a tö José debitu be' sauuk, eta ie' e' tkéka isulú wa ika' ki. ³Eta ie' tö iché José a:

—Skëköl Diché Ta' Iyi Ulitane Tsata e' e' kkayë' ye' a ká kiè Luz atē Canaán ee. Ee ie' er buaë yë' ye' a ⁴tā ichëitö ña: “Ye' tö be' aleripa alöwëraë taië. Ie'pa döraë ká taië e' wakpaie. Ká i' meraëyö ie'pa a, e' atdaë ie'pa ulà a kekraë michoë.”

⁵Be' ala'r böl, Efraín ena Manasés, e'pa kune kam ye' dò Egipto e' yöki. Ie'pa tsétköyö wës ye' wák ala'r es wës ye' ala'r Rubén ena Simeón dör ye' ala'r es. ⁶E' kuēki ká meraëyö ie'pa a wës ye' wák

ala'r a es. Ie'pa itöki be' ala'r skà kurmi, e'pa dör be' wák a. Erë ie'pa dör Efraín ena Manasés ëlpa, e' kuëki ká ñe' kak döraë ie'pa ulà a ñies. ⁷Mik ye' manét Padán-aram e' demi Canaán dökettsatke Efrata, etä eë ñalä kî be' mì blënewä ye' yöki. Eë ye' tö ie' nu blë'wäat Efrata ñalé kî. (I'ñe tä ká e' kië Belén.)

⁸Mik Jacob tö José ala'r sué etä ichakéitö:

—¿Sepa dör yi?

⁹Ie' tö iiuté:

—I'pa dör ye' ala'r mé Skëköl tö ye' a ká i' kî.

Etä iyé tö iché iä:

—Ie'pa tsúbitu ye' ska' as ye' er bua' chò ie'pa a.

¹⁰Jacob kënewatke e' kuëki iwö-bla kè wawëriä buaë. E' kuëki José tö ila'r patkëmi tsinet iyé o'mik. Etä Jacob tö italapa pakl'wé wöala-ttsé. ¹¹E' ukuöki ichéitö José a:

—Ye' ibikeits tö ye' kè tö be' suëpaia, erë Skëköl tö kawö mé ye' a be' ena be' ala'r suoie.

¹²Etä José tö ila'r skëttsä iyé o'mik tä iwöëwa dò iski iyé dalöioie. ¹³E' ukuöki tä ila'r böl klö'wëwäitö iulà a. Efraín mí José ulà bua'kka, Manasés mí José ulà bakli'kka. Es itsëmiitö iyé ska'. Etä Efraín atë Jacob ulà bakli'kka, Manasés atë Jacob ulà bua'kka. ¹⁴Erë Jacob ulà bua'kka mékà Efraín dur ie' ulà bakli'kka e' wökir kî. Eré e' dör alà tsirla. Etä iulà bakli'kka mékaitö Manasés dur ie' ulà bua'kka e' wökir kî. Eré e' dör alà kibi. Es Jacob ulà tsétkö wi'kë io'kë. ¹⁵⁻¹⁶Etä ier bua' ché José a i' es:

“As Skëköl er buaë chò ala'r böl i' a këkraë.

Ye' yépa bak Abraham ena Isaac, e'pa bak Skëköl e' dalöiök,

e' tö ye' kkö'nami kuaë dò ikkë tä.

Ie' tö ye' tsatké këkraë íyi sulusi ulà a.

As ala'r i' wa kè ye' chöwa sulitane éna këkraë.

Ñies ye' yépa bak Abraham ena Isaac as e'pa kè chöwa sulitane éna këkraë.

As ala'r i' alör taië ká ulitane kî.”

¹⁷Jacob ulà bua'kka mékà Efraín wökir kî, e' kè mène José a buaë. E' kuëki ie' tö iyé ulà bua'kka e' klö'wëwä mèkà ilà kibi dör Manasés e' wökir kî. ¹⁸E' dalewa ichéitö iä:

—iA yéwö, kè idör es! I' dör alà kibi. Be' ulà bua'kka múkà i' wökir kî.

¹⁹Erë iyé kè wä ione es. Ie' tö iché iä:

—iA alà, e' jcher ye' wä, e' jcher ye' wä! Ie' alördaë taië, ie' döraë këkëpa taië. Erë itsirla ék e' döraë këkëpa taië shutë ikibi tsatä. Ñies ie' aleripa döraë ká taië e' wakpaie.

²⁰Es e' è diwö wa Jacob er buaë skà ché italapa a i' es:

—Mik Israel aleripa er buaë cheke ñi a etä ie'pa tö icheraë ñi a i' es: ‘As Skëköl er buaë chò be' a wës Efraín ena Manasés e'pa a er buaë yëne es.’

Es Jacob er buaë ché Efraín a, Manasés a imène, e' tsatä. ²¹E' ukuöki tä José a ichéitö:

—Ye' duökewatke erë Skëköl tö a' kkö'neraë. Ie' wä se' aleripa mirane Canaán wé se' yépa bak senuk ee. ²²Ye' tö ká bua'ie méat be' a ime'bakyö be' ëlpa a e' tsatä. Ká e' kiè Siquem. E' yé'ttsä ye' tö amor-reowak ulà a ñippè wa.

Jacob tö ittè bata ché ila'r kos a

49 ¹Jacob tö ila'r kié e' ska' tã ichéitö ie'pa a: “A' e' skówä ye' o'mik. Ì tköraë a' tã e' wà chekeyö a' a:

²“A ala'rla, a' e' skówä tsinet ye' ttò ttsök, ye' dör a' yé. Ye' ttò ttsó.

³“A Rubén, be' dör ye' alà kibi. Be' dör ye' diché tsá e' alé. Be' dalöiërtä' taië, be' diché tã' taië be' ëlpa tsatä.

⁴Erë i'ñe tã kè idör es. Be' dör wës di' yöliie es kè iwöklör yës. Be' tö ye' dalöseq'wä. Be' sene'kã ye' alaköl tã. E' kuëkî be' kè dalöiërpaia wës ko'k es.

⁵“Simeón ena Leví, e'pa dör ñi ëlpa; ie'pa tabè tso' ñippoie è.

⁶ÌWé ie'pa e' dapa'uke ee ye' kè shkak! Ie'pa tö wëpa kötulur kësik è kuëkî.

Baka wë'ñe klökicha blublu e' télorakitö èanas.

⁷Ie'pa kësik dör suluë ichökle e' kuëkî ie'pa kawö tköraë suluë.

ÌYe' tö ie'pa aleripa powerami senuk iëlpa malepa aleripa shua wì a dià a!

⁸“A Judá, be' ëlpa tö be' kíkera-kã taië.

Be' bolökpa klö'wewaraë be' tö ikuli' a,

es be' e' alörakã ie'pa kî.

Be' ëlpa ëkka e' wöörawa iski be' dalöioie.

⁹ÌA Judá, be' dör ye' alà!

Be' dör wës ma'name alà es.

Mik ì ttéitö tã ikaté one,

etã ie' e' wöéwa e' téwã iski wës ma'name këchke es.

¿Yi dòmi ie' tsiriuk?

¹⁰Judá aleripa döraë blu'paie taië këkraë dò mik iblú chók de etã.

Blu' e' ttò iuteraë sulitane tö.

¹¹Ie' tö iburro pupula muëke uva shua.

Ñies idatsi' skuöke uva diò wa.

¹²Ie' wöbla dör daloloë uva diò tsatä.

Ie' kã dör saruruë baka tsu'diö tsatä.

¹³“Zabulón serdaë dayë kkömik. Eë taië kanò irirke ese ké tso'. E' kã kkò dörawã Sidón kkömik.

¹⁴“Isacar dör wës iyiwak tso' dalì oie diché tã' taië ese e' mùtër enuk iwé a es.

¹⁵Mik ie' isuë tö kã e' dör buaë senoie ñies enoie, etã ie' tsiwö kî dalì dekane kaneblök.

Ie' e' mèttsã kaneblök kanè mésoie, kè tkine e' kî.

16 “Dan ditséwö shuā s'shulirdaë
buaë yësyësë wës Israel aleripa
e' ditséwö malepa es.

17 Dan dōraë wës tkabè chók
tso' ñalā kkò a tò kabaio
kuè iklō a tā iwák brutane
itsiwökka ese es.

18 “iA Jehová, ye' tso' be' panuk
tō ye' tsatkó!

19 “Gad ppök ñippökwakpa
dōraë taië.
Erë ie' tò ie'pa pperaë,
itötieraë.

20 “Aser ká kī chkè kata' buaë
tskirdaë.
Ì wörke kōs e' dör buaë shüte
mène buaë blu'pa a.

21 “Neftalí dör wës sulī alaki dur
áie ala'rla tā' bua'buaala
ese es.

22 “José dör wës burro kañiru suë
dur di' tum kkömik es,
wës burro pupula kañiru suë
dur ká tukir kī es.*

23 Kuaböt namépa éna sulu iar,
ie' kī kuaböt uyérakitō kēsik
wa.

24 Erë ie' ulà diché darërë;
e' wa ie' wā ishkame'
shuirikar darërëë,
kè ulà shtrirtā'wā yës.
Skëköl tò ie' a diché e' mé.
Skëköl e' dör Jacob Këköl e'
diché tā' taië.

Skëköl e' dör Israel aleripa
kkö'nukwak.

Ie' tò Israel aleripa tsatkeke.

25 A José, be' yé e' Këköl tò be'
kīmeke këkraë.

E' dör Skëköl Diché Tā' Íyi Uli-
tane Tsata,

Ie' er buaë chōraë be' a.

Kālī buaë patkeraë ie' tò be'
daliwö kī.

Ñies be' a di' atdaë buaë iyök
kī as be' dalikua talar buaë.

Be' aleripa alakölpa ala'r
dōraë taië, ñies be' iyiwak
dōraë taië.

Es Skëköl er buaë chōraë be' a.

26 Be' yé er buaë yé' be' a,
e' tkòkā ye' yé er buaë yé' ye'
a e' tsata.

Skëköl tò José shukit iēlpa
shuā iwökirie,

e' a ie' er buaë chō michoë
wës kabata yöbië kè erta'wa
es.

27 “Benjamín dör wës chichi
kañiru kēsikie ese es;
bla'mi tā iyiwak ttéwāitō katè,
tsālī tā ibata watiéwāitō.”

28 E'pa dör Israel ditséwōpa daia
itökī dōkā dabom eyök kī böt (12),
e' yépa tsá. Es ie'pa yé tò ie'pa a
iché mik ie' tò ittè bata ché ie'pa
a eta.

Jacob blënewā

29 Jacob tò iché ila'r wēpa a: “Ye'
blërkewā e' kéwö dökewatke. Mik
ye' blënewā, eta ye' nu blōwā ákuk

* 49.22 José dör wës burro...ká tukir kī es: Ñies hebreoie ttè e' mane'wëmisö i' es: José dör
wës kal tskirke di' kkömik es; tkakā iké kköiëule e' mik buaë, ñies iwōrdaë taië.

a ká wé ye' yamipa nu blène eē. Pö e' atē wēm kiè Efrón dör hititawak e' ká a. ³⁰Ká e' atē Macpelá Mamré wöshaë. Ká e' atē Canaán. Ká e' ena ákuk e' wato'ttsa Efrón tö Abraham a as Abraham tö iyamipa nu blö eē. ³¹Eē Abraham ena ilaköl Sara, ñies Isaac ena ilaköl Rebeca, e'pa nu blène. Eē ye' tö ye' alaköl Lía, e' nu blé'wä ñies. ³²Ká e' ena ákuk e' wato' hititawak tö.”

³³Mik Jacob tö ttè e' kōs ché one etā ie' e' tēwane ika' kī tā iblēnewa mīa idēutōpa itōkī.

50 ¹Etā José tö iyé nu paklö'wēwä wöalattséi-tö tā iie' taië. ²E' ukuökī tā ie' tö egiptowak dör s'nu kanéukwakpa e'pa kié iyé nu kapeyōkwä as kē inurwä. Etā es ikanewérakitö. ³Ikanewérakitö dōkā ká dabom tkēyök (40 días), ekkē kawō kiane ikanewōie e' kuēkī.

Egiptowak tö ischō eriaitsé kawō dōkā dabom kuryök (70 días). ⁴E' ukuökī tā José tté Egipto blú kuēblupa tā, tā ichéitō ie'pa a:

—A' éna er bua' chak ye' a, e' tā a' yú ichök Egipto blú a ⁵tö mik ye' yé duökewatke, etā ie' tö ye' ka' ie' a ttè muk Skököl wörkī tö inú blerawayō ákuk kaneō'at ie' wák tö atē Canaán e' a. E' kuēkī kawō mū ña ie' nu tsōmi blēwä eē. Mik ye' ibléwä tā ye' dotkene.

⁶Etā Egipto blú tö iiuté:

—Be' yú be' yé nu blökwä wēs ie' tö be' a iki' es.

⁷Etā José mīa iyé nu blökwä. Egiptowak kuēblupa kōs e'pa mīyal ie' tā. ⁸Jacob yamipa ēkka ena José yamipa ēkka ena iēlpa e'pa kōs mī ñies. Ie'pa ala'r ena ie'pa iyiwak e'pa è atéat Gosen. ⁹Ñies pē' mī taië karreta kī ena kabaio kī. Es pē' mī taië José tā. ¹⁰Mik ie'pa demi ká kiè Goren-ha-atad atē tsinet di' Jordán diwö tskirke e' kker eē, etā eē ie'pa ulitane tö Jacob nu wötērkewä e' kēwō tkö'wē dalō taië wa. Eē José tö iyé eriaitsé dōkā ká kul.

¹¹Mik canaánwak serke eē, e'pa tö Jacob nu wötērkewä kēwō tkö'wē e' sué, etā ie'pa tö iché: “Mokī egiptowak tö s'nu wötērkewä e' kēwō tkö'wēke dalō taië wa.” E' kuēkī ká e' kiè mékā ie'pa tö Abel-Misraim.* Ká e' atē tsinet di' kiè Jordán e' kkōmik.

¹²Es Jacob ala'r tö iyé nu kanewé wēs ie' tö iyé' ie'pa a es. ¹³Ie'pa wä inú mītser Canaán ibléwakitō ákuk yöule Abraham wä iyamipa pōie e' a. E' atē Macpelá. E' wato'ttsa hititawak kiè Efrón tö Abraham a. Ká e' atē Mamré wöshaë. ¹⁴Mik José dēutō nu blène one, etā ie' biteane Egipto. Ie' ēlpa ena pē' ulitane mīne ie' tā e'pa kōs biteyalne ie' tā.

José ēlpa suanékane ie' yōkī

¹⁵Jacob blēnewä e' ukuökī tā José ēlpa tö ibikeitsé: “Isalema José éna sulu se' arke. Ì kōs wamblē' se' tö ie' kī e' skéie se' wel'ikeraëitō.” ¹⁶E' kuēkī ie'pa ttè

* 50.11 Abel-mizraim: Hebreoie ká kiè e' wä kiane chē egiptowak schō eriaitsé.

mémi ie' a: “Kam be' yé blërwa,
¹⁷etä ie' tö sa' a iché tö ichó be'
 a: ‘Ì kōs suluë wamblè' sa' tö be'
 kī, e' olo'yó sa' kī.’ E' kuēkī sa'
 kköchò be' a tö e' olo'yó sa' kī.
 Sa' tö be' yé e' Këköl dalöieke e'
 kuēkī.”

Mik biyò e' demi José a, etä ie'
 ié siarè. ¹⁸Etä iëlpa demi iwökī.
 Ie'pa wöéwa dò iski idalöioie tä
 ichérakitö:

—I' sa' de be' wörkī. Sa' dör be'
 kanè mésopa.

¹⁹Etä ie' tö ie'pa iüté:

—Kè a' suanuk. Ye' kè a a'
 shūlinuk Skëköl skéie. ²⁰A' íyi
 sulu bikeits wamblè ye' kī, erë e'
 mane'wéttsane Skëköl tö buaë se'
 kī. E' wa taië pë' tsatkëne i'ñe tä.
²¹E' kuēkī kè a' suanuk. Chkewö
 meraëyö a' a ena a' ala'r kōs a.

Es ie' tö ie'pa a iché er buaë wa.
 E' tö ie'pa ttsë'wéne buaë.

José blënewa

²²José ena iyé alikpö yamipa
 e'pa sene'ia Egipto. Ie' sene' döka
 duas cien eyök kī dabom eyök
 (110). ²³Ie' tö ilà Efraín talapa e'
 ala'r suéia. Nies ie' tö ilà Manasés
 e' alà kiè Maquir e' ala'r suéia.

²⁴Ká et tä ie' tö iché iëlpa a: “Ye'
 duökewa e' kéwö kianeia tsir. Erë
 Skëköl wák tö a' kimeräe. Ie' tö
 a' yelurdaë ká i' kī. Ká yë'bakitö
 mè Abraham a ena Isaac a ena
 Jacob a e' a a' tsemiraëitö.” ²⁵Etä
 ie' tö iëlpa kié as ie'pa ttè mù ie'
 a Skëköl wörkī. Ie' tö ie'pa a iché:
 “Skëköl tö a' yerattsä ká i' kī. Mik e'
 tka, etä ye' sik tso' blëule e' tsúmi
 e' tä.”

²⁶Mik ie' blënewa Egipto, etä
 ie' kī duas de cien eyök kī dabom
 eyök (110). Ie' nu kapeyanewa as kè
 inurwa e' iënewa s'nu kélkuö a.